

Leven Gugu

Leven Gugu At Luvuttadi Vavang

Levelinga Loklox Axasep

Lumaares 61-62 A.D.

Luk ga malagan na lubuk ti ne Tiopilas. Avot tinotno ri na lubuk, Luk ga malagan la ga lox axasep leventetere la levempapaase la lorooro at ne Iesu keneng at lubuk Luk. Nai lubuk ne Luk ga malagan i kusu ri lox axasep ne Tiopilas ti lempanga salai luvuttadi vavang at ne Iesu diga lox i melemu at lanmet teren. Lentaba leventetere at nai diga re i ri ne Luk, ketla lentaba neni ga xasep teren mila neni ga emu mi ne Pol. Kuren la keneng at luvut silok 16, ta ven i do Luk ga vosiga ne Pol la ga emu min. Na lubuk i ruuna lavantun lengkot silok. Avot tinotno i lox ase dik mi luvuttadi vavang diga ruuna ka Loroonan Kaala ro Jerusalem la diga ru ka lugugu. Melemu i lox ase dik do diga vavang la limixin diga beles keneng at luutus atnedi, limixin to at lengkot Judaia la Samaria. I lox ase bok dik do mo Lagale Lavavang mumu ne Iesu ga epeseves la buaang nedi limixin at na lavatbung menemen diga rongga i. Na lubuk i lox ase dik do Loroonan Kaala ga raba lololos ti limixin kusu dina lok buaang lempanga sangsangu kusu buaang nedi limixin diba nuunu at ne Iesu.

Lengkot silok keneng at na lubuk:

- 1:1–5:42 Lurutu kaxat la lususu atnedi diga nuunu.
- 6:1–9:31 Limixin nuunu di ekip tangarang mi levesongsongot.
- 9:32–12:35 Lempapaase mumu levempavang at ne Pita.
- 13:1–14:28 Lavatpas avot at ne Pol.
- 15:1–41 Luvuttadi amgomgo diga vot buru ro Jerusalem.
- 16:1–18:23 Lavatpas sepsev agepura at ne Pol.
- 18:24–21:14 Lavatpas sepsev avantun at ne Pol.
- 21:15–28:31 Larangtanga alis la lavatpas at ne Pol uto Rom.

1 ¹Saparap leeme silok ne Tiopilas;
At lovoang avot tarak aga malagan axasev u mi lempanga ne

Iesu ga lox i la ga anasa min; ga ru ka i ap mo laaleng ni ga vaxaru kaxat leven gugu ren, ²se at laaleng ne Moroa ga lam kaka i uto vana at laxalibet. Goxovisi ni goxo urut uto vana la ni ga vaase mi levelinga at Loroonan Kaala rinedi luvuttadi ni ga soxolik ka nedi do luvuttadi vavang teren. ³At lavanuet sangaun aleng melemu at lanmet teren, ni ga ru asuvos tinedi luvuttadi vavang teren ti lox asuusu i do ni i rururun mo gara roo xat amlong pam basinge lanmet, la nedi axap diga ven i; la ni ga paase axasep mumu Linintoo at ne Moroa. ⁴At lara laaleng diga vot pasa i la ni ga raba nedi mi lavapaase alii la ga tong lolos i ridi xeretna, “Nemen mita vas kaxat basinge lemenemen Jerusalem, ketla mina nemen tangais laramtaba ne Tamak ga vaase alii min tinimi, i ngan nia aga tong pam i rinimi xeretna, ⁵Jon ga sep susu nimi mi ladan, ketla noxo lox abao bok ba la miba lok kaka lesepe susu at Loroonan Kaala, la Loroonan Kaala na vubeles atnimi.”

Moraa Ga Lam Kaka Ne Iesu Uto Vana At Laxalibet

(Mt 28:16-20; Mk 16:19-20; Lu 24:50-53)

⁶At lara laaleng luvuttadi vavang digak lox eburu mi ne Iesu la diga sue i, “Leeme Silok. Kereva, uba riki xepe bok luvuttadi amgomgo boro Rom, kusu nedik axa mede Israel ataba lok tatao nedik at na levenaleng?”

⁷Iesu ga vorang i ridi xeretna, “Ne Tamak axa ga lok katling pam mo laaleng mo lavanga naba rupot teren, la ixo epovo xusu minaklen i do at ua laaleng. ⁸Ketla nemi minaba umsu mi lolos mo do Loroonan Kaala na vubeles atnimi; la minaba paase katling mi lorooro rak tinedi limixin to at lemenemen silok Jerusalem, la to bok at lengkot axap at lunep silok Judaia la Samaria, la to at lengkot axap bok at na lavatbung menemen kopok.”

⁹Melemu at na levelinga ren, Moroa ga lam kaka i upana la loxontakabu ga lok pe i basinge levereven atnedi.

¹⁰Nedi move diga reven lolos mu at ne Iesu upana at lamavangkap la soso mun lura luradi duga siga levesingsiga bunbun duga ru saparap nedi. ¹¹La duga lok, “Luvuttadi me Galili, lai mo mi tu mu i la mia reven upana at lamavangkap? Na ne Iesu, ne Moroa i lam kaka i basinge nimi uto vana, ni nabamlong bok kerekngan tai mo nemi mi ven i, i urut uto vana at laxalibet.”

Diga Soxolik Ka Lara Ri Lok Kun Ne Judas

¹²Melemu luvuttadi vavang digamlong uto Jerusalem boro at loxongkaana, laasen teren, Lakaana Olip, ik lok saparap lemenemen silok Jerusalem. ¹³Diga vubeles uto xeneng at lemenemen silok Jerusalem la diga vubeles uto vana at loogu diga nemen teren; Pita, Jon, Jems la ne Endru, Pilip la ne Tomas, Batolomiu la ne Metiu, Jems nitna ne Alpias,

Simon neni at lubungmixin me Selot; la ne Judas nitna ne Jems. ¹⁴Digat pot eburu amisik mi lentaba lavakin la ne Maria nenen ne Iesu mi luvutneton ngan loxonbinam tadi xusu dina ngising.

¹⁵At lara laaleng Pita ga xatu kaxat kantubu atnedi legesa sangaun kobot mi legepu sangaun (120) luvuttadi nuunu; ¹⁶la ga lok tidi, “Luvutnetak mi luvurinak, levelinga keneng at Lovoang Kaala migomgo na ira sorun; kerekngan Loroonan Kaala ga tong asu i at lengkompixan at ne Devit, mu ne Judas, neni laradi gam gomgo rinedi luvuttadi xusu dina ranga alis ka ne Iesu. ¹⁷Judas neni mo lara atnedik ga gugu eburu minedik.”

¹⁸Judas ga lok ka luunun ti mo laxakapmek teren, la neni ga un kaka loxongkangka min. Ni ga subu go la lorongtong teren gara repagam la labantine ren ga sixisu nga ukamang. ¹⁹La nedi limixin axap diga nemen go Jerusalem, diga ronga mo lavanga, la diga so asen mo loxongkangka at lavapaase axa atdi, do Akeldama, lavasuun teren keretna, “Loxongkangka at Lada.”

²⁰La ne Pita ga lok bok, “Keneng at levempikipixan at ne Devit ni ga malagan i xeretna,

‘Mo loogu ren na nemen gamasa; la tara noxo nemen bok ba ren.’

Sam 69:25

Melemu bok,

‘Mo lugugu ren tara naba xip kaka i ren.’

Sam 109:8

²¹⁻²²Kuren la ata soxolik ka tara, kusu na gugu eburu midik la na tong asu laxakatu kaxat amlong at Leeme Silok ne Iesu. Ata soxolik ka tara atnedi luvuttadi diga nemen eburu midik ap mo levenaleng Leeme Silok ne Iesu ga emu eburu midik; ga vaxaru ka i ap mo laaleng ne Jon ga sep susu ne Iesu se at laaleng ne Moroa ga lam ka i uto vana at laxalibet; la neni ba xip ka mo lugugu at ne Judas.”

²³Kuren la diga soxolik ka legepu radi; Josep, laasen bok teren ne Basabas, la lara laasen bok ne Jastas; la ne Matatias. ²⁴La diga sing keretna, “Leeme Silok, nenu ukleklen lodoxoma at limixin. Una lox ase nama mi tara atdu na luradi nu ura soxolik ka vam i, ²⁵kusu na xip ka mo lugugu at ne Judas ngan luvuttadi vavang la ni gat pas uto at lemenemen songsongot i epovo rin.” ²⁶La diga ekampoovo mi levenuat la mo luat at ne Matatias ga subu avot to at laxangka, kuren la ni ga vubeles eburu minedi lasangaun legesara xusu rip kip mo lugugu.

Lovotpot At Loroonan Kaala Saparap Limixin Nuunu

2 ¹At lara laaleng limixin me Judaia diga lok laanan silok, diga tong i do Pentikos; nedi limixin axap diga nuunu diga vot eburu ro at lara loogu. ²La soso mun diga ronga lavanga ga rupot ngan lamanman silok boro vana at laxalibet, la ga lox aumsu mo loogu digat kis to xeneng

teren. ³La diga ven lavanga ngan laxao ga rem epeseves ap mo loxot diga nemen teren la gat los kis atnedi getgesara. ⁴Loroonan Kaala ga vubeles atnedi axap la diga lox epovo i do dina paase mi lempapaase petpes, i ngan Loroonan Kaala ga raba di min.

⁵Ap mo loxonaleng limixin at ne Moroa boro at lengkot axap at na lavatbung menemen digak lok go Jerusalem ti lotu saparap ne Moroa. Nedi at lubungmixin me Judaia. ⁶Diga ronga mo lavanga la buaang mun limixin diga rupot eburu ro ap mo loogu. Diga sangu mila nedi getgesara diga ronga i do luvuttadi vavang diga tong asu levelinga at ne Moroa mi lempapaase atdi xa. ⁷Diga sangu aleng la diga lok, “Na luvuttadi di paase xeretna nedi boro Galili. ⁸I lok kereva la nedik axap dia ronga nedi di epaase mi lempapaase axa atdik. ⁹Nedik na boro Patia, Midia, la Ilam; boro bok Mesopotemia, Judaia la Kapadosia, Pontas la Asia; ¹⁰Pirigia la Pampilia la boro Isip la at lengkot bok Libia saparap Sairini; la lentaba bok atdik na boro Rom. ¹¹Lentaba bok at lubungmixin me Judaia, la lentaba atdik boro vetpes, di lok kaka mun lunuunu at limixin me Judaia; la lentaba bok atdik boro Krit la Arabia ketla nedik axap di ronga di, di paase mi lempapaase axa atdik mumu lempanga sangsangu ne Moroa ga lox i.” ¹²Diga lingun la diga esue minedi getgesara, “Ua lavasuun at na?”

¹³Ketla lentaba diga lok kalise luvuttadi vavang, la diga lok keretna, “Na luvuttadi dia vinin solo laxangkadan lolos.”

Pita Ga Vavang Ti Limixin

¹⁴La ne Pita eburu mi luvuttadi vavang diga tu kantubu at limixin axap la ni ga lok tidi xeretna, “Limixin me Judaia la nemi mo mik lok de Jerusalem, mina ronga levelinga rak; nia ana soxomus lavasuun at na lavanga rinimi. ¹⁵Na luvuttadi xopmen dina in kerekngan nemi mi doma i, mo vam i vasik konaleng maxantamak suubu. ¹⁶Ketla nai ne Moroa ga vaase asu i at levelinga at leeme vapaase alii, ne Joel.

¹⁷Moroa ga lok keretna, ‘Auret ti laaleng kavaxap at lavatbung menemen nia anaba lox i na; anaba riki asi Loroonan Kaala rak uto xantubu at limixin axap. Laxamdak mi laxaalik atnimi dinaba paase alii tempanga; luvuraau maxat atnimi dinaba silimet tangarang ka tempanga; la luvuttadi asioxo atnimi dinabam tobo teventomtobo. ¹⁸Ap mo levenaleng anaba riki asi Loroonan Kaala rak uto xantubu at lavasaxaruki rak bok, lavatlok mi lavakin; la nedi dinaba paase alii tempanga. ¹⁹Anaba lok tempanga loklok katling to vana at laxalibet la tempanga sangsangu ro xopok at lavatkangka. Lada, laxao la lakbus at lusuxa naba rupot; ²⁰laxangking naba rem gili na ngan lamain la lagaaling naba memele ngan lada; la melemu mo laaleng silok at Leeme Silok naba rupot. ²¹La do tara na sing ti laasen tarak kusu ri loklok tooro, ni naba roo.”

²²La ne Pita ga lok bok, “Leme Israel. Mina rongga na levelinga; na ne Iesu me Nasaret ni laradi ne Moroa ga lox asilox i mi lempanga sangsangu kantubu atnimi la nemi axa miga ven pam mo lempanga ni ga lox i at lekngen ne Moroa. ²³Moróa xa ga lox agagas i la gaklen pam lavanga naba ravasu, kerekngan lodoxoma axa ren; la nemi miga sev amer i xeretna, miga siam taba luvuttadi xapmek do dina vaxarem i ro vana at laxaba. ²⁴Ketla ne Moroa ga lox arooro amlong i basinge lololos at lanmet mila kopmen goxo epovo kusu lanmet na ranga alis i. ²⁵I lok ngan ne Devit ga paase mumu i xeretna,

‘Nia a reven Leeme Silok to melamgo rak at levenaleng axap. Ni mo ik lok at lakngak tino, kusu nia noxo marat at levenmumuat limixin di lok li i rak. ²⁶Kuren la nia a umsu mi lomomo, la a paase momo mun. Nenia a ruuna lodoxoma voovo, ²⁷mila nenu, ne Moroa noxo ke xepe lороonan tarak keneng at lolos at lanmet. La u noxo ke xepe Lanarong taram la labantuxu ren napso. ²⁸Ugara lox ase vam ia mi langas ti nom lороoro ruturun. Nenu uba suxa umsu ia mi lomomo, mila nenu uk lox eburu minia.”

Sam 16:8-11

²⁹La ne Pita ga lok bok, “Luvutnetak mi luvurinuk, ana vaase axasep nimi mumu lurubuno avolo atdik, ne Devit. Ni ga met pam la digak mir i, la lamaaut teren mo i nemen de, ise at na laaleng. ³⁰Neni ga leeme vapaase alii at ne Moroa, la ni gaklen pam laxakaape alii at ne Moroa rin. Moroa ga vangpe do ni naba lok ka tara at livipisik li at ne Devit kusu ni naba lox asilox i, ngan loorong silok. ³¹Devit ga ven pam umelamgo ri lavanga salai ne Moroa naba lox i; kuren la ni ga paase mumu laxakatu kaxat amlong at Lanarong. Ni ga lok, ‘Lороonan teren noxo nemen to at lemenemen at labarongan; la labantuxu ren noxopso.’

³²Moróa ga lox aroo amlong ne Iesu basinge lanmet, la nema na maga ven lороoro amlong teren. ³³Ni ga lam kaka i uto vana at laxalibet la ga vaxaxis li i ro at lixitkis orong la ne Moroa xa ga raba i mi lololos kusu ni na riki Lороonan Kaala ren tinama, kerekngan tai mo nemi mi ven i la mi rongga i. ³⁴Mo loxot to vana xopmen na paase mumu ne Devit do ni ga urut uto vana at laxalibet; ketla ne Devit ga lok keretna,

‘Moróa ga tong i ri Leeme Silok tarak; una xis de at lakngak tino, ³⁵se nenia aba lok li mo limixin munepen taram, i ngan loxot burubut to maxopok at luxangkedek taram.’

Sam 110:1

³⁶Kuren la limixin axap me Israel dinaklen avukar i do na ne Iesu, no miga vaxarem i ro at laxaba, ne Moroa ga lok li i xusu neni Leeme Silok la Lanarong.”

³⁷Mo limixin diga rongga i na, diga bulu aleng la diga lok ti ne Pita eburu mi luvuttadi vavang, “Luvutneton nama, maba lok lavanga salai?”

³⁸Pita ga lok tidi, “Nemi getgesara mina leeng basinge leveloklok kakapmek atnimi, la mina lok kaka lesepe susu at laasen at ne Iesu

Karisito kusu ne Moroa naba doxoma xepe leveloklok kakapmek atnimi la nemi minaba ruuna ka na laramtaba at Loroonan Kaala. ³⁹Moróa ga lok na lavapaase alii rinimi la livipisik li bok atnimi la tidi bok no di nemen paxalom, la tinedi axap ne Moróa naba ro xaka nedi.”

⁴⁰Pita ga paase aronga di mi laxalinga solo la ni ga sing tinotno bok di xeretna, “Mina lok tatao avukat nemi xusu mi noxo suma langsangan losongsongot mo naba rupot saparap limixin kakapmek at na levenaleng.” ⁴¹Buaang atnedi diga nuunu ap mo levelinga la luvuttadi vavang diga sep susu di; lavantun larabin sangsangaun kobot (3000) limixin diga beles saparap nedi luvuttadi nuunu ap mo laaleng.

⁴²Diga tupot eburu amisik mi luvuttadi vavang kusu rik lok ka levenanasa at ne Moróa; digak lok levengkitkis buru la levenanan buru la levesingising atdi.

Lorooro Kantubu At Limixin Nuunu

⁴³Buaang lempanga sangsangu luvuttadi vavang diga lox i la ga lok buaang limixin diga sangu. ⁴⁴Mo luvuttadi nuunu diga vot eburu amisik la diga vepes bok lempanga axap atdi xantubu atnedi. ⁴⁵Diga sesep bok mi lempanga atdi la mo levempilas teren diga epes i xantubu atnedi ga epovo at levempakpakes atnedi getgesara. ⁴⁶At levenaleng axap digat pot eburu amisik ngan loxonbinam tadi ro xeneng at loogu laplavang la diga anan buru leveluxa atdi ro xolonu, diga anan mo leveluxa eburu mi lumulus la lomomo keneng at lebelen di. ⁴⁷Diga emi asu mi ne Moróa la limixin axap diga lok ngangao atdi. At levenaleng axap Leeme Silok gam lam abeles bok luvuttadi diga lok kaka lunuunu at laasen at ne Iesu ukeneng ap mo lexekexes atdi.

Pita Mi Ne Jon Duga Lox Aroo Laradi

3 ¹At lara laaleng Pita mi ne Jon dugat pas uto vana at loogu laplavang kusu duna lok lising at lavantun konaleng ukantinao, i ngan leme Judaia digak lox amisix i. ²At lara langas povolo, laasen teren do Lumusaragu Maraanu, lara laradi mo gat kis, luxangkedek teren ga molo axap; nenen ga visik axa i xuren. At levenaleng axap limixin digap kip kaka i uto ap mo langas povolo xusu na ngising panga rin ap mo limixin digat pas uto at loogu laplavang. ³Ni ga ven ne Pita mi ne Jon duga beles to ap mo loogu, la ni ga sing du xusu duna raba i mi tempanga. ⁴Duga ru la duga ven tooro i la ne Pita ga lok tin, “Una ven tinama’.” ⁵Mo laradi ga milik tidu, ga nua i do ni mo naba lok ka tempanga atdu.

⁶Ketla ne Pita ga lok tin, “Nia xopmen tevempilas gamgames koplá leven gol tarak, ketla ana raba u mi lavanga nia a ruuna i; keneng at laasen at ne Iesu Karisito me Nasaret, a tong i ru do, una ru upana la

una vas kaxat.”⁷ La ne Pita ga ranga axatu i mi lekngen tino la ga lok aurur i upana. Ap mo mene loxonaleng luxangkedek teren ga lolos ta.⁸ Ni ga los kaxat mi luxangkedek teren la ga vas kaxat. La ni ga beles buru midu ukeneng at loogu laplavang gat pas la gat los momo la ga emi asu mi ne Moroa.⁹ Mo limixin diga ven mo laradi gat pas la ga emi asu mi ne Moroa,¹⁰ diga ven kibis i do ni laradi singising panga no gat kis to at Lumusaragu Maraanu at loogu laplavang, diga sangu aleng ap mo lavanga ga rupot saparav i.

Pita Ga Paase Ri Limixin

¹¹ Mo laradi move gam tebeng tu at ne Pita mi ne Jon la limixin axap mo diga rakdu aleng la diga sixit posiga nedi ro at loxot silok saparap loogu laplavang diga tong i do ‘Loxot at ne Solomon’; ¹² Pita ga ven mo limixin la ga lok tidi, “Leme Israel; lai mo mi sangu ren mumu i na lavanga, la lai mo nemi mi tu la mia reven tooro nama min? Mi doxoma i do ma lox avukat na laradi mi lolos axa atnama xopla at loklok nunuan atnama xusu neni i lox epovo i rit pas? ¹³ Moroa at ne Abaram, Aisak, la ne Jakop, Moroa at lavalabat atdik, neni ga lox asilok laasen at ne Iesu, lasaxaruki ren. Nemi miga song araba limixin kapmek min kusu dina sev amer i; la miga sok tixirixes i ro melamgo at ne Paelat, ap mo loxonaleng ne Paelat ga lok do na soxomus asu i. ¹⁴ Neni laradi dadat la mokmokso; ketla nemi miga lok abulubun kepe i, la miga sing ne Paelat kusu na soxomus asu laradi sepsev amet tadi. ¹⁵ La nemi miga sev amet ne Iesu, neni lavasuun at lorooro avolo. Ketla ne Moroa ga lox arooro amlong i basinge lanmet, la nema na ma paase katling i mi mo lavanga mila nema maga ven i. ¹⁶ At lunuunu mun at laasen at ne Iesu la na laradi mi ven i la miklen i, ira lok ka lolos maxat keneng at luxangkedek teren. Lunuunu keneng at laasen at ne Iesu na, i lox aroo na laradi de melamgo atnimi axap.

¹⁷ La na, luvutnetak mi luvurinuk, nia aklen i do nemi eburu mi luvuttadi amgomgo atnimi miga lox i ri ne Iesu; miga lox i mila mi goxo xasep at levelinga at ne Moroa. ¹⁸ Gano migomgo ne Moroa ga vaase asu levelinga at lavaeme vapaase alii ren do Lanarong teren naba xip losongsongot silok; la ne Iesu ga lox asorun mo levelinga. ¹⁹ Kuren la mina leeng basinge laxakapmek atnimi xusu ne Moroa naba doxoma xepe laxakapmek atnimi, ²⁰ la kusu ne Moroa ba raba nimi mi lorooro nunuan basinge levenmumuat at nai lavatbung menemen kopok la kusu ni naba riki asi ne Iesu, neni Lanarong; Moroa gara soxolik ka vam i do rinimi. ²¹ Ni naba nemen to vana at laxalibet se at laaleng ne Moroa naba lox amaxat lempanga axap, kerekngan neni ga tong asu i mi levelinga at lavaeme vapaase alii ren me gano. ²² Kerepmo ne Moses ga lok,

‘Moroa, neni Leeme Silok atnimi naba sak tiki leeme vapaase alii naba vot kantubu atnimi lubangmixin me Judaia, i ngan ni ga sak tiki ia. Mina

ronga levelinga axap neni naba tong i rinimi. ²³Do tara i xopara na ronga levelinga ren, neni naba nemen petpes basinge mo limixin ne Moroa ga soxolik ka vam nedi do ateren to at lorooro melemu; la ne Moroa naba sev amet nedi axap ding tonga xepe levelinga ren.” *Len 18:15,18,19*

²⁴La ne Pita ga lok bok, “Lavaeme vapaase alii ga vaxaru ka i at ne Samuel la nedi bok lentaba diga rupot melemu ren, nedi axap diga paase alii mumu lorooro at Leeme Silok. ²⁵Nemi mi ruuna laxakaape at ne Moroa keneng at lavaeme vapaase alii ren, la nemi mi nemen keneng at nom lekabus no ne Moroa ga lox i eburu mi lavalabat atnimi, kerekngan ni ga tong i ri ne Abaram keretna.

‘Keneng at livipisik li ram, nia anaba lox anarong limixin axap at lavatbung menemen.’

Lur 22:18, 26:4

²⁶La kerepmo ne Moroa ga soxolik ka lasaxaruki ren la ga sak tiki i udo parap nemi avot kusu na lox anarong nimi xeretna; ni na lok nimi xusu mina ven kibis laxakapmek atnimi la mina leeng basinge laxakapmek atnimi.”

Pita Mi Ne Jon Duga Ru At Lavapaase

4 ¹Pita mi ne Jon move duga paase ri limixin la ap mo loxonaleng lavamaasa, mi laradi esep ga lok tatao loogu laplavang, la lubang Sadiusi diga vot pasa du. ²Diga musak mila nedu duga tong i ri limixin do ne Iesu mo ga roo xat amlong pam basinge lanmet, ti lox asuusu i do limixin di met, dinaba roo xat amlong bok. ³Kuren la diga ranga alis du, la diga lok li du at loogu xokoxo se ap mo laaleng melemu, mila laxangking mo ga lok do na lotup ta. ⁴Ketla buaang atnedi diga ronga i mo lavapaase at ne Pita, diga nuunu; la lexekexes atnedi limixin nuunu ga urut ti lavalimo larabin sangsangaun kobot. (5000)

⁵Ap mo laaleng melemu luvuttadi amgomgo at lubangmixin me Judaia, loxongkulao silok mi luvuttadi loklox ase at Lenavolo diga rupot to Jerusalem. ⁶Diga rupot eburu mi ne Anas neni lamgomgo at lubangmaasa, la ne Kaiapas, ne Jon, ne Aleksanda la nedi bok lentaba at libibinat at ne Anas. ⁷Diga vaxaru ne Pita mi ne Jon to melamgo atdi la diga sue du, “Lolos atnege nemu mu ruuna ka i xusu muna lox i na? La laasen atnege nemu mu gugu min?”

⁸Pita ga umsu mi Loroonan Kaala la ni ga lok tidi, “Luvuttadi amgomgo at limixin, la nemi loxongkulao silok; ⁹mi sue nama lingina ri lempanga avukat mata lox i ri na laradi, luxangkedek teren ga molo, la kereva neni i lox avukat. ¹⁰Minaklen i la limixin axap bok me Israel minaklen i do na laradi na i tu melamgo atnimi, ni ita lox avukat at lolos at laasen at ne Iesu Karisito me Nasaret, no nemi miga vaxarem i at laxaba. Ketla ne Moroa ga lox axatu amlong i basinge lanmet. ¹¹Iesu neni laradi Lovoang Kaala ga paase mumu i xeretna,

‘Mo luat nemi luvuttadi xipkip gu miga sok tixirixes kepe i, na nga neni i ngan lamgomgo ri levenuat axap.’ *Sam 118:22*

¹²Keneng mun at laasen teren nedik ataba lok ka lorooro avolo; mila kopmen bok ba teta at na lavatbung menemen kopok, laasen teren ne Moroa ga raba limixin min kusu nedik ataba rooro mu i.”

¹³Luvuttadi amgomgo diga sangu aleng at ne Pita mi ne Jon duga paase lolos la kopmen du goxo marat; diga ven kibis box i do nedu dugat pas amisik eburu mi ne Iesu; la nedu luradi gamasa mun, la kopmen du goxok lok at toloklox ase. ¹⁴Di goxo vorang tempanga mila diga ven mo laradi no duga lox avukar i mo ga tu eburu mi ne Pita la ne Jon. ¹⁵Kuren la diga tong i ridu kusu duna vas su basinge mo loxot tongtonga linga; la diga epaase mumu mo lavanga kantubu atdi. ¹⁶Diga esue xeretna, “Ataba lok lavanga salai ridu na luradi? Limixin axap na di nemen de Jerusalem diaklen pam na lavanga sangsangu nedu na luradi duta lox i, la nedik kopmen ta epovo bok ba do ataba tong i do du toxo lox i. ¹⁷Ketla ata ru pe na lavanga xusu noxo epeseves kantubu at limixin; ata tong i ridu do nemen bok ba duta vaase asu mo laasen ti tara.”

¹⁸La diga ro abeles du ukeneng la diga tong alolos i ridu do nedu noxo tong bok ba mo laasen at ne Iesu la du noxo anasa mi mo laasen teren.

¹⁹Ketla ne Pita mi ne Jon duga vorang i ridi keretna, “Nemi xa mina doxoma mumu i na, do ua i lox avukat at lemeren ne Moroa; mana ronga res atnimi xopla mana ronga res at ne Moroa. ²⁰Kuren la nema ma noxo xap ti vaase asu mo lempanga nema maga ven i la maga ronga i.”

²¹Luvuttadi amgomgo diga vaase lolos aleng tidu, la melemu diga soxomus asu du. Di goxo epovo do dina sev amarat du; mila buaang limixin diga emi asu mi ne Moroa ri mo lavanga sangsangu ga rupot kantubu atdi. ²²Mo laradi duga lok mo lavanga sangsangu rin, levenmaares teren ga volo lavanuet sangaun.

Lisingising At Luvuttadi Nuunu

²³Melemu at losoksoxomus asu atdu, Pita mi ne Jon dugamlong saparap lentaba atdu, la duga tong mo levelinga, lavamaasa silok mi loxongkulao silok diga tong i. ²⁴Diga ronga i mo, la diga lok legesa doxoma mi lisingising saparap ne Moroa, diga lok keretna, “Leeme Silok, nenu luruntudum li at laxalibet, lavatbung menemen, laras la lempanga axap mo di rooro xeneng teren. ²⁵Uga vaase asu na levelinga mi Loroonan Kaala at lungusno at ne Devit, lurubuno nama. Neni lasaxaruki ram, ni ga lok,

‘Tila ba limixin kopmen me Judaia di musak; tila limixin di gagas ti esep eburu mi ne Moroa? Mo lodoxoma atdi ba xap kot. ²⁶Lavaorong silok at na lavatkangka di gagas li nedi la lavaeme silok bok di tupot eburu amisik kusu dina esep eburu mi ne Moroa la Lanarong teren.’ *Sam 2:1-2*

²⁷Kerepmo ne Erodes mi ne Pontias Paelat diga rupot eburu at na lemenemen silok eburu minedi limixin me Judaia la limixin kopmen di me Judaia; kusu dina lox abulubun kepe ne Iesu, neni lasaxaruki dadat taram, mo nu ga lok li i do Lanarong. ²⁸Diga rupot buru ri lok lempanga no nenu ugara gagas li vam i mi lolos taram la lodoxoma ram do naba vot. ²⁹Monga Leeme Silok, u ronga vam mo levelinga lolos di tong i; la una lox abelemes nema lavasaxaruki ram kusu mana vaase asu Lagale Lavavang. ³⁰Una song asu mi lakngam ti lox aroo levenanmeres la una lok bok tempanga sangsangu xeneng at laasen at lasaxaruki dadat taram, ne Iesu.”

³¹Melemu at lisingising atdi, mo loxot nedi diga vot eburu ren gang nengne. Diga umsu mi lolos at Loroonan Kaala la diga vaxaru ka i xusu dina paase asu levelinga at ne Moroa la kopmen bok ba teanmarat.

Luvuttadi Nuunu Diga Epes Lempanga Kantubu Atdi

³²Mo luvuttadi nuunu diga nemen mun keneng at legeso doxoma la legese belen. Kopmen teta atnedi ga lok do mo lempanga ren, ateren axa; ketla diga epes di getgesara mi lempanga axap diga ruuna i. ³³Luvuttadi vavang diga ruuna ka lolos la diga paase asu Lagale Lavavang at laxakatu kaxat amlong at Leeme Silok ne Iesu. La ne Moroa ga suxa umsu di mi leveloklox anarong. ³⁴Kopmen teta xantubu atdi gat kis pakpakes. Lentaba diga ruuna lengkongkangka la lentaba diga ruuna laraugu, diga sesep min la diga lok kaka levempilas at nom, ³⁵la diga raba luvuttadi vavang min; la mo levempilas diga epes ba i xantubu atnedi ga epovo at lavakpakes atnedi getgesara.

³⁶La ne Josep neni at libibinat at ne Levi, neni boro Saipras, mo luvuttadi vavang diga tong box i do Banabas (Lavasuu at laasen Banabas do, “Laradi loklox alolos.”) ³⁷Neni ga sesep mi loxongkangka ren, ga lok ka levempilas, la ga song araba luvuttadi vavang min.

Ananias Mi Ne Sapira

5 ¹Ketla lara laradi laasen teren ne Ananias eburu mi latkin teren ne Sapira. Ni ga sesep mi loxongkangka atdu, ²ketla ni ga ranga alis lenep unun ap mo levempilas do tin; latkin teren gakleklen i, la ni ga raba lenep uto ri luvuttadi vavang.

³Pita ga lok tin, “Ananias, tila u siam abeles ne Satan ia umsu at lodoxoma ram? La ia lok u, ura xarang Loroonan Kaala, la ura ranga alis bok lenep pilas ap mo luunun uga lok ka i ap mo loxongkangka. ⁴Avot nu goxovisi sesep min, ga taram axa; la melemu nu ga sesep min, levempilas bok ataram. Tila ba nenu u doxoma i do una lok na loklok? Nu xopmen una xarang limixin, nenu u xarang ne Moroa!”

⁵Ananias ga ronga i na la ga subu si ukopok la ga met; la nedi axap diga ronga i na, la diga marat aleng. ⁶La luvuraau maxat diga beles

ukeneng la diga bom labantuxu ren, diga xip asu i ukamang la digak mir i.

⁷Melemu lixilik latkin teren ga vubeles, ketla ni goxoklen i do latlok teren ga met pam. ⁸Pita ga lok tin, “Una tong i ria; kereva nai luunun axap nemu mi latlok taram muga ranga ka i ap mo loxongkangka?”

La ni ga siam la ga lok, “I ruturun, luunun axap.”

⁹La ne Pita ga lok tin, “Tila nemu mi latlok taram mu doma i do muna lok tong pen Loroonan Kaala at Leeme Silok? Limixin no dik mit latlok taram no di tu at lumusaragu mo nga, la diba xip kaka box u ukamang.”

¹⁰Ap mo mene loxonaleng ni ga subu saparap luxangkedek at ne Pita la ni ga met ta. Mo luvuraau diga beles ukeneng la diga ven i do latkin mo ga met, diga xip kaka i ukamang la digak mir i saparap latlok teren.

¹¹Langsangan lanmarat ga ravasu xantubu atnedi axap limixin nuunu la nedid bok mo diga ronga mo lavanga.

Luvuttadi Vavang Diga Lok Lempanga Sangsangu

¹²Buaang lempanga sangsangu Leeme Silok ga lox i at levengikngen di luvuttadi vavang teren kusu dina lox i xantubu at limixin. Nedi axap mo luvuttadi nuunu digat pot eburu amisik ngan loxonbinam tadi to at loxot laasen teren ‘Loxot at ne Solomon.’ ¹³Mo limixin kopmen tunuunu atdi diga marat tik lox eburu minedi, keke i do buaang limixin diga lok ngangao aleng atdi. ¹⁴Ketla buaang nedid limixin, lavatlok mi lavakin diga lok kaka lunuunu at Leeme Silok la diga beles at loxonbinam atdi. ¹⁵Kuren la limixin diga lok kaka luvuttadi mekmeres mi levenora atdi uto at levengkonngas kusu do, ne Pita na vas polo, mo lamamau at lovoovo ren naba lok pavaa di. ¹⁶La buaang nedid limixin diga vas kaxat boro at leven menemen saparap Jerusalem, diga lok kaka levenanmeres atdi, la nedid bok lubunggas ga suxuna nedid; la nedid axap diga lok avukat.

Luvuttadi Vavang Diga Xip Levesongsongot

¹⁷Ketla lamaasa gomgo at lavamaasa ga xatu kaxat eburu minedi limixin teren; mo limixin diga tong nedid do lubung Sadiusi, diga umsu mi levereven peves ti luvuttadi vavang. ¹⁸Diga ranga alis ka luvuttadi vavang la diga lok li nedid at loogu xokoxo. ¹⁹Ap mo laxanimin laangelo at ne Moroa ga suang lumusaragu ap mo loogu xokoxo la ni ga sat asu di ukamang la ga lok tidi, ²⁰“Uto nimi at loogu laplavang la mina tong asu Lagale Lavavang mumu lorooro maxat.”

²¹Luvuttadi vavang diga ronga res la ga maxantamak suubu diga beles to at loogu laplavang la diga vaxaru ka i xusu dina anasa limixin.

Lamaasa gomgo eburu mi limixin teren, diga ro bubua ka lubung amgomgo at lubungmixin me Judaia kusu nedid axap dina lok lavapaase silok; la diga lox aonon levelinga uto at loogu xokoxo xusu dina lok taba

nedi mi luvuttadi vavang. ²²Ketla at loxonaleng diga rupot di goxo ven luvuttadi vavang to at loogu xokoxo; kuren la digamlong uto at luvuttadi amgomgo xusu dina tong axasep nedi min. ²³Diga lok keretna, “At loxonaleng ma rupot to at loogu xokoxo, ma ven i do i tu pipe rinotno, la nedi mo luvuttadi rutu mu mo bok di tu at lumusaragu; la ma suang mo lumusaragu la nema maxo ven tara go xeneng.” ²⁴La mo lavamaasa silok la laradi gomgo at luvuttadi rutu mu diga ronga i na la diga rangku do lai mo ga rupot saparap mo luvuttadi vavang.

²⁵La lara laradi ga rupot la ga lok tidi, “Mina ronga i na. Luvuttadi mita lok li di itinongo ro at loogu xokoxo no di tu at loogu laplavang la dia anasa limixin.” ²⁶Kuren la laradi gomgo ga vas kaxat eburu mi luvuttadi rutu mu la diga lam ka amlong luvuttadi vavang. Kopmen di goxo sep nedi mila diga marat do limixin dina lu amet di mi laxanuat.

²⁷Nedi diga lam kaka luvuttadi vavang ukeneng, la diga vaxaru nedi ro melango at luvuttadi amgomgo at loxot tongtonga linga; la lamaasa gomgo ga lok tinedi xeretna, ²⁸“Maga raba nemi mi levelinga lolos do nemen gat nemi mita anasa mi mo laasen at ne Iesu; ketla ming tonga xepe i. Mira vaase asu vam nom levenanasa at lengkot axap de xeneng Jerusalem, la nemi mi lox i xuren kusu do nema maba xip tutu mi lanmet teren.”

²⁹Pita eburu minedi luvuttadi vavang diga vorang i ridi xeretna, “Mana ronga res kusuk mun at ne Moroa la ma noxo ronga res at limixin mun. ³⁰Moroo, neni lomoroo at lavalabat atnedik, neni ga lox axatu ne Iesu basinge lanmet, melemu atnemi miga vaxarem i ro at laxaba. ³¹Moroo ga xiv aurur i upana la ga vaxaxis i ro at lekngen tino mila neni lamgomgo la Laradi Loklox Arooro xusu na raba limixin me Israel mi langas ti leeng basinge laxakapmek atdi la ne Moroo naba doxoma xepe i. ³²Nema na ma vaase asu na levelinga; Loroonan Kaala bok i vaase asu i, neni nom laramtaba ne Moroo ga raba i rinedi ding tonga res at levelinga ren.”

³³Diga ronga i mo la diga musak aleng, la diga lok do dina sev amet di. ³⁴Ketla lara atdi, neni la Parisi laasen teren ne Gamaliel; neni laradi loklox ase at Lenavolo la limixin axap diga lok ngangao aleng teren. Ni ga xatu kaxat kantubu at luvuttadi amgomgo la neni ga sing nedi xusu dina riki asu be mo luvuttadi vavang ukamang at toxonaleng mutmut mun. ³⁵La neni ga lok tinedi luvuttadi amgomgo xeretna, “Leme Israel, mina doxoma avukat mumu lavanga salai mi lok do mina lox i ridi na. ³⁶Gano ne Tiudas ga vot, ga lok do neni mo i silok aleng; la mo limixin diga mumu asu i ga epovo at lavanuet sangaun kobot (400). Ketla neni ga uu la mo limixin teren diga epeseves la mo lugugu atdi ga met gamasa nga.

³⁷Melemu at na, ne Judas boro Galili ga rupot ap mo levenaleng at loklok ka asen; neni bok ga sat ka buayang limixin saparav i; ketla neni bok ga uu la mo limixin diga mumu asu i, diga epeseves. ³⁸Kuren la at

na lempanga nanga, nia ana tong asu i rinimi; nemen mita sev amet di. Mina ke mulus di xuren; mila do na lugugu di lox i mi lodoxoma axa atdi, to gira xap pam. ³⁹Ketla do lugugu atdi boro vana at ne Moroa, nemi xopmen mina epovo xusu minaba ru pe i. Miba ven i do nemi mi esep mi ne Moroa!”

⁴⁰Luvuttadi amgomgo diga mu asu na lavapaase at ne Gamaliel. Diga ro abeles luvuttadi vavang ukeneng, la digak pixis nedi; la diga tong alolos i ridi do nemen gat nedi ta tong asu laasen at ne Iesu; la diga soxomus asu di.

⁴¹Luvuttadi vavang diga vas kaxat basinge luvuttadi amgomgo, diga umsu mi lomomo mila ne Moroa ga siam do diga epovo rip kip lainmangan at laasen at ne Iesu. ⁴²La at levenaleng axap to xeneng at loogu laplavang la to at leventaugu at limixin, diga anasa la diga vavang mi Lagale Lavavang at ne Iesu, neni Lanarong.

Lavanuti Radi Ri Lok Tooro Luvuttadi Vavang

6 ¹Ap mo levenaleng leexes at luvuttadi nuunu ga uturut amisik upana; la leedak ga ravasu xantubu atnedi limixin me Judaia mo diga paase Grik la nedi limixin me Judaia diga paase Judaia. Limixin mo diga paase Grik, diga lok do lempat naa atdi, di goxop kip ka epovo levempanga loklok tooro ridi at levenaleng axap. ²Kuren la nedi na lasangaun mi legepura luvuttadi vavang diga ro bubua ka nedi axap luvuttadi loklok ka anasa la diga lok, “Kopmen nak mokso rinama xusu mana ke xepe na Lagale Lavavang at ne Moroa la mana raba panga nimi. ³Luvutnetak mi luvurinu, mina soxolik ka tavanuti tuvuttadi xantubu atnemi xa, mo nemi mikleklen di do di umsu mi Loroonan Kaala la lodoxoma avukat; la nema maba lok li di, kusu dina lok tatao na lugugu, ⁴La nema xa maba raba lorooro axap atnema ri lugugu at lisingising la lugugu at lavapaase asu Lagale Lavavang.”

⁵Nedi axap diga lok momo ap mo levelinga at luvuttadi vavang; kuren la diga soxolik ka ne Stiven, laradi ga umsu mi lunuunu la Loroonan Kaala; la ne Pilip, Porokaras, Nakano, Timon, Pamenas; la ne Nikolaus neni boro Antiok, la goxopmen neni laradi me Judaia, ketla neni gam tebeng lunuunu ngan leme Judaia. ⁶Nedi na diga raba nedi ri luvuttadi vavang la diga lok lising la diga lok li levengkikngen di ro mavana atdi, kusu dina lox anarong di.

⁷La levelinga at ne Moroa ga epeseves. Leexes at limixin nuunu ro Jerusalem ga uturut amisik mene la buaang atnedi lavamaasa diga lok kaka lunuunu maxat ap mo Lagale Lavavang.

Luvuttadi Amgomgo Diga Xoxo Ka Ne Stiven

⁸Stiven neni laradi ga umsu mi letaba nabalamu at ne Moroa; la ni ga umsu bok mi lolos la ga lok lempanga sangsangu kantubu at

limixin. ⁹Ketla lentaba luvuttadi di goxopara rin, nedi luvuttadi boro at lumenemen Sairini la Aleksandria; diga lotu at lara loogu singising, laasen teren, ‘Loogu Singising at Luvuttadi Sepsen.’ La lentaba limixin bok me Judaia boro Silisia la Asia di goxopara ne Stiven; nedi axap eburu mi ne Stiven diga etep mi levelinga. ¹⁰Ketla Loroonan Kaala ga raba ne Stiven mi lakleken silok; kuren la ni ga vaase mi lolos la di goxo epovo xusu dina vorang i.

¹¹La diga lok li lentaba xusu dina bala raba i, diga lok keretna, “Nema maga ronga ne Stiven, neni ga paase vupu ri ne Moses la ne Moroa.”

¹²Kerepmo diga lox axatu lodoxoma at limixin, loxongkulao silok la luvuttadi loklox ase at Lenavolo. Diga vosiga ne Stiven, la diga ranga alis i; la diga lam kaka i uto melango at luvuttadi amgomgo. ¹³La diga lox abeles lentaba luvuttadi xusu ti xarang taba i. Diga lok, “Na laradi i paase vupu ri na loogu laplavang at ne Moroa la Lenavolo at ne Moses. ¹⁴Maga ronga i do ga lok do ne Iesu me Nasaret ba ut asi na loogu laplavang la naba ba gili bok leretere ne Moses ga raba avolo dik min.”

¹⁵Nedi axap digat kis go, diga ven tooro ne Stiven la diga ven lemeren ga ngan ta lemeren at laangelo at ne Moroa.

Levelinga At Ne Stiven

7 ¹La lamaasa gomgo ga sue ne Stiven, “Kereva na levelinga di lox i ru, i ruturun?”

²La ne Stiven ga vorang i ridi xeretna, “Luvutnetak la luvuttamak. Mina ronga be levelinga rak. Moroa at laxasep ga rupot saparap ne Abaram ne temen dik ap mo laaleng neni ga nemen to Mesopotemia, la avot ti laaleng neni gat pas uto Aran; ³la ne Moroa ga lok tin, ‘Una on basinge lemenemen taram eburu mi libibinat taram; la unat pas ti mo lemenemen nia anaba lox ase u min.’

⁴Kuren la ni ga vas kaxat basinge lenep laasen teren Kaldia la ni gat pas kusu ri nemen to Aran. Melemu at lanmet at ne temen ne Abaram, Moroa ga ro ka i xusu na on basinge mo lemenemen la na vubeles at na lenep, monga nemi mi nemen teren. ⁵Morua xopmen goxo raba ne Abaram mi tenep at nai laxangka do tin axa, kopmen tinotno tekot go at na laxangka; ketla ne Moroa ga xaape min tin do ni naba raba i min la ateren axa, la mo livipisik li bok teren melemu. Ap mo laaleng ne Moroa ga lok na laxakaape ri ne Abaram, Abaram goxovisi ruuna taxamdak. ⁶Ketla ne Moroa ga lok tin, ‘Livipisik li ram diba nemen to at lenep petpes, ap mo lenep diba lok ngan lavasaxaruki la diba xip buaang laxanmumuat at lavanuet sangaun kobot (400) levenmaares. ⁷Ketla melemu aba song araba langsung levengkokoxo rinedi limixin do dina lox asongot limixin tarak. Melemu bok diba vas kaxat basinge mo lenep la diba lotu saparav ia at na lenep.’ ⁸La ne Moroa ga raba ne Abaram

mi leretere ri rivit kepe lengkontuxu, i ngan loklok katling ti limixin me Israel. Kuren la ne Abaram ga vit kepe loxontuxu at ne Aisak, melemu at lavanuan aleng latkin at ne Abaram ga visik asu i. Aisak ga vit kepe loxontuxu at ne Jakop, la ne Jakop ga vit kepe loxontuxu at lasangaun legepura nedi lavalabat atdik.

⁹Nedi na laxamdak at ne Jakop, diga reven peves at neton di, ne Josep; la diga sesep min ngan lasaxaruki uto Isip. Ketla ne Moroa ga nemen eburu min, ¹⁰la ni ga lox asepsu i basinge mo laxanmumuat gat pot saparav i. Ap mo loxonaleng ne Josep ga ru ro melamgo at ne Parao, loorong silok me Isip, Moroa ga raba ne Josep mi lodoxoma avukat la loklok nunuan. Parao ga ven kibis i la ga lok li ne Josep kusu neni lamgomgo ap mo lenep silok la keneng bok at loogu at loorong silok teren.

¹¹Ketla loroxo silok ga vot ap mo lunep silok, Isip la Kanan, la ga lox asu buaang laxanmumuat. Goxopmen bok tempanga anan ti lavalabat atdik. ¹²La ne Jakop ga ronga i do leveluxa mo gak lok to Isip, la ni ga sak tiki mo laxamdak teren uto; ni lavatpas avot atdi ugo. ¹³At lavatpas sepsev agepura atdi, ne Josep ga tong asu i ri luvutneton dola neni neton di; la ne Parao gaklen ba limixin at ne Josep ap mo laaleng. ¹⁴La ne Josep ga lox aonon lavapaase uto ri ne temen, ne Jakop, la ga tong i rin eburu mi libibinat teren kusu dinat pas uto Isip; nedi axap diga epovo at lavanuti sangaun mi lavalimo. ¹⁵La ne Jakop ga vas kaxat eburu mi limixin teren uto Isip; ap mo lenep neni eburu mi lavalabat atnedik diga nemen e, se diga met. ¹⁶Diga xip kaka amlong labarongan atnedi uto Sekem la digak mit di at loxot ne Abaram ga un kaka i at libibinat at ne Emo mi levempilas.

¹⁷Mo laaleng ga sixit auret kusu ne Moroa na lox epovo laxakaape ren ga lox i ri ne Abaram; lexekexes at lubungmixin me Judaia ga uturut aleng upana. ¹⁸Melemu lara loorong silok petpes, kopmen goxokleklen ne Josep, neni gam gomgo ri limixin me Isip. ¹⁹Ni ga bala vukpuk lavalabat atdik la ni ga musak di, ga lok nedi xusu dina lok pes laxamdak atdi uto kusu mo laxamdak lixilik atdi diba met.

²⁰Ap mo levenaleng lavalabat atdik digap kip levenmumuat, la lara latkin ga visik ne Moses, neni lagale lamdak la ga lox avukat at lemeren ne Moroa. Ni ga nemen maxopok at loklok tatao at ne temen at lavantun gaaling. ²¹Ketla ne temen mi nenen duga lok li i ro xamang la loolik at ne Parao ga lok ka i xusu ni na lox asilox i ngan lamdak tin. ²²Ni ga lox ase ro Isip la ga umsu mi lakleklen at leveloklok atdi, la ni ga silok aleng at levempapaase la at lempanga axap ni gak lox i.

²³Moses ga lavanuet sangaun maares teren la ni ga vara i do na ven limixin teren me Israel. ²⁴Ni ga ven lara atnedi, lara me Isip gap sev i; kuren la ni gat pas la ga lok do na lok tooro mo laradi me Israel, la ni ga

sev amer i xusu ri sepo i. ²⁵Ni ga nua i do limixin teren mo digaklen pam i do ne Moroa ga soxolik ka i xusu ni naba soxomus asu di at loxokoxo; ketla nedi xopmen di goxo xasep teren. ²⁶Ap mo lara laaleng melemu ni ga ven manga legepu radi me Israel duga esep, la ni ga lok do na lok lumulum kantubu atnedu; ni ga lok, 'Muna ronga i na. Nemu vam nom leton; tila nemu mu esep?'

²⁷Ketla mo lara ga vaxaru kaxat mo leesep ga so asu ne Moses la ni ga lok, 'Nege ga lok li u xusu nenu lamgomgo atnama la unang tonga linga atnama?' ²⁸U vara manga i do una sev amer ia xerekngan nenu uta sev amet mo laradi me Isip itinongo?' ²⁹Moses ga ronga i na la ga sixiro boro Isip la ni gara nemen to Midien ngan laradi xadiong. Mo go neni ga ruuna ka legepu madak.

³⁰Ni ga nemen go Midien at lavanuet sangaun maares la melemu at na, laangelo at ne Moroa ga rupot saparav i ro at lamatbin, gak lok at lakaana, laasen teren Sinai. Mo laangelo gak lok to at lara luuna lixilik; laxao gak lok ap mo luuna, ketla kopmen goxo rin kotos levempavaxan una ren. ³¹Moses ga sangu aleng teren, la ni ga vas saparap mo luuna xusu na ven avukar i. La ni ga ronga laxaka at Leeme Silok ne Moroa; ³²'Nenia ne Moroa at lavalabat atnemi, Moroa at ne Abaram, Aisak la ne Jakop.' Moses ga dede mi lanmarat la ni goxo lok do na ven bok ba i.

³³Moroo ga lok tin, 'Una lok pes luvanga vatpas taram, mila na loxot nenu u tu ren, ni i xaala aleng. ³⁴Nia ara ven pam levenmumuat limixin tarak di suma i ro Isip. Nia ara ronga vam lerengteng atnedi la nia ara si xusu ana lok tooro di. Ude nga u la nia aba sak tiki u uto Isip.'

³⁵Moses neni laradi limixin me Israel di goxopara rin. Diga sue i, 'Nege ga lok li u do nenu lamgomgo atnama la laradi rongtonga linga atnama.' Ketla ni laradi ne Moroa ga sak tiki i ngan lamgomgo la laradi loklox asu, kerekngan laangelo ga tong i ro ap mo luuna, laxao gak lok teren. ³⁶Neni ga lam asu ka limixin basinge lenep Isip, ga lok lempanga sangsangu ro Isip, la to bok at loxontas laasen teren, Laras Memele, la to bok at lamatbin at lavanuet sangaun maares. ³⁷Moses neni laradi ga paase ri limixin me Israel do 'Moroo naba riki taradi vapaase alii xerekngan neni ga riki ia; la neni at tara xa atnemi.' ³⁸Neni mo laradi ga nemen eburu mi limixin me Israel to at lamatbin, neni ga nemen eburu mi lavalabat atdik la laangelo bok mo ga paase rin to at lakaana Sinai; neni ga lok ka Lenavolo at ne Moroa xusu na raba i ri nedik limixin me Israel.

³⁹Ketla lavalabat atdik goxopara na ronga res teren, diga sok tixirixes xepe i la diga lok do dinamlong uto Isip. ⁴⁰Diga tong i ri ne Aron, 'Una lok tevempooovo moroa rinama xusu namgo rinama at langas. Nema xopmen manaklen i do lavanga salai ga rupot saparap mo laradi, ne Moses mo ga lam asu nama boro Isip.' ⁴¹Ap mo loxonaleng mun diga lok lovoovo bulumaxao mi levengkikngan di la digaplavang saparav i mi

leventamtaba la diga lok leluxa silok ti lok katling i. ⁴²La ne Moroa ga lox abulubun kepe nedí, la ga ke xepe nedí xusu dina lotu saparap lempanga i nemen to vana at laxalibet. I lok ngan levelinga i nemen keneng at lubuk at lavaeme vapaase alii i lok keretna,

‘Limixin me Israel! Kopmen mi goxoplavang mi lempanga mi lavanuet kangkedek tia la miga lok letaba min ti lara vetpes ap mo lavanuet sangaun maares to at lamatbin. ⁴³Ketla miga lok tatao loogu at lomoroa ne Molok, la lovoovo at lenti, ne Repan; nedí axap nom laxampoovo vanga nom nemi miga lox i do ri lotu ren. Kuren la aba riki xepe nemi uto melemu at lenep silok Babilon.’ *Amo 5:25-27*

⁴⁴Lavalabat atnedik diga lok tatao loogu kadis at ne Moroa ro at lamatbin. Diga gugu i ngan ne Moroa ga lox ase ne Moses min to at lakaana Sinai. ⁴⁵Melemu lavalabat atnedik no diga lok kaka mo loogu boro at luvuttemen nedí la diga xip kaka i eburu minedi at laaleng diga emu mi ne Josua; la diga lok kaka lara loxongkangka basinge lara libibinat petpes no ne Moroa ga lok kepe di ve, avot ti lovtopot atdi. La mo loogu ga nemen go se at levenaleng at ne Devit. ⁴⁶Moroa ga vara aleng ne Devit la ne Devit ga sue ne Moroa kusu na siam avolo i ri xip toogu laplavang ti Lomoroa at ne Jakop. ⁴⁷Ketla ne Solomon axa ga xip mo loogu ri ne Moroa.

⁴⁸Ketla ne Moroa neni i lolos la i silok, kopmen na nemen at leven gu limixin dip kiv i; i lok ngan leeme vapaase alii ga tong i xeretna,

⁴⁹‘Moroa ga lok keretna, laxalibet neni loxot kitkis tarak, la laxangka ni loxot burubut at luxangkedeck tarak. Toogu xereva nemi miba xiv i ria? Ua ba toxot tia ri lox amas? ⁵⁰Kereva, nia a goxo rudum li na lempanga axap?’ *Ais 66:1-2*

⁵¹La ne Stiven ga lok bok tidi, “Miba baulang alika? Lingisa ba minaba siam ka levelinga at ne Moroa ukeneng at lebelen nemi? La lingisa ba nemi miba ronga res at levelinga at ne Moroa? Nemi mi lok ngan pam lavalabat atnemi; nemi bok na mi xopara ri Loroonan Kaala! ⁵²Lavalabat atnemi diga lox asongot lavaeme vapaase alii axap. Digap sev amet luvuttadi at ne Moroa, no gano migomgo diga paase asu lovtopot at laradi mokmokso la lasaxaruki ren. Ketla nanga nemi miga song araba i ri limixin esep la miga sev amer i. ⁵³Nemi vam na miga lok ka Lenavolo at ne Moroa no lubang angelo diga song araba nemi min. Ketla nemi xopmen mina mumu asu i.”

Diga Lu Uat Ne Stiven

⁵⁴Mo luvuttadi amgomgo at loogu laplavang diga ronga i nom la diga musak aleng la diga atat etang levesangsa atdi ri ne Stiven mi lumukmusak. ⁵⁵Ketla ne Stiven ga umsu mi Loroonan Kaala, neni ga milik aurut upana at laxalibet la ni ga ven lisisixam at ne Moroa, la ne

Iesu ga tu at lekngen tino. ⁵⁶Ni ga lok, “Mina ven i! Nia a ven laxalibet i rem suang; la Laradi Mevana i tu ro at lekngen tino at ne Moroa.”

⁵⁷Digap kup lolos la diga lok pe levenbaalung atnedi mi levengkikngen di. La diga sixit eburu uto saparap ne Stiven, ⁵⁸diga sar asu i basinge mo lemenemen silok, la diga lu uar i. La mo luvuttadi diga lu uat ne Stiven diga lok li levempanga singsiga atdi ro at lara laradi, laasen teren ne Sol.

⁵⁹Nedi move diga lulu uat ne Stiven la ni ga sing keretna, “Iesu, Leeme Silok, una lok ka lороonan tarak!” ⁶⁰Ni ga xis tiktikbu mi luvatgulom teren la ni ga sing silok keretna, “Leeme Silok. Nemen uta doxoma na laxakapmek atnedi di lox i ria.” Ni ga tong i mo la ni ga met ta.

Sol Ga Lox Asongot Limixin Nuunu

8 ¹La ne Sol ga mulus ap mo lanu at ne Stiven. Ap mo mun laaleng luvuttadi nuunu ro Jerusalem diga vaxaru ka i xusu dina suma ka laxasongsongot silok. Luvuttadi nuunu diga epeseves at lengkot axap Judaia la Samaria, ketla luvuttadi vavang diga nemen to Jerusalem. ²Ket lentaba luvuttadi diga lotu saparap ne Moroa digak mit ne Stiven, diga saxaanu ren. ³Ketla ne Sol ga lok tong pen i do na sev amet limixin axap diga nuunu. La limixin esep digat pas uto at laraugu atnedi xusu dina ranga alis ka di, lavatlok eburu mi lavakin, la diga lok li di at loogu xokoxo.

Pilip Ga Vavang To Samaria

⁴Luvuttadi nuunu no diga epeseves, digat pas ti lengkot axap, la diga vavang mi Lagale Lavavang. ⁵Pilip gat pas uto at lara lemenemen at lenep Samaria la ni ga vavang mi Lagale Lavavang at Lanarong tinedi limixin me go. ⁶Buaang limixin diga ru pilo la diga rongga avukat mo levelinga at ne Pilip. Digang tonga i mo la diga ven bok lempanga sangsangu neni ga lox i. ⁷Laxan gas diga ravasu basinge buaang limixin mi langsung lerengteng; buaang atnedi limixin mo lengkot atnedi ga molo la nedi bok lentaba di goxo epovo rit pas, diga lox avukat. ⁸Kuren la langsung lomomo ga rupot saparap limixin ap mo lemenemen.

⁹Keneng ap mo lemenemen lara laradi laasen teren ne Simon; neni at leventaba levenaleng neni gak lox arakdu limixin me Samaria mi mo lempanga sangsangu ren. Ni ga lok do neni mo i silok tinotno. ¹⁰La buaang nedi ap mo lemenemen, nedi limixin gamasa la nedi lentaba silok diga lok ngangao aleng teren. Diga lok, “Neni nom lara i ruuna lolos at ne Moroa la lolos teren i silok.” ¹¹At levenaleng buaang neni gak lox arakdu nedi mi mo lempanga sangsangu ren; kuren la diga mumu asu levelinga ren. ¹²La nedi diga nuunu at lavapaase at ne Pilip mumu Lagale Lavavang at Linintoo at ne Moroa la at laasen at ne Iesu me Nasaret, Pilip ga sep susu di, lavatlok la lavakin bok. ¹³Simon bok neni ga nuunu, la melemu

at lesep susu ren ni ga nemen auret ne Pilip, la ni ga rakdu aleng at lempanga sangsangu ni ga ven ne Pilip gak lox i.

¹⁴Luvuttadi vavang to Jerusalem diga ronga i do limixin to Samaria diga nuunu at levelinga at ne Moroa; kuren la diga riki ne Pita mi ne Jon saparap nedi. ¹⁵Duga rupot la duga sing ne Moroa xusu nedi bok diba lok ka Loroonan Kaala. ¹⁶Loroonan Kaala goxovisi vubeles at tara atdi, diga lok kaka mene lesep susu at laasen at ne Iesu neni Leeme Silok. ¹⁷La ne Pita mi ne Jon duga lok li levengiknggen du at lempatlak atdi, la nedi diga lok ka Loroonan Kaala.

¹⁸Simon ga ven i do ne Moroa ga suxa nedi mi Loroonan Kaala ap mo loxonalleng ne Pita mi ne Jon duga lok li levengiknggen du at lempatlak atdi. La ni ga lok do na raba ne Pita mi ne Jon mi levempilas ¹⁹la ni ga lok, “Muna raba ia mi nom lololos, kusu do nia ana lok li lukngak at tara, ni ba umsu mi Loroonan Kaala.”

²⁰Ketla ne Pita ga vorang i rin, “Nenu eburu mi lempilas taram mi bat pas uto at lemenemen songsongot mila nu u doxoma i do nenu mo una un ka laramtaba at ne Moroa mi lempilas! ²¹Nenu xopmen tekot taram at na lugugu atnama; mila labalam kopmen nak mokso at lemeren at ne Moroa. ²²Una lox ekun lorooro ram la una sing saparap Leeme Silok, kusu neni ba doxoma xepe na laxakapmek ik lok at labalam. ²³Nia a ven i do nenu u umsu mi levereven peves, la lorooro ram i umsu mi laxakapmek la kopmen na epovo xusu una sixiro basinge i.”

²⁴La ne Simon ga lok ti ne Pita mi ne Jon, “A vara i do muna sing ti Leeme Silok, kusu kopmen tara at na lempanga mu tong pam i, naba rupot saparav ia.”

²⁵Melemu at lavapaase asu atnedu la levelinga at Leeme Silok, Pita mi ne Jon duga vas bilong uto Jerusalem. Ap mo lomlong atnedu duga vavang mi Lagale Lavavang to at laxanmenemen solo mego Samaria.

Pilip Eburu Mi Leeme Gomgo Boro Itiopia

²⁶Laangelo at ne Moroa ga vaase ri ne Pilip keretna, “Una lok agagas li u la una vas kaxat uto at langa i laa boro Jerusalem la uto Gasa.” (Na langa kopmen bok ba dinat pas teren). ²⁷La ne Pilip ga gagas la ga vas kaxat. La lara laradi boro Itiopia, neni leeme silok la ni ga lok tatao lempilas at latkin gomgo ne Kades boro Itiopia. Ni gat pas uto Jerusalem kusu naplavang saparap ne Moroa, la ni ga vas bilong mi lavatkaris teren. ²⁸Ni gat kis la ni ga utus at lubuk at leeme vapaase alii ne Aisaia. ²⁹Loroonan Kaala ga tong i ri ne Pilip, “Una vas tangarang mo lavatkaris la unat pas saparav i.”

³⁰Pilip ga sixit soso mun uto at lavatkaris la ni ga ronga mo laradi ga utus lubuk at leeme vapaase alii ne Aisaia; la ni ga sue i, “Uklen lai mo nu u utus i?”

³¹Mo laradi ga vorang i rin, “Nia abaklen i xereva? Kopmen tara vetpes kusu naba tong axasev ia min.” La ni ga sing ne Pilip do na eng urut la na xis to at lavatkaris eburu min.

³²Mo levelinga at ne Moroa xeneng ap mo lubuk ni ga utus i, ga lok keretna,

‘Neni ga lok ngan ta lisipsip no diga lok ka i xusu dina sev i; neni ga lok ngan lisipsip maxat no xopmen nak lok gusugus do di sep korop levengkabinim teren, ni goxo tong tekolinga. ³³Neni ga lox alixilix i la ni goxo vorang i mi tekolinga. Kopmen teta noxo lox epovo do na paase mumu livipisik teren, mila lorooro ren nade at lavatbung menemen ira vot pam at laxavaxap teren.’

Ais 53:7-8

³⁴Mo leeme silok ga lok ti ne Pilip, “Tong i ria, do nege mo na leeme vapaase alii ga paase mu i? Tin koplai ti tara vetpes?” ³⁵Pilip ga vaase rin, ga vaxaru ka i ap mo loxot, neni ga utus i, neni ga tong Lagale Lavavang at ne Iesu rin.

³⁶Nedu dugat pas ap mo langa la duga rupot to at lara loxot ladan ga nemen teren. La mo laradi gomgo ga lok, “Ladan na ik lok. Lai mo ik lok pe ia do ana lok kaka lesepe susu?” ³⁷[Pilip ga lok tin, “Nenu u epovo do una lok ka lesepe susu, mo do u nuunu ruturun mi lorooro axap taram.” Ni ga vorang i rin, “A nuunu do Iesu Karisito neni Nitna ne Moroa.”] ³⁸Mo leeme silok ga lox alis mo lavatkaris la lakaris ga ru; la Pilip eburu mi mo laradi duga vas si uto xopok at ladan la diga ru ro xeneng teren, la ne Pilip ga sep susu i. ³⁹Diga vas su boro at ladan la Loroonan Kaala at ne Moroa ga lok ka ne Pilip uto vetpes. La mo laradi goxo ven bok ba i, ketla ni gat pas epolo mun at langa, la ga umsu mi lomomo. ⁴⁰Pilip ga ven kibis i do ni mo ga nemen ta ro Asotas, la ni ga vas kaxat la gat pas kantubu ap mo levenmenemen, la ni ga vavang mi Lagale Lavavang se neni ga rupot to Sisaria.

Sol Ga Ven Kibis Ne Iesu

(Gu 22:6-16; 26:12-18)

9 ¹Ap mo levenaleng Sol move ga lolos do nap sev amet limixin nuunu at Leeme Silok. Ni gat pas uto at lamaasa gomgo, ²la ga sue i do ni na lok ka lavapaase axasepe ti lox ase nedi limixin me Judaia diga nemen to Damasko. Neni ga vara i xusu na vuse ka nedi diga mumu asu langas at Leeme Silok go, la ni naba ranga alis di, lavatlok eburu mi lavakin la na sat ka di uto Jerusalem.

³At lavatpas teren uto Damasko, ga auret ti mo lemenemen silok, soso mun langsung laxasepe boro vana at laxalibet ga soo pavaa i. ⁴Ni ga subu si ukopok at laxangka la ni ga ronga laxaka at lara ga lok tin, “Sol, Sol. Tila uk lox asongor ia?”

⁵Ni ga sue i, “Leeme Silok, nenu nege?”

Mo laxaka at lara ga lok tin keretna, “Nenia ne Iesu, mo nu uk lox asongor ia. ⁶Ketla una xatu la unat pas uto at lemenemen silok la mo go tara ba tong tempanga salai nenu uba lox i.”

⁷Mo luvuttadi diga emu mi ne Sol, diga ru pilo, la di goxo tong tekolonga; diga ronga laxaka at lara ketla di goxo ven teta. ⁸Sol ga xatu kaxat boro xopok at laxangka la ga valas luxatli ren, ketla ni goxo ven tempanga. Kuren la diga ranga ka i ro at lekngen la diga lam ka i uto Damasko. ⁹At lavantun aleng ni goxo epovo do na ven tempanga, la ap mo bok levenaleng ni goxo anan la goxo inin.

¹⁰Lara laradi loklok ka anasa ga nemen to Damasko, laasen teren ne Ananias. Ni ga ven lisilimet, la Leeme Silok ga lok tin, “Ananias.”

La ni ga vorang i, “Leeme Silok, nenia na.”

¹¹Leeme Silok ga lok tin, “Una gagas la unat pas uto at langas, laasen teren, Langas Mokmokso, la mo go at loogu at ne Judas, una sue ri laradi boro Tasas laasen teren ne Sol. Neni mo i ngising; ¹²la at lisilimet teren ni i ven lara laradi, laasen teren ne Ananias i beles ukeneng la i lok li lukngen at lavatlak teren kusu ni na ven bok ba.”

¹³Ananias ga vorang i rin keretna, “Leeme Silok, buaang limixin diga tong lempanga ria mumu nom laradi, la mumu bok lempanga xakapmek ni ga lox i ri limixin taram to Jerusalem. ¹⁴La ni gat pas ude Damasko mi levelinga lolos at lavamaasa silok, kusu na xoxo ka nedi di mumu asu laasen taram.”

¹⁵Leeme Silok ga lok tin, “Una vot pasa i, mila nia ara soxolik ka vam i xusu ni na mumu asu ia, la ni naba lox axasep laasen tarak tinedi limixin kopmen di me Judaia la ti lavaorong silok la ti limixin me Israel. ¹⁶La nia aba lox ase i mi mo lempanga ni naba songot teren mumu lunuunu ren saparav ia.”

¹⁷La ne Ananias ga vas kaxat la ga rupot to at loogu at ne Judas la ga beles ukeneng la ga lok li lukngen to at ne Sol la ni ga lok, “Netak ne Sol, Leeme Silok i riki ia, Iesu axa, no ga rupot saparav u ro at langas at lavatpas taram ude. Ni i riki ia xusu una reven bok ba la una lok ka Loroonan Kaala.” ¹⁸Ap mo mene loxonaleng, lavanga ga lok ngan lengkexeleng mat ga subu su boro at luxatli at ne Sol la ni ga epovo manga xusu ni na reven bok ba. Ni ga xatu kaxat la ga lok ka lesepsusu. ¹⁹La melemu at laanan teren, lolos teren garamlong bok ba. Sol ga nemen to Damasko eburu mi limixin nuunu at lentaba levenaleng.

Sol Ga Vavang To Damasko

²⁰Sol ga beles to xeneng at laraugu singising la soso mun ni ga vaxaru ka i xusu na vavang mi laasen at ne Iesu. Ni ga lok, “Iesu neni Nitna ne Moroa.” ²¹La nedi diga ronga i, diga rakdu la diga esue, “Kereva na? Na laradi ga nemen to Jerusalem la ni gap sev amet limixin diga nuunu at

ne Iesu. La ni gat pas ude xusu na ranga alis nedi la na lok kaka nedi uto at lavamaasa silok.”²² Ketla lavavang at ne Sol ga mumuat amisik, la ni ga lox asuusu i do ne Iesu mo neni Lanarong; la levelinga ren ga mumuat aleng la buaang atnedi limixin me Judaia mo diga nemen to Damasko di goxo epovo do dina vorang i.

²³Buaang levenaleng gara volo, la limixin me Judaia diga vot buru la diga lok li lara langas linga ri sev amet ne Sol; ²⁴ketla ne Sol ga ronga ka levelinga atdi. At levenaleng kangking la levenaleng kanimin diga reven tin to at levenmusaragu ap mo lemenemen kusu diba sev amer i. ²⁵Ketla ga at lara laxanimin luvuttadi no diga mumu asu ne Sol, diga lok ka i la diga suxa abeles i at laxaxi buso la diga lox asi i uto xopok at logo ga nemen to at lenep at langas uat diga rit kangkan mo lemenemen min.^a

Sol Ga Vot Pasa Luvuttadi Nuunu To Jerusalem

²⁶Sol ga vas bilong uto Jerusalem la ni gak lok tong pen i do ni na gugu eburu mi limixin nuunu. Di goxo nuunu do neni mo laradi nuunu la diga e amarat teren. ²⁷Melemu ne Banabas ga lok tooro i la ga lam ka i uto saparap luvuttadi vavang. Ni ga soxomus ba i ridi do ne Sol ga ven Leeme Silok to at langa la Leeme Silok ga paase rin. Ni ga tong box i ridi do ne Sol ga vavang mi laasen at ne Iesu ro Damasko la kopmen goxo marat. ²⁸Kuren la ne Sol ga nemen eburu minedi la gat pas uto at lengkot axap Jerusalem, la ni ga vavang lolos mi laasen at Leeme Silok la kopmen goxo marat. Goxopmen tara ga ru pe lugugu ren. ²⁹Ni eburu minedi limixin me Judaia mo diga paase Grik diga etep mi levelinga, ketla diga lok tong pen i do dina sev amer i. ³⁰Ketla limixin nuunu diga ronga i mo la diga lam ka ne Sol uto loxon at lemenemen Sisaria la diga lox aonon i uto Tasas.

³¹Kuren la luvuttadi nuunu at lengkot axap Judaia, Galili, la Samaria, diga ruuna limila la kopmen bok ba di goxo marat. La leexes at limixin nuunu ga urut; mila Loroonan Kaala ga gugu kantubu atdi, la diga lok ngangao aleng at Leeme Silok.

Pita Ga Nemen To Jopa La Lida

³²Pita ga vas tangtagap at lengkot axap saparap Jerusalem, la at lara laaleng ni gat pas kusu na ven limixin at ne Iesu no diga nemen to Lida. ³³Mo go ni ga ekip tangarang mi lara laradi, laasen teren ne Inias, labantuxu axap teren ga molo la ni goxo lox epovo i do na xatu kaxat at loora mikmidi ren at lavanuan maares axap. ³⁴Pita ga lok tin, “Inias. Iesu Karisito i lox aroo u. Katu kaxat la una sa avukat loora ram.” Ap mo

^a 9:25 Lentaba laraugu diga lox i ro mavana at larangas uat la diga ruuna larago lixilik uto maxamang at lemenemen silok.

mene loxonaleng Inias ga xatu kaxat upana. ³⁵Mo limixin diga nemen go Lida la Seron diga ven mo laradi ga lox avukat nga la buaang atnedi diga nuunu at Leeme Silok.

³⁶To Jopa lara latkin ga nemen, laasen teren ne Tabita; neni latkin nuunu. (Laasen bok teren at lavapaase Grik do ne Dokas). Ni ga raba axap lороoro ren kusu na lok tooro limixin pakpakes mi leven gugu nunuan. ³⁷At lara laaleng ni ga meres la ni ga met. Labantuxu ren diga gos i la diga vaxamdi li i ro xeneng at lara loogu ga nemen to vana.

³⁸Jopa xopmen goxo vaxalom boro Lida. La mo luvuttadi nuunu ro Jopa diga ronga i do ne Pita mo gak lok to Lida; kuren la diga riki legepu radi saparav i mi lavapaase keretna, “Soso mene u la unat pas uto Jopa.”

³⁹La ne Pita ga xatu kaxat la ga vas kaxat eburu midu. At loxonaleng neni ga rupot diga lam kaka i uto ap mo loogu mevana. Mo lempat naa diga ru bubua saparav i, digang teng la diga lox ase i mi lempanga singsiga la lenbantamon ne Dokas gak sox i ap mo levenaleng ni ga rooro ren.

⁴⁰Pita ga lox asu axap di ukamang ap mo loogu, la ga xis tiktikbu mi luvatgulom teren la ga sing; melemu ren, neni ga rem gili mu ne Tabita la ga lok, “Tabita, katu kaxat.” La ni ga valas luxatli ren la ga ven ne Pita la ga xis upana. ⁴¹Pita ga ranga axatu i mi lekngen. La ni ga ro bubua ka luvuttadi nuunu la lempat naa, la ga lox ase di mi ne Tabita mo gara roo xat pam. ⁴²Levelinga at na lavanga sangsangu ga rem epeseves at lengkot axap Jopa, la buaang limixin diga nuunu at Leeme Silok. ⁴³Pita ga nemen go Jopa at levenaleng buaang eburu mi laradi ga gugu lenbantuxu at levenbulumaxao laasen teren ne Simon.

Pita La Ne Konilias

10 ¹Lara laradi ga nemen to Sisaria laasen teren ne Konilias, neni laasesep at limixin esep boro Rom diga tong nedi do, “Limixin esep me Itali.” ²Konilias laradi ga lotu saparap ne Moroa; nedi axap diga nemen ap mo loogu ren diga lok ngangao at ne Moroa. Buaang lempanga neni ga lox i xusu ri lok tooro limixin pakpakes boro Judaia, la ni ga ngising amisik ne Moroa. ³At lara laaleng at lavantun konaleng ga ukantinao, neni ga ven lisilimet la keneng ap mo lisilimet teren neni ga ven axasep avukat laangelo at ne Moroa ga vubeles ukeneng at loogu ren la ga lok tin, “Konilias!”

⁴La ni ga ven tooro laangelo mi lanmarat la ni ga lok, “Lavanga salai mo, Leeme Silok?”

Laangelo ga lok, “Moroa ira siam ka vam levesingising taram la leven gugu nunuan taram, la ni ira doxoma vam u. ⁵La nanga una riki tuvuttadi uto Jopa kusu dina lam ka lara laradi, laasen tinotno ren ne Simon Pita. ⁶Neni loose i nemen to at loogu at laradi i gugu lempanga

singsiga mi lenbantuxu at levenbulumaxao, laasen teren ne Simon no i nemen saparap laras.”

⁷La nom laangelo at ne Moroa ga vas kaxat ta, la ne Konilias ga ro xaka luradi saksaxaruki ren eburu mi laradi esep, neni laradi ga mumu asu ne Moroa la neni bok ap mo limixin esep diga gugu tooro ne Konilias. ⁸La ne Konilias ga tong axasep di mi lavanga salai mo ga vot saparav i la ni ga riki di uto Jopa.

⁹Ap mo lara laaleng melemu at lavatpas atnedi diga vas auret to Jopa, la ga xanangking ne Pita ga eng urut uto vana at lavatlak gu xusu na lok lising. ¹⁰La ni ga roxo la ga vara i do na anan; luvuttadi ap mo loogu diga lox agagas li vam mo leveluxa ketla neni ga ven lara lisilimet. ¹¹Neni ga ven laxalibet ga rem suang la neni ga ven lara lavanga ga si boro vana at laxalibet ga lok ngan lavattamon silok, mo lavanga ga ruuna lavanuet mesuluk la diga lox asi i uto xopok saparap ne Pita. ¹²Ma xeneng at nom labantamon silok buaang levenasen panga mi lavanuet kangkedek ga nemen eburu mi lempanga axap diga vokaxao mi lebelen di la levenasen pixa axap. ¹³La ni ga ronga laxaka at ne Moroa ga lok tin, “Pita, una xatu kaxat, la una sep ka na leveluxa la una anan i.”

¹⁴Ketla ne Pita ga lok, “Kopmen tinotno, Moroa. Nia xovisi a goxo anan tempanga xeretna mila i bilinga.”

¹⁵La ne Moroa ga lok bok tin keretna, “Nemen uta tong tempanga do i bilinga mila nenia ara lox adadat pam i.”

¹⁶La na lavatamon ga vot ga vantun la soso mun gamlong uto vana at laxalibet.

¹⁷Pita gam doma mu lavasuun ap mo lisilimet. La ap mo mun loxonaleng mo luvuttadi ne Konilias ga riki di, diga sue axasep ka loogu at ne Simon ga nemen ua; mo nga diga tu ro melamgo at lumusaragu ap mo loogu.

¹⁸Diga seega la diga sue, “Tara nade laasen teren ne Simon Pita?”

¹⁹Pita move gam doma i do ni naklen tinotno lavasuun at mo lisilimet, la Loroonan Kaala ga lok tin, “Una ronga i na. Lavantun luvuttadi no di vara epaase minu. ²⁰Una xatu la una vas si ukopok, la nemen uta doma solo ri emu minedi, mila nenia a riki nedi ude.”

²¹La ne Pita ga vas si ukopok kusu na ven mo luvuttadi. La neni ga lok tidi, “Nenia laradi nemi mi reven tin. Tila nemi mi vot de?”

²²Diga lok tin, “Laasesep at luvuttadi esep, ne Konilias i riki nema. Neni lagale laradi la ni i lotu saparap ne Moroa la limixin me Judaia di lok ngangao aleng teren. Laangelo at ne Moroa ga tong i rin do ni ba lam ka u uto at loogu ren, kusu neni naba ronga levelinga nu ba vaase i min.”

²³Pita ga xup abeles di ukeneng la ga tong i rinedi do dina nemen be go ap mo laxanimin.

Ap mo laaleng melemu Pita ga gagas, la ni ga emu minedi; la lentaba luvuttadi nuunu bok boro Jopa diga emu eburu min. ²⁴Ap mo laaleng

melemu ni ga rupot to Sisaria. La ne Konilias ga nemen tangais i eburu mi lentaba ren la larapen tangas avukat teren no ni ga xup kaka nedi. ²⁵At loxonaleng ne Pita ga lok do na beles ukeneng at loogu at ne Konilias, Konilias ga vas tangarang i, la ga xis tiktikbu mi luvatgulom teren to melango at ne Pita. ²⁶Ketla ne Pita ga ranga axatu i la ga lok, “Una xatu kaxat upana, mila nenia mun laradi xuren.”

²⁷Pita ga epaase mi ne Konilias at loxonaleng ni ga beles la ni ga vosiga buaang nedi limixin go xeneng. ²⁸Ni ga lok tidi, “Nemi xa mi xasep do lotu me Judaia kopmen dina mulus do tara atnama nak lox eburu la na etangas minedi limixin kopmen di me Judaia. Ketla ne Moroa ga lox ase ia do nia a noxo tong taradi do i bilinga at lemeren ne Moroa. ²⁹Kuren la ap mo laaleng uga xup mu ria la nia nga na ara rupot; la nia a goxo ronga xepe u. A sue nga u na, tila nenu uga xup mu ria?”

³⁰Konilias ga lok, “At lavanuet aleng gara xap pam at lavantun konaleng ga ukantinao i epovo mi loxonaleng keretna, nia aga ngising to xeneng at loogu rak. La soso mun lara laradi ga siga labantamon gamgames ga ru ro melango rak. ³¹La ni ga lok, ‘Konilias! Moroa ira ronga vam levesingising taram, la ni ira doxoma vam leven gugu loklok tooro ram. ³²Una riki tentaba uto Jopa ri lam kaka lara laradi laasen teren ne Simon Pita. Neni loose i nemen eburu mi laradi i gugu lempanga singsiga mi lenbantuxu at lenbulumaxao, laasen teren ne Simon, no i nemen saparap laras.’ ³³Kuren la nenia aga riki soso luvuttadi gugu rak ap mo mun loxonaleng kusu dina lam kaka u, la i lox avukat dola ura vot pasa ia. Nanga nema mak lok at lemeren ne Moroa, ma ngangais kusu mana ronga levelinga mo ne Moroa ga tong pam i ru do uba vaase i rinama.”

Pita Ga Vavang Ti Ne Konilias Eburu Mi Limixin Teren

³⁴Pita ga vaase kaxat la ga lok, “Anaa, nia a ven kibis i do i ruturun tinotno do ne Moroa kopmen na ven kepe lentaba vetpes, i ven limixin axap ngan legesara mun. ³⁵Do tara i lok ngangao ren la ik lok lempanga ik mokso, ne Moroa naba siam kaka i, keke i do neni at lubangmixin petpes. ³⁶Nemi miklen Lagale Lavavang neni ga song araba limixin me Israel min; na Lagale Lavavang i lok lumulum kantubu at ne Moroa la limixin mumu lanmet at ne Iesu Karisito, neni Leeme Silok at limixin axap at na lavatbung menemen kopok. ³⁷Nemi miklen leretere ri lempanga silok ne Iesu ga lox i at lengkot axap at na lenep silok Judaia. Ni ga ru ka i ro Galili, melemu at ne Jon ga vavang mi lesepsusu ren. ³⁸Nemi miklen i do ne Iesu me Nasaret, ne Moroa ga lox anarong i mi Loroonan Kaala la ga raba box i mi lolos teren. Ni gat pas at lengkot axap la ga lok lempanga nunuan la ga lox aroo nedi bok ne Satan ga xoxo di, mila ne Moroa ga nemen eburu min.

³⁹Nema na maga reven mo lempanga neni ga lox i ro at lenep Judaia la Jerusalem. Diga vaxarem i at laxaba la ni ga met. ⁴⁰Ketla ne Moroa ga lox arooro amlong i basinge lanmet at laaleng sepsev avantun, la ga lox i xusu na ru asuvos, ⁴¹kopmen do ti limixin axap, ketla tinama xusuk mun, luvuttadi ne Moroa ga soxolik ka vam nama kusu ri vaase asu levelinga ren. Maga anan la maga inin eburu min melemu at laxakatu kaxat amlong teren. ⁴²La ni ga tong alolos i rinama do mana paase asu Lagale Lavavang tinedi limixin la mana tong asu i do neni mun laradi ne Moroa ga soxolik ka i xusu neni naba ronga linga atnedi di rooro la nedi digara met pam. ⁴³Nedi axap, lavaeme vapaase alii diga paase mumu vam i, diga tong alii i do tara i nuunu ren, nom laxakapmek teren, ne Moroa naba doxoma xepe i xeneng at laasen teren.”

Limixin Kopmen Di Me Judaia Diga Ruuna Ka Loroonan Kaala

⁴⁴Pita move ga paase la Loroonan Kaala ga vubeles atnedi nom, mo digat kis la digang tonga levelinga ren. ⁴⁵Luvuttadi nuunu at limixin me Judaia, no diga vas kaxat eburu mi ne Pita boro Jopa, diga rakdu aleng mila ne Moroa ga riki asi Loroonan Kaala ren saparap nedi limixin kopmen di me Judaia. ⁴⁶Diga ronga nedi diga epaase mi lempapaase vetpes la diga emi asu mi ne Moroa.

Pita ga lok, ⁴⁷“Na limixin dia ruuna ka vam Loroonan Kaala kerekngan pam nedik taga ruuna ka i. Ixo epovo do tara na sep pepe di, do di noxo lok ka lesepe susu mi ladan.” ⁴⁸Kuren la ni ga tong i ridi xusu dina lok ka lesepe susu xeneng at laasen at ne Iesu Karisito. Melemu diga sue i do ni na nemen eburu minedi at tentaba tevenaleng.

Pita Ga Vaase Asu Lugugu Ren To Jerusalem

11 ¹Luvuttadi vavang la luvuttadi nuunu at lengkot axap Judaia diga ronga i do limixin kopmen di me Judaia bok mo diga siam ka vam levelinga at ne Moroa. ²La ne Pita gamlong uto Jerusalem. La nedi limixin nuunu diga lok do ik mokso ri rivit kepe lengkontuxu, diga musak aleng ne Pita. ³Diga lok, “Nenu loose mun keneng at loogu atnedi limixin kopmen di me Judaia, kopmen dina rivit kepe lengkontuxu atnedi; la nenu uga anan eburu minedi.”

⁴La ne Pita ga tong axasep nedi mi mo lempanga ga ravasu. ⁵Ni ga lok keretna, “Nia aga ngising to Jopa la nia aga ven lisilimet; la aga ven lavanga ga si boro vana la ukopok, ga lok ngan lavattamon silok diga lox asi i boro vana at laxalibet ga ruuna lavanuet mesuluk; la ni ga los kis saparav ia. ⁶Nia aga ven avukat keneng teren la nia aga ven lempanga mi lavanuet kangkedek, limixin di lok tatao nedi la lentaba kopmen limixin dina lok tatao nedi, la lempanga axap di vokaxao mi lebelen di la levenasen pixa axap. ⁷La nia aga ronga laxaka at ne Moroa ga lok tia xeretna, ‘Pita, una xatu upana, una sep di la una anan i.’

⁸Ketla nia aga lok, ‘Kopmen tinotno, Moroa. Nenia a goxovisi an tepempanga i bilinga.’

⁹La ne Moroa ga vaase manga ria boro vana at laxalibet keretna, ‘Nemen uta tong tavanga do i bilinga, mila nenia ara lok pam do i lox avukat.’ ¹⁰Na lavanga ga ravasi ga vantun, la melemu nom lempanga axap garamlong bok nga uto vana at laxalibet.

¹¹Ap mo mene loxonaleng lavantun luvuttadi diga rupot boro Sisaria; nedi diga rupot ap mo loogu nenia aga nemen teren. ¹²La Loroonan Kaala ga tong i ria xusu anat pas eburu midi uto Sisaria la nemen nia ta doma solo i. La nedi na lavanna luvuttadi nuunu boro Jopa, nedi diga emu eburu minia uto Sisaria; la nema axap maga beles ukeneng at loogu at ne Konilias. ¹³Ni ga tong i rinama do ni ga ven laangelo ga tu ro xeneng at loogu ren la ga lok tin keretna, ‘Una riki tentaba uto Jopa kusu dina lam kaka lara laradi, laasen tinotno ren ne Simon Pita. ¹⁴Ni ba vaase tevelinga ru la nenu minedi axap na di nemen at loogu ram miba roo suu.’

¹⁵La nia aga vaxaru xaka i do ana vaase, la Loroonan Kaala ga vubeles atnedi getgesara kerekngan ap mo laaleng Loroonan Kaala ga beles atdik. ¹⁶La nia aga doxomangke at levelinga at Leeme Silok ga lok keretna, ‘Jon ga sep susu limixin mi ladan mene, ketla nemi miba lok ka lesepe susu at Loroonan Kaala.’ ¹⁷I xasep do ne Moroa ga raba limixin kopmen di me Judaia mi Loroonan Kaala, kerekngan ni ga raba nedik min; nedik taga lok ka lороoro maxat at ne Iesu Karisito. Nenia nege la ana lok tong pen i do ana lok pe lugugu at ne Moroa.”

¹⁸Diga rongga i na la lodoxoma atdi ga lok mulus la diga emi asu mi ne Moroa. Diga lok, “Moroa ira suang pam langas ti lороoro xusu limixin kopmen di me Judaia, dina leeng basinge laxakapmek atnedi la dina ruuna ka lороoro maxat.”

Luvuttadi Nuunu At Ne Iesu Diga Rupot To Antiok

¹⁹Buaang nedi luvuttadi nuunu diga epeseves uto at levengkot Judaia la at lengkot petpes bok mumu levesongsongot limixin kakapmek diga ru ka i at loxonaleng diga sev amet ne Stiven. Lentaba atnedi digat pas upaxalom uto Pinisia la Saipras la Antiok, diga tong asu Lagale Lavavang at ne Iesu ti leme Judaia kusuk la kopmen ti levenabung mixin petpes. ²⁰Ketla lentaba luvuttadi nuunu boro Saipras la Sairini, digat pas uto Antiok la diga vavang go ri limixin kopmen di me Judaia; diga tong asu Lagale Lavavang at Leeme Silok ne Iesu. ²¹La Leeme Silok ga lox alolos nedi la buaang nedi limixin diga nuunu la diga leeng basinge laxakapmek atdi la diga raba lороoro atdi ri Leeme Silok.

²²Levelinga mumu i na lavanga ga rupot ti limixin nuunu ro Jerusalem; kuren la diga riki ne Banabas uto Antiok. ²³Ni ga rupot la

ni ga ven i do ne Moroa ga lox aumsu mo limixin mi letaba nabalamu ren. Ni ga lok momo la ga vaase lolos tinedi axap kusu dina tu lolos mi lunuunu la luruturun atnedi saparap Leeme Silok mi lodoxoma atdi axap. ²⁴Banabas ga lok tooro di mila neni lagale laradi ga umsu mi Loroonan Kaala la lunuunu ren ga lolos. La buaang nedi limixin me Antiok diga raba lorooro atnedi ri Leeme Silok.

²⁵Melemu ne Banabas gat pas uto Tasas kusu na ven ti ne Sol. ²⁶La ne Banabas ga vosiga i la ni ga lam kaka i uto Antiok. At legesa maares kudun nedu dugat pot eburu minedi buaang limixin ap mo loxot la duga anasa di. Mo go mun Antiok limixin nuunu diga lok ka avot na laasen Kristen.

²⁷Ap mo levenaleng lentaba lavaeme vapaase alii diga vas kaxat boro Jerusalem la diga rupot to Antiok. ²⁸Lara atnedi ne Agabas ga xatu upana la at lololos at Loroonan Kaala ga vaase alii do lean kangking naba rupot at lavatbung menemen axap. Ga vot ap mo levenaleng ne Kolodias gam gomgo ri limixin me Rom. ²⁹Limixin nuunu boro Antiok diga vaase i do dina lok tooro limixin nuunu ro Judaia. Nedi diga ruuna lempilas buaang, diga raba i. ³⁰Diga lox i xuren la diga lox aonon lempilas at lukngen ne Banabas mi ne Sol, kusu duba raba luvuttadi gomgo at lotu min, go Jerusalem.

Levesongsongot Ga Vot Manga Saparap Limixin Nuunu

12 ¹Ap mo levenaleng loorong silok, ne Erodes ga ranga alis lentaba atnedi luvuttadi diga nuunu at ne Iesu la ga lok li di at loogu xokoxo. ²Neni ga ra korop laxaka at ne Jems, neton ne Jon mi lavarise sepsep. ³La ni ga ven i do na laniu ga lox amomo luvuttadi amgomgo at leme Judaia, kuren la ni ga ranga alis bok ne Pita la ga lok li i at loogu xokoxo. Na ga ravasu at levenaleng limixin me Judaia diga lok laanan at loxongkide diga ove vetpes i. ⁴Melemu at larangtanga alis at ne Pita diga lok li i ro at loogu xokoxo, mo go diga song araba lavanuet lara binam tadi esep, lavanuet at legesa binam kusu na lok tatao i. Erodes ga doxoma i do ni naba lok li i at lavapaase melemu ap mo laanan, laasen teren, Lovovolo Pe.

⁵Kuren la ne Pita ga nemen to xeneng at loogu xokoxo, ketla luvuttadi nuunu diga ngising amisik ne Moroa mi lorooro axap atnedi xusu ne Moroa na lok tooro i.

Laangelo Ga Soxomus Asu Ne Pita At Loxokoxo

⁶At laxanimin avot ap mo laaleng kusu ne Erodes na lok li ne Pita at lavapaase ro melamgo at limixin, Pita ga unga xantubu at luradi rutu mu. Ni goxo epovo na sixiro mila diga xoxo i mi luvarooos sen, la luvuttadi rutu mu mo digak lok at lumusaragu ap mo loogu xokoxo. ⁷Soso mun

laangelo at ne Moroa ga ru go, la laxasep ga soo to xeneng ap mo loxot. La laangelo ga sox aus ne Pita ro at laxavis teren la ga lok tin, “Soso mun! Katu kaxat!” La mo luvaroos sen ga subu basinge lukngen ne Pita.

⁸La laangelo ga lok, “Una sevut atmatkun labaane ram, la una xoxo li luvanga vatpas taram.” Pita ga lox i xuren la laangelo ga lok tin, “Una siga lavanga singsiga ram, la una mumu asu ia.” ⁹Pita ga mumu asu i uto xamang. Ni goxo xasep at levelinga ap mo laangelo; ni ga nua i do ni mo ga reven mun lapnobo. ¹⁰Duga vas polo lara loxot avot, mo luvuttadi rutu mu diga lok tatao i; la melemu duga volo loxot sepsev agepura; la melemu duga vot to at lumusaragu mi lemparoos sen teren no ga tu raba uto at lemenemen silok. Mo lumusaragu ga rem suang kaparang axa ridu, la duga vas su ukamang. Duga mu asu mo langas ap mo lemenemen la soso mun laangelo ga on basinge ne Pita.

¹¹La ne Pita ga ven kibis mo lavanga ga rupot saparav i la ga lok, “Na nia aklen ba i do i ruturun tinotno! Moroa i riki laangelo ren la ni ira lox asu ia at lolos at ne Erodes la basinge lempanga xakapmek leme Judaia di lok do na lox i ria.”

¹²Se ni ga ven kibis pam mo lavanga ga vot saparav i, la ni gat pas uto at loogu at ne Maria, nenen ne Jon Mak. Buaang limixin diga nemen go la diga ngising. ¹³Pita gapdipdi ro maxamang at lumusaragu la lara loolik asaxaruki, laasen teren ne Rodi ga vas kaxat kusu na vorang linga ren. ¹⁴Ni ga ronga xibis laxaka at ne Pita la ni ga lok momo aleng la ni ga sixit beles manga ukeneng, ketla ni xopmen goxo suang lumusaragu; la ni ga vaase axasev i do ne Pita mo ga tu xamang.

¹⁵La diga lok tin, “U baulang!” Ketla ni ga tong amisix i do mo levelinga ren i ruturun. Kuren la diga lok, “Laangelo ren mo.” ¹⁶Nedi move diga epaase la ne Pita garapdi amu bok. La diga suang mo lumusaragu la diga ven i la diga rakdu aleng. ¹⁷Ni ga sep makmak nedi xusu dinak lok pilo, la ni ga soxomus ba i ridi do ne Moroa ga lox asu i boro at loogu xokoxo kereva. Ni ga lok, “Mina tong i na ri ne Jems la luvuttadi nuunu. La ni ga on basinge nedi la gat pas uto at lemenemen petpes.”

¹⁸Ga maxantamak luvuttadi rutu mu diga rangku aleng at lavanga salai mo ga rupot saparap ne Pita. ¹⁹Erodes ga raba linga di xusu dina ven tin, ketla di goxo long lenget kaka i. Kuren la ni ga lok li luvuttadi rutu mu at lavapaase la ni ga tong i ri luvuttadi esep do dina sev amet di.

Melemu at na, Erodes ga on basinge lenep Judaia la ga nemen at lentaba levenaleng to Sisaria.

Lanmet At Ne Erodes

²⁰Erodes ga musak aleng mi limixin boro Taia la Sidon; ketla mo limixin diga lok ka ne Balastas ti lok tooro nedi; neni laradi ga lok tatao

loogu at ne Erodes. Kuren la digat pas saparap ne Erodes keneng at legesa binam tadi. La diga vara aleng do na lok luburadong, mila ap mo loxot atnedi, digak lok kaka leveluxa atnedi boro at lenep teren.

²¹Diga lok katling pam lara laaleng at lixitkis buru atnedi, la ap mo laaleng ne Erodes ga sigaara mi lempanga singsiga nunuan teren; la gat kis to at loxonin orong teren, la ga lok lavapaase ri mo limixin. ²²Diga xup lolos keretna, “Kopmen laradi nom i paase, ketla lomoroa nom.” ²³Ap mo mene loxonaleng laangelo at ne Moroa ga sep ne Erodes mi lanmeres, neni goxo lok ngangao at ne Moroa. Laxangkolon ga anan labantuxu ren la ga met ta.

²⁴Ketla levelinga at ne Moroa ga epeseves uto at lengkot axap la buaang limixin diga nuunu ren.

²⁵Banabas mi ne Sol duga lox axap lugugu atdu, la dugamlong uto Jerusalem; duga lok kaka ne Jon Mak eburu midu.

Diga Sok Katling Ne Banabas Mi Ne Sol

13 ¹At loogu lotu go Antiok lentaba lavaeme vapaase alii la lentaba luvuttadi loklox ase mo gak lok; Banabas, Simion (diga tong box i do laradi bibi), Lusias (boro Sairini), Manaen (mo nedu mi laradi gomgo ne Erodes duga etangas eburu), la ne Sol. ²At lara laaleng nedi diga lotu saparap Leeme Silok la diga mun anan, Loroonan Kaala ga lok tinedi, “Mina raba ia mi ne Banabas la ne Sol, kusu ri lok lugugu i ngan nia aga soxolik ka vam du rin.” ³La diga mun anan la diga ngising, la diga lok li levengikikngen di mavana atdu; la diga riki aonon ba du.

Banabas Mi Ne Sol To Saipras

⁴Loroonan Kaala ga riki ne Banabas mi ne Sol, la dugat pas uto Selusia la mo go duga los urut at lavattaaxup la duga mumu i uto at losoxan Saipras. ⁵Duga rupot go Salamis, la duga tong asu levelinga at ne Moroa go at laraugu singising at limixin me Judaia. Jon Mak gak lox eburu minedu kusu ri lok tooro du at lugugu.

⁶Diga vas kaxat basinge mo lemenemen la digat pas tangtagap ap mo losoxan axap, se diga rupot to Papos. Mo go diga ekip tangarang mi lara laradi laasen teren ne Ba-Iesu, ni laradi me Judaia la gakleklen lasak; ni ga xarang limixin do neni leeme vapaase alii at ne Moroa. ⁷Neni ga gugu ri laradi gomgo ap mo losoxan laasen teren ne Segias Paulus, ni laradi ga umsu mi lakleklen. Laradi gomgo ga ro xaka ne Banabas mi ne Sol uto saparav i, mila neni ga vara i do na ronga levelinga at ne Moroa. ⁸Ketla ne Ba-Iesu ga lolos kusu na ru pe levelinga atdu; laasen bok ap mo laradi sak ne Elimas (na laasen at lavapaase Grik). Ni ga lok tong pen i do na ru pe laradi gomgo xusu noxo nuunu at ne Iesu.

⁹La ne Sol, laasen bok teren ne Pol, ga umsu mi Loroonan Kaala, ni ga saga xatli ap mo laradi sak, ¹⁰la ga lok tin, “Nu lamdak at ne Satan! Nenu

u xopara ri leveloklox axap i lox avukat; buaang lempanga xaxarang la laxakapmek i umsu at lorooro ram. Nenu uk lox amisik do una baba gili levenanasa ruturun at Leeme Silok ne Moroa ri laxaxarang! ¹¹Monga lololos at Leeme Silok ne Moroa na rupot saparap u; luxatli ram na main. La nenu u noxo ven laxasep at laaleng kangking at lentaba levenaleng.”

Ap mo mun loxonaleng Elimas ga suma lamain ga lok pe luxatli ren, la ni gat pas tangtagap, gak lok tong pen i do na vuse ka tara xusu na ranga tu at lekngen la nam lam i.

¹²Laradi gomgo ga ven mo lavanga la ga nuunu; ni ga sangu ap mo levenanasa ni ga ronga i mumu Leeme Silok.

Banabas Mi Ne Pol Duga Rupot To Antiok

¹³Pol eburu mi larapen tangas teren diga mu lavattaaxup boro Papos la diga rupot to Pega at lenep silok Pampilia. Ketla ne Jon Mak ga on basinge du go, la gamlong uto Jerusalem. ¹⁴Duga vas kaxat boro Pega la diga rupot to Antiok at lenep silok Pisidia; la at laaleng kaala diga beles uto at loogu singising la diga xis kopok. ¹⁵Melemu at leexes at Lenavolo at ne Moses la levelinga at lavaeme vapaase alii, luvuttadi amgomgo at loogu singising diga lok tidu, “Lunetak, ma vara i do muna vaase ri limixin do nemu mu ruuna tevelinga loklox alolos tinedi.”

¹⁶Pol ga xatu kaxat upana, la ga sep makmak di, la ga lok keretna, “Luvuttadi me Israel la nemi bok kopmen me Judaia mi lotu saparap ne Moroa. Mina ronga ia. ¹⁷Moraa at lubangmixin me Israel ga soxolik ka lavalabat atdik, la ga lox asilok lubangmixin atdik at levenmaares nedi diga nemen ngan limixin kadiong to at lenep silok Isip. Moroa ga lox asu di mi lolos silok teren basinge mo lenep silok. ¹⁸La ga at lavanuet sangaun maares ni gak lok tatao di ro at lamatbin. ¹⁹La ni ga nemen eburu minedi la diga sak tup mi lavanuti larabung mixin go ap mo lenep silok Kanan, la ni ga raba di mi mo lenep silok ngan laramtaba atdi. ²⁰Mo lempanga ga ravasu at levenmaares ga epovo at lavanuet sangaun kobot mi lavalimo sangaun (450).

Melemu at na, ni ga lok katling li luvuttadi ngan luvuttadi rongtonga linga kusu dinabam gomgo ridi, se at lovotpot at leeme vapaase alii ne Samuel. ²¹La melemu diga sing ti toorong silok la ne Moroa ga lok taba di mi ne Sol, lamdak at ne Kis, at libibinat at ne Benjamin, kusu neni loorong silok tinedi at lavanuet sangaun maares. ²²Melemu at loklok pes teren, Moroa ga soxolik ka ne Devit kusu nam gomgo ridi. Ana levelinga at ne Moroa ga paase mumu na ne Devit min,

‘Nia ara ven i do ne Devit nitna ne Jesi, neni laradi ik lox amomo ia; neni laradi naba lok lempanga axap do nia ana vara i do ni na lox i.’ *1 Sml 13:14*
²³Keneng at lurubuno avolo mun at ne Devit, Moroa ga riki ne Iesu saparap leme Israel ngan Laradi Loklox Arooro ridi la kerepmo ne Moroa

ga lox epovo laxakaape ren. ²⁴Avot ti lovtopot at ne Iesu, Jon ga vavang ti limixin solo xusu dina leeng basinge laxakapmek atnedi la dina lok ka lesepe susu. ²⁵La ga auret do ne Jon na lox axap mo lugugu ren, la ni ga lok ti limixin keretna, ‘Nemi mi doma i do nia nege? Nia xopmen mo laradi mi nemen tangais i. Ketla neni mo naba vot melemu rak, i silok aleng la axo epovo xusu ana soxomus asu luvanga vatpas at luxangkedek teren.’

²⁶Luvutnetak mi luvurinuk. Ana tong na levelinga rinemi. Moroa ga riki ne Iesu ri livipisik li at ne Abaram, la tinemi bok kopmen me Judaia mi nemen de mo mi lotu saparap ne Moroa. Ni ga raba nedik mi na Lagale Lavavang ti lorooro avolo! ²⁷Mo limixin diga nemen to Jerusalem, la luvuttadi amgomgo atdi, di goxo ven kibis ne Iesu, la di goxo xasep at levelinga ro xeneng at levenbuk at lavaeme vapaase alii no diga vutus i at levenaleng kaala. Ketla diga lox asorun levelinga at lavaeme vapaase alii, mila diga sok tixirixes ne Iesu. ²⁸La nedi xopmen di goxo vuse ka tavasuun kusu dina sev amet ne Iesu, diga sing mun ne Paelat kusu na sev amer i. ²⁹La melemu at lempanga axap diga lox i rin, kerekngan Lovoang Kaala i tong i, diga lox asi i ukopok basinge laxaba, la diga li i ro at lamaaut. ³⁰Ketla ne Moroa ga lox aroo kaxat amlong i basinge lanmet, ³¹la buaang levenaleng neni ga ru asuvos tinedi digat pas eburu min boro Galili la uto Jerusalem. La nedi nom di tong asu levelinga ren ti limixin me Israel.

³²La nema na, ma tong na levelinga rinimi do ne Moroa ga lox epovo vam laxakaape ren ti lavalabat atdik. ³³La mo laxakaape ira sorun pam tinedik luvuttubuno avolo atnedi limixin me Israel keretna; Moroa ga lox aroo amlong ne Iesu basinge lanmet. I lok ngan mo levelinga ik lok at levempikpixon sepsev agepura at ne Devit. Moroa ga lok keretna,

‘Nenu ne Nuruk la Lanarong, lingina a lox u, i ngan Loorong Silok.’

Sam 2:7

³⁴La ne Moroa ga paase mumu laxakatu kaxat amlong at ne Iesu basinge lanmet, la kopmen bok ba noxo met. Ni ga lok keretna,

‘Nia aba raba ruturun u mi leveloklox anarong tarak kerekngan nia aga xaape min ti ne Devit.’

Ais 55:3

³⁵La kerepmo bok levelinga at ne Devit saparap ne Moroa i lok keretna;

‘Nu noxo ke xepe Leeme Dadat taram kusu napso at lamaaut!’ *Sam 16:10*

³⁶Devit gam tebeng lugugu at ne Moroa ap mo levenaleng teren, la melemu ni ga met, la digak mir i saparap lavalabat teren, la ni gap sopso.

³⁷Ketla nom laradi ne Moroa ga lox aroo amlong i basinge lanmet, ni goxopso. ³⁸Luvutnetak mi luvurinuk. Nemi axap, minaklen avukar i do, keneng mun at ne Iesu, langas i rem suang kusu ne Moroa naba doxoma xepe laxakapmek at limixin. Monga ma tong asu na levelinga rinimi.

³⁹Minaklen box i do nedi axap di nuunu ren, Moroa ira lox asepmus pam

di basinge leveloklok kakapmek atdi; Lenavolo at ne Moses kopmen na epovo na lox i xuren. ⁴⁰Mina lok tatao avukat nimi, mumu levelinga at lavaeme vapaase alii, i lok keretna;

⁴¹‘Nemi limixin mik lok kalise levelinga at ne Moroa, mina ronga i na; miba sangu la mina met! Nia anaba lok lara lugugu at levenaleng atnimi, ketla nemi xopmen mi noxo nuunu ren; la do tara na soxomus box i rinimi, move mi noxo nuunu ren.’ *Abk 1:5*

⁴²La ne Pol mi ne Banabas duga vas su basinge loogu singising, la limixin diga sing bok du do dubamlong ap mo lara laaleng kaala melemu, la duna vaase bok mo levelinga rinedi. ⁴³Melemu at limixin diga on basinge loogu singising, buang atnedi limixin me Judaia la nedo bok kopmen di me Judaia, mo diga lok ka vam lotu at limixin me Judaia, diga mumu asu ne Pol mi ne Banabas; duga paase ridi la duga lox alolos di xusu dina nemen keneng at letaba nabalamu at ne Moroa.

⁴⁴Ap mo laaleng kaala melemu nedo axap ap mo lemenemen digat pas kusu dina ronga levelinga at ne Moroa. ⁴⁵Ketla lentaba limixin me Judaia diga ven i, la diga umsu mi levereven peves; diga paase tangarang mo levelinga ne Pol ga tong i, la diga paase xapmek tin.

⁴⁶Ketla ne Pol mi ne Banabas duga paase lolos aleng la kopmen du goxo marat. Duga lok keretna, “Ik mokso at lemeren ne Moroa do mana tong avot be levelinga at ne Moroa rinemi limixin me Judaia. Ketla nemi mi xopara rin, la kerepmo xopmen mina epovo ri ruuna ka lorooro avolo; mana ke xepe nimi la mana tong asu levelinga at ne Moroa ri limixin kopmen di me Judaia. ⁴⁷I lok ngan levelinga at ne Moroa ga raba dik min. I lok keretna;

‘La nia ara soxolik ka vam nimi, kusu nemi miba lok ngan laxasep la miba tong asu levelinga rak tinedi limixin kopmen di me Judaia, la miba lok ngan langas ti lorooro ri limixin to at lengkot axap at na lavatbung menemen.’ *Ais 49:6*

⁴⁸Mo limixin kopmen di me Judaia diga ronga i na la diga lok momo aleng, la diga emi asu mi Leeme Silok ne Moroa, mumu levelinga ren; la nedo ne Moroa ga soxolik ka vam di ri lorooro avolo, diga nuunu at ne Iesu.

⁴⁹Levelinga at ne Moroa ga epeseves at lengkot axap ap mo lenep silok. ⁵⁰Ketla limixin me Judaia diga lox axatu kaxat lodoxoma at luvuttadi amgomgo ap mo lemenemen silok la diga lox axatu lodoxoma at lavakin diga ruuna levenasen silok la diga lotu saparap ne Moroa. Diga vaxaru kaxat leedak ti ne Pol mi ne Banabas, la diga lok kepe du basinge lenep silok atdi. ⁵¹La luradi vavang duga lok kepe laxakup basinge lengkangkedek atdu saparap nedo xusu duna lox asu lumukmusak at ne Moroa ridi; la dugat pas uto Aikoniam. ⁵²Luvuttadi nuunu mego Antiok diga umsu mi Loroonan Kaala la lomomo bok.

Pol Mi Ne Banabas Duga Vavang To Aikoniam

14 ¹Pol mi ne Banabas duga lok mun lugugu ro Aikoniam kerekngan diga lox i ro Antiok. Duga beles to at loogu singising at limixin me Judaia la duga vavang avukat tinotno; kuren la buaang nedi limixin me Judaia eburu mi limixin bok kopmen di me Judaia diga nuunu. ²Ketla lentaba limixin me Judaia no di goxo nuunu, diga lox axatu lodoxoma at lentaba limixin kopmen di me Judaia la diga vaase pe lusumsuma atnedi basinge luradi nuunu. ³Pol mi ne Banabas duga nemen go at lentaba leven gaaling. Du goxo marat la duga paase lolos atla Leeme Silok ga lok tooro levelinga atdu mumu letaba nabalamu mila ni ga lok lempanga sangsangu at levengkikngen du. ⁴Nedi mo limixin ap mo lemenemen diga epes nedi, lentaba ri leme Judaia la lentaba ri luradi vavang.

⁵Melemu mo limixin kopmen di me Judaia la limixin me Judaia eburu mi luvuttadi amgomgo atdi, diga vaxaru kaxat kaka i xusu dina lok kapmek luradi vavang la dina lu amet du mi laxanuat. ⁶⁻⁷Ketla luradi vavang duga ronga i na la duga sixiro uto at lenep Likonia. Mo go duga vavang mi Lagale Lavavang to at lumenemen Listra la Debi, la to at lengkot petpes bok ap mo lenep.

Pol Mi Ne Banabas Duga Vavang To Listra La Debi

⁸Lara laradi ga nemen to Listra, luxangkedek teren ga molo axap, ni ga molo kaxat at laaleng nenen ga visik asu xa i xuren; la ni goxo epovo do nat pas. ⁹Gat kis go la gang tonga levelinga at ne Pol. Pol ga saga xatli ren la ga ven kibis i do mo laradi ga nuunu do ne Moroa ga epovo ri lox aroo i. ¹⁰La ni ga vaase lolos tin keretna, “Katu kaxat upana mi luxangkedek taram.” La soso mun mo laradi ga xatu kaxat upana la gat pas tangtagap.

¹¹Nedi mo limixin diga ven i, la di ga vaxaru kaka i do dina xup at lavapaase Likonia xeretna, “Na legepu radi du lok ngan ta levenmoroa, duga si ude xopok saparap nedik!” ¹²Diga raba ne Banabas mi lara laasen Sius, la ne Pol laasen Eemes, mila neni laradi vapaase. ¹³Lamaasa at lomoroa Sius, loogu laplavang teren ga nemen go maxamang ap mo lemenemen, ni ga lok ka leven bulumaxao eburu mi levesisinang uto at lumusaragu ap mo lemenemen. Ni eburu mi nom limixin diga vara i do dinaplavang mi teventamtaba saparap luradi vavang.

¹⁴Ketla Banabas mi ne Pol duga ronga i nom, la duga lolos kusu duna lok pe di. Kuren la duga ba koxorop lempanga singsiga atdu la duga sixit uto xantubu at limixin la duga xup keretna, ¹⁵“Nemi limixin, tila mi lox i na? Nema mun luradi, luradi xerekngan nimi! Nema na ma nemen de xusu mana tong asu Lagale Lavavang la mina ba gili lorooro atnimi basinge lempanga gamasa xerepmo. La mina mumu asu ne Moroa mo

i rooro, ga rudum li laxalibet, laxangka, laras la lempanga axap mo di nemen maxeneng atdi. ¹⁶Ganoxa ni ga mulus do limixin axap dina mumu xa lavavara atdi. ¹⁷Ketla neni i lox asuvos amisix i ap mo lempanga ni ga rudum li i; la im taba nimi mi larakabu boro vana at laxalibet, la ga lok katling levenaleng tik lok li bubua leveluxa at levenaleng axa ren. Ni im taba nemi mi leveluxa solo la ik suxa umsu lorooro atnimi mi lomomo.” ¹⁸Limixin diga lok do naplavang saporap du, la ga lolos aleng kusu luradi vavang duna lok pe di mi na levelinga.

¹⁹Lentaba limixin me Judaia diga la boro Antiok at lenep Pisidia la boro bok Aikoniam. La diga lox axatu kaxat lodoxoma at limixin me go Listra la diga lu ne Pol mi laxanuat, la diga sar asu i basinge mo lemenemen; diga nua i do ni mo ga met. ²⁰Ketla luvuttadi nuunu diga ru kangkan i, la ni ga xatu kaxat, la gamlong bok uto ap mo lemenemen. Ap mo laaleng melemu nedu mi ne Banabas dugat pas uto Debi.

Pol Mi Ne Banabas Dugamlong Uto Antiok

²¹Pol mi ne Banabas duga tong asu Lagale Lavavang to Debi, la duga lok ka buaang luvuttadi diga lok ka lunuunu maxat. Dugamlong bok uto Listra, la uto bok Aikoniam, la melemu dugat pas uto Antiok at lenep Pisidia. ²²Duga lox alolos lunuunu at luvuttadi nuunu, la duga vaase alolos di xusu dina tu tuxuruxun at lunuunu atnedi. Duga lok, “Nedik ataba ekip tangarang mi laxanmumuat solo, la kerepmo ataba beles at Linintoo at ne Moroa.” ²³At laraugu lotu getgesara luradi vavang duga sok katling loxongkulao silok ti lok tatao limixin; duga ngising la duga mun anan la duga lok li di maxopok at loklok tatao at Leeme Silok, mo diga nuunu ren. ²⁴La nedu duga vas kaxat la dugat pas kantubu at lenep silok Pisidia, duga rupot to at lenep silok Pampilia. ²⁵Duga vavang mi Lagale Lavavang to at lemenemen Pega, la melemu duga vas kaxat uto Atalia.

²⁶La duga los kas at lavattaaxup go Atalia la duga sen uto Antiok; ap mo lemenemen no limixin nuunu diga raba nedu maxopok at letaba nabalamu at ne Moroa ri lugugu mo duga lox axap pam i. ²⁷Duga rupot to Antiok la duga ro bubua limixin axap at lotu, la duga tong asu lempanga ne Moroa ga lox i at levengkikngen du; la duga tong i do ne Moroa ga suang langas ti limixin kopmen di me Judaia xusu dina nuunu. ²⁸La buaang leven gaaling duga nemen go eburu mi limixin nuunu.

Lovotpot Buru To Jerusalem

15 ¹Lentaba luvuttadi nuunu diga la boro Judaia uto Antiok la diga lok ti luvuttadi nuunu mego keretna, “Nemi xopmen mi noxo lok ka lorooro do xopmen mi noxo vit kepe lengkontuxu atnimi xerekngan Lenavolo at ne Moses i tong i.” ²Pol mi ne Banabas duga rongga i na la

duga vaase mukmusak aleng la duga etep mi levelinga minedi; kuren la limixin nuunu ro Antiok diga lok katling ne Pol mi ne Banabas la lentaba bok kusu dibat pas uto Jerusalem la dina vot pasa luvuttadi vavang la loxongkulao silok la dina paase mumu na lavanga. ³Luvuttadi lotu me go Antiok diga sak tiki nedi uto Jerusalem, la digat pas maxeneng at lengkot Pinisia la Samaria la diga tong asu i ri limixin nuunu go, do limixin kopmen di me Judaia, mo diga leeng la diga nuunu at ne Iesu; lavavang at na ga lox amomo buaang nedi luvuttadi nuunu. ⁴Se diga rupot to Jerusalem, limixin at lotu me go la luvuttadi vavang la loxongkulao silok diga seega rangarang di, la ne Pol mi ne Banabas duga tong mo lempanga ne Moroa ga lox i xantubu at lugugu at nedu.

⁵Ketla lentaba luvuttadi nuunu, nedi lubung Parisi diga xatu kaxat la diga vaase lolos keretna, “Nedi mo limixin kopmen di me Judaia dina rivit kepe lengkontuxu atnedi la ata tong box i ridi do dina mumu asu Lenavolo at ne Moses.”

⁶Luvuttadi vavang eburu mi loxongkulao silok diga vot eburu xusu dina paase mumu loklok ti rivit kepe lengkontuxu. ⁷Melemu at laxampapaase solo atdi ga xap, Pita ga xatu kaxat upana la ga lok, “Luvutnetak, mikleklen i do gano migomgo Moroa ga soxolik ka ia xantubu atnimi xusu ana tong asu Lagale Lavavang tinedi limixin kopmen di me Judaia kusu dina rongga i la dina nuunu ren. ⁸La ne Moroa no ikleklen luruptuvuk at limixin, ga lox asuusu i do ni ga siam ka limixin kopmen di me Judaia keretna; ni ga raba di mi Loroonan Kaala xerekngan ni ga raba dik min. ⁹Moraa ga lok legesa ngas mun ti lorooro rinedik limixin me Judaia la tinedi limixin kopmen di me Judaia; ni ga gos amaxat lebelen di mila diga nuunu ren. ¹⁰Kuren la nemen dik ta lok tong pen ne Moroa la nemen dik ta raba limixin nuunu mi na lumumuat ti rivit kepe lengkontuxu kusu dina lox epovo Lenavolo at ne Moses; mila no migo lavalabat atdik la nedik ta goxo epovo ri lox epovo na Lenavolo. ¹¹Nedik taga lok ka lorooro maxat keneng mun at letaba nabalamu at Leeme Silok ne Iesu, kerekngan bok nedi.”

¹²Nedi axap mo diga xis pilo at loxonaleng ne Banabas mi ne Pol duga tong asu lempanga sangsangu ne Moroa ga lox i at levengikngan du kantubu atnedi limixin kopmen di me Judaia. ¹³Melemu at lavapaase atdu, Jems ga lok keretna, “Luvutnetak, mina rongga ia! ¹⁴Ana vam ne Simon ira soxomus pam i do ganoxa ne Moroa ga lox asu labalamu ren saparap limixin kopmen di me Judaia la ga lok kaka lentaba atnedi xusu tin. ¹⁵Na levelinga rak i sixit epovo mi levelinga at lavaeme vapaase alii, lara atdi ga lok;

¹⁶‘Leeme Silok ga lok keretna. Melemu at na, anabamlong; la nia anaba vaxaru amlong bok loogu at ne Devit no ga subu. Anaba lok li amlong lengkot to ap mo loogu ga lok kapmek la ana vaxaru amlong box i. ¹⁷Nia

anaba lox i na xusu limixin kopmen di me Judaia bok diba puse ria; nedimo, nia ara ro ka vam di do atarak. ¹⁸Nenia, Leeme Silok atnimi, a tong i na la aba lok epovo na levelinga kerekngan aga tong li i gano migomgo.”

Amo 9:11-12

¹⁹Jems ga lok bok keretna, “At lodoxoma rak do nemen dik ta lox asoogong nedimo limixin kopmen me Judaia mo dit pas saparap ne Moroa. ²⁰Ketla ata malagan tevelinga ri vaase axasep nedimo do kopmen di noxo anan leveluxa no diaplavang pam min ti laxampoovo moroa; la dina ke loklok kakapmek maxamang at lixitkis epot, la di noxo anan lempanga mi lavanuet kangkedek no diga xur amer i la lada ren goxo sen su ukamang, la lempanga bok mi lada atnedi. ²¹La kerepmo diba lok ngangao at leme Judaia, no di utus lenavolo at ne Moses to xeneng at laraugu singising at levenaleng kaala ga ru ka i gano migomgo i se lingina; la mo levelinga ren dira vavang pam min at levenmenemen axap.”

Levelinga Ri Limixin Kopmen Di Me Judaia Di Nuunu

²²La luvuttadi vavang la loxongkulao silok eburu mi limixin axap at lotu, diga doma i do dina soxolik ka lentaba luvuttadi ap mo libinam tadi la dina sak tiki nedimo uto Antiok eburu mi ne Pol la ne Banabas. Diga soxolik ka ne Judas, laasen bok teren ne Basabas, la ne Sailas; nedu luradi silok kantubu at limixin nuunu. ²³Diga raba nedu mi mo lovoang ga lok keretna;

“Nema na luvuttadi vavang la loxongkulao silok, luvutneton nimi; ma lox aonon lomomo atnama rinemi limixin kopmen nemi me Judaia mo mi nemen to Antiok, Siria, la Silisia. ²⁴Maga ronga i do lentaba atnama digat pas udo saparap nimi, la diga lox ekarakat nimi la diga lox abulu nimi mumu loklok ti rivit kepe lengkontuxu; di xopmen di goxo lok ka tevelinga atnama xusu ri lox i mo. ²⁵Kuren la nema ma vot eburu la ma siam do mana soxolik ka teventaba tuvuttadi vapaase la mana riki nedimo udom tinemi. Dibat pas eburu mi larapen tangas atnama, ne Banabas mi ne Pol, ²⁶no duga raba lorooro atdu ri lugugu at Leeme Silok, ne Iesu Karisito; la kopmen du goxo marat at lanmet. ²⁷Ma riki bok nedu lura rinimi, ne Judas mi ne Sailas kusu duba vaase asu levelinga at lungusno atdu xerekngan nema ma malagan i. ²⁸Loroonan Kaala la nema mara siam pam do ma noxo lok li bok ba teventaangas mavana atnimi, ketla mina ronga res at na levelinga. ²⁹Mi noxo anan teveluxa no diraplavang pam min ti lempatpoovo moroa; mi noxo anan lempanga mi lada atnedi, mi noxo anan tempanga mi lavanuet kangkedek no diga xur amer i la lada ren kopmen goxo sen su, la mina ke loklok kakapmek

maxamang at lixitikis epot; naba lox avukat tinotno rinimi do mina ke xepe na lempanga. Atnimi bok be.”

³⁰Limixin lotu diga riki mo luvuttadi vapaase asu levelinga uto Antiok. Diga rupot la diga ro bubua ka mo axap limixin nuunu la diga raba nedi mi levelinga loklox axasep keneng ap mo lovoang. ³¹Limixin diga utus i mo levelinga, la diga umsu mi lomomo ti mo levelinga loklox alolos.

³²Judas la ne Sailas, nedu vam luradi vapaase alii, duga vaase abao aleng eburu mi luvuttadi nuunu, la duga lox alolos nedi. ³³Melemu at lentaba levenaleng mo go, diga lox aonon du mi lenmila atnedi mo luvuttadi nuunu; la dugamlong uto saparap nedi mo limixin no diga sak tiki avot be du. ³⁴[Ketla Sailas ga doxoma i do na nemen go.]

³⁵La ne Pol mi ne Banabas duga nemen go Antiok; nedu eburu mi lentaba buaang diga anasa limixin la diga vavang mi levelinga at Leeme Silok.

Pol Mi Ne Banabas Duga Epeseves

³⁶Lentaba levenaleng ga volo la ne Pol ga lok ti ne Banabas, “Atamlong la ata ven luvuttadi nuunu ro at levenmenemen axap no neda taga vavang mi levelinga at Leeme Silok e, la ataba ven i do nedi mo diak lok ta xereva.” ³⁷Banabas ga vara i do na lok ka ne Jon Mak eburu midu.

³⁸Ketla ne Pol ga doma i do goxo lox avukat do neni na emu eburu midu; mila gano ne Jon Mak goxo nemen eburu minedu ap mo lugugu, ketla ni gamlong kot mene atdu ro Pampilia. ³⁹Duga vaase lolos aleng mumu i na xantubu atnedu, la duga epeseves; Banabas ga lam kaka ne Mak la duga mu lavattaaxup uto Saipras. ⁴⁰Ketla ne Pol ga soxolik ka ne Sailas. La luvuttadi nuunu diga song araba ne Pol mi ne Sailas ti loklok tatao at Leeme Silok la duga vas kaxat. ⁴¹Dugat pas maxeneng at lunep silok Siria la Silisia, la duga lox alolos luvuttadi nuunu.

Timoti Ga Emu Eburu Mi Ne Pol La Ne Sailas

16 ¹Pol ga vas kaxat basinge mo lunep silok, la gat pas uto Debi la Listra. Lara laradi nuunu laasen teren ne Timoti ga nemen go Listra; nenen bok, ni latkin nuunu at lubangmixin me Judaia, ketla ne temen neni at lubangmixin me Grik. ²Luvuttadi nuunu ro Listra la Aikoniam diga tong i do ne Timoti neni laradi avukat. ³Pol ga vara i do ni na lok ka ne Timoti eburu min, kuren la ni ga vit kepe loxontuxu ren. Ni ga lox i na mila lentaba limixin me Judaia digak lok ap mo lemenemen, digaklen i do ne temen ne Timoti at limixin kopmen di me Judaia. ⁴Pol, la ne Sailas eburu mi ne Timoti digat pas kantubu ap mo laramenemen la diga tong asu mo leventaangas, luvuttadi vavang la loxongkulao silok diga tong li vam i ro Jerusalem; la ne Pol midi diga tong i ri limixin nuunu do dina mumu asu i. ⁵Kuren la limixin nuunu ap

mo lengkot ga su lolos at lunuunu atdi la leexes atnedi limixin nuunu ga uturut amisik keneng at levenaleng getgesara.

Pol Ga Ven Lisilimet To Troas

⁶Pol mi larapen tangas teren digat pas epolo maxeneng at lunep silok Pirigia la Galesia, mila Loroonan Kaala goxo siam do dina vaase asu Lagale Lavavang ap mo lenep Asia. ⁷Diga rupot to at lapdopdo at lenep Misia, la diga lok tong pen i do dina beles at lenep mogo Bitinia, ketla Loroonan at ne Iesu goxo siam do dina beles. ⁸Kuren la digat pas kantubu at lengkot Misia la diga rupot to Troas. ⁹Ap mo laxanimin Pol ga ven lisilimet la ni ga ven laradi boro Masadonia ga tu, la ga sing i, “Unat pas ude Masadonia la una lok tooro nama!” ¹⁰Melemu at ne Pol ga ven na lisilimet, soso mun nema maga gagas kusu manat pas uto Masadonia, mila magaklen i do Moroa ga ro ka vam nama kusu mana vaase asu Lagale Lavavang ti limixin me go.

Lidia Ga Ven Kibis Leeme Silok To Pilipai

¹¹Maga los kas at lavattaaxup la maga on basinge mo lemenemen Troas, la maga sen akmokso epolo uto Samoteres; la ap mo lara laaleng petpes melemu maga sen uto Neopolis. ¹²Maga vas kaxat mego uto Pilipai, lemenemen silok avot at lenep silok Masadonia; ni lemenemen buaang limixin boro Rom diga nemen go. Maga nemen ap mo lemenemen silok at lentaba levenaleng.

¹³At laaleng kaala maga vas kaxat basinge lemenemen silok uto at lisigege at ladan; maga nua i do toxot mo go at limixin me Judaia digat pot buru e la diga ngising. Maga xis kopok la maga paase ri lavakin mo diga rupot eburu go. ¹⁴Lara atdi mo digang tonga nama, laasen teren ne Lidia, neni boro Taiataira; neni ga sesep mi lempanga singsiga nunuan. Ni latkin ga lotu saparap ne Moroa; la Leeme Silok ga suang lebelen kusu ni na siam kaka mo lavapaase at ne Pol. ¹⁵Neni eburu minedi diga nemen min ap mo loogu ren diga lok ka lesepe susu; melemu ni ga xup kaka nama, “Ude nimi la mina nemen to at loogu rak, mo do nemi mi doxoma i do nenia latkin nuunu ruturun at Leeme Silok.” La ni ga vaase lolos tinama la maga beles.

Pol Mi Ne Sailas At Loogu Xokoxo To Pilipai

¹⁶At lara laaleng magat pas uto at loxot singising, maga ekip tangarang mi lara loolik, ni lasaxaruki la lagas ga nemen teren la ga lox epovo i do na paase alii umelamgo. La kerepmo ni ga lox asuusu laxampilas solo ri lamgomgo ren; mila ni ga tong levempanga salai naba rupot at levenaleng mo i tu migo ridi.

¹⁷Ni ga mumu asu nema mi ne Pol, la gap kup keretna, “Na luvuttadi nedi luvuttadi gugu at ne Moroa i silok aleng! Di tong asu langas at

lorooro rinimi!”¹⁸ La buaang levenaleng, ni ga lox i na; se ne Pol gara molo nga, la ni ga rem gili la ga lok ti mo lagas, “At laasen at ne Iesu Karisito, a tong i ru do una vas su basinge i!” Ap mo mene loxonaleng lagas ga on basinge i.

¹⁹Mo limixin digak lok tatao mo loolik diga ven i do langas atnedi rik lok ka pilas ga xap ta, diga ranga alis ne Pol mi ne Sailas la diga sat kaka du uto at luvuttadi gomgo at loxot tongtonga linga. ²⁰Duga ru ro melamgo at luvuttadi silok boro Rom. La nom limixin digak lok tatao mo loolik diga lok, “Na luradi nedu boro Judaia, la nedu du lok kaxat lekarakat de at lemenemen silok atdik. ²¹Duk lox ase limixin mi leveloklok no xopmen na epovo at loklok atdik; nedik at lubungmixin me Rom la ixo epovo do tana siam ka i la tana lok tong pen i.” ²²Buaang limixin diga beles ap mo leedak silok la diga ru buru mi limixin amgomgo la luvuttadi amgomgo diga lok kepe lempanga singsiga at ne Pol mi ne Sailas, la diga tong i ri limixin esep do dinabak pixis du mi lubuso. ²³Digak pixis aleng nedu mi lubuso la diga lok ka du uto at loogu xokoxo, la diga tong i ri mo laradi loklok tatao loogu xokoxo, kusu na lok pe avarang du la kopmen du noxo sixiro. ²⁴Laradi loklok tatao loogu xokoxo ga ronga na levelinga, la ni ga xoxo palaga lengkangkedek atdu kantubu at lempatkonuna mumuat. ²⁵At laxanimin tubu Pol mi ne Sailas duga lok lising la dugak pixan momo saparap ne Moroa, la lentaba luvuttadi bok mo diga xoxo nedi, digang tonga du. ²⁶La soso mun langsung langne silok ga vot la gak ma mo loogu xokoxo axap. Ap mo mene loxonaleng lumusaragu ga rem suang la lemparoos sen ga remus basinge nedi axap go xeneng at loogu xokoxo. ²⁷Laradi loklok tatao at loogu xokoxo ga rakdu tuang la ni ga ven i do laramusaragu ap mo loogu xokoxo ga rem suang axap pam, la ni ga nua i do limixin kokoxo digara sixiro vam; kuren la ni ga rev asu ka lavarise sepsep teren la ni ga lok do na bo bang amer i min. ²⁸Ketla ne Pol ga xup lolos keretna, “Nemen uta sev u! Nema axap na ma nemen.” ²⁹Laradi loklok tatao loogu xokoxo ga xup do ti tababao, ni ga sixit beles ukeneng, la ni ga xis tiktikbu mi luvatgulom teren la ga dede saparap lengkangkedek at ne Pol mi ne Sailas.

³⁰Ni ga lam asu du ukamang la ga lok, “Luave, ana lok lavanga salai xusu anaba lok ka lorooro maxat?”

³¹Duga lok, “Una nuunu at Leeme Silok ne Iesu, la nenu ba lok ka lorooro maxat, la nedi axap nom di nemen at loogu ram diba lok ka lorooro maxat.” ³²La duga tong Lagale Lavavang at Leeme Silok tin la tinedi bok mo diga nemen ap mo loogu ren. ³³Ap mo mene laaleng at laxanimin laradi loklok tatao loogu xokoxo ga sat kaka du la ga gos levenin kooxing atdu; la neni eburu minedi diga nemen at loogu ren diga lok ka lesep susu ap mo mene loxonaleng. ³⁴Ni ga lok ka ne Pol mi ne

Sailas uto at loogu ren la ga raba nedu mi leveluxa ri anan. Neni eburu minedi diga nemen at loogu ren diga umsu mi lomomo, mila diga nuunu ba at ne Moroa.

³⁵Ga maxantamak luvuttadi amgomgo diga sak tiki lavasaxaruki mi levelinga xeretna, “Mina soxomus asu du nom luradi uto.” ³⁶Kuren la laradi loklok tatao at loogu xokoxo ga tong i ri ne Pol, “Luvuttadi amgomgo di lox aonon levelinga rinumu mi ne Sailas kusu mana soxomus asu numu. Muna onon ta, la munat pas keneng at lenmila.”

³⁷Ketla Pol ga lok ti mo lavasaxaruki xeretna, “Di goxo vuse ka taxakapmek maxeneng atnama’; diga vixis nema’ at lemeren limixin, la kopmen nak mokso, mila nema’ na lunat boro Rom. Melemu diga lok li nama’ at loogu xokoxo. La at na dia lok do dina lox aonon nemnem nama’. Kopmen tinotno! I epovo do luvuttadi amgomgo axa dibat pas ude la dina soxomus asu nama’.”

³⁸Diga tong i na levelinga ri luvuttadi amgomgo; la diga rongga i do ne Pol mi ne Sailas nedu lunat boro Rom la kopmen luradi gamasa, la diga marat aleng. ³⁹Kuren la digat pas la diga vaase loklok bukbulu ridu; la diga lam asu du basinge loogu xokoxo la diga sing du do duna vas kaxat basinge mo lemenemen. ⁴⁰Pol mi ne Sailas duga on basinge loogu xokoxo, la dugat pas uto at loogu at ne Lidia. Mogo duga ekip tangarang mi limixin nuunu, la duga lox alolos di mi levelinga la duga onon ta.

Pol Mi Ne Sailas Duga Xip Losongsongot To Tesalonia

17 ¹Pol mi ne Sailas dugat pas kantubu at lunep silok Ampipolis la Apolonia, la duga vas pot to Tesalonia. Ap mo lemenemen loogu singising at lubungmixin me Judaia ga nemen e. ²Pol ga beles at loogu singising kerekngan ni gak lok amisix i. Mo go ni ga paase eburu mi limixin, la ga tong asu levelinga at Lovoang Kaala, at lavantun levenaleng kaala. ³Ni ga soxomus mo levelinga la ga lox asuusu i rinedi do i epovo Lanarong na met, la na xatu kaxat amlong bok basinge lanmet. La ne Pol ga lok, “Na ne Iesu mo nia a tong asu i rinemi, neni Lanarong.” ⁴Lentaba atnedi leme Judaia diga nuunu la diga mu asu ne Pol la ne Sailas; la buaang nedu bok limixin me Grik no diga lotu saparap ne Moroa, la buaang bok atnedi lavakin gomgo diga nuunu.

⁵Ketla lentaba at lubungmixin me Judaia diga reven peves aleng atdu la diga xup bubua ka nedu la diga lox axatu lodoxoma at limixin kusu dina esep. Diga lok li nom lemenemen axap at langsung lekarakat la diga ut das lumusaragu at loogu at ne Jeson. Diga lok tong pen i do dina vuse ka ne Pol mi ne Sailas la dina lok ka du kusu duna ru at lavapaase. ⁶Ketla di goxo vuse ka du, kuren la diga sat kaka ne Jeson la lentaba luvuttadi nuunu uto at limixin amgomgo ap mo lemenemen; la digap kup keretna, “Na luvuttadi di lok lekarakat silok at lengkot axap! La na dira

beles pam at lemenemen atdik. ⁷La ne Jeson ira lam ka di uto at loogu ren. Nedi dira los polo vam leventaangas at laradi gomgo ne Kaisar; di lok do lara loorong silok petpes mo, laasen teren ne Iesu.” ⁸Neni na levelinga diga lox axatu lodoxoma at limixin mi luvuttadi amgomgo ap mo lemenemen ti langsung leedak. ⁹Luvuttadi amgomgo ap mo lemenemen diga tong i ri ne Jeson la nedi luvuttadi nuunu xusu dina lok li tempilas ti un asu di, la melemu diga lox aonon nedi.

Buaang Nedi Limixin Boro Beria Diga Nuunu At Ne Iesu

¹⁰Ap mo mene laxanimin luvuttadi nuunu diga riki ne Pol mi ne Sailas uto Beria. Duga rupert, la at laaleng kaala dugat pas uto at loogu singising at lubungmixin me Judaia. ¹¹Limixin me go diga lox avukat aleng mila diga siam ka levelinga atdu; di goxo ronga xepe levelinga at ne Moroa kerekngan limixin to Tesalonia. Diga ronga mo levelinga mi langsung lomomo, la at levenaleng axap diga utus avukat levelinga at Lovoang Kaala, kusu dina ven i do levelinga at ne Pol ga raturun. ¹²Buaang atnedi diga nuunu, la buaang nedi lavakin silok boro Grik la buaang atnedi lavatlok boro Grik diga nuunu bok.

¹³Ketla lentaba limixin me Judaia boro Tesalonia diga ronga i do ne Pol mo ga vavang mi levelinga at ne Moroa ro Beria; diga vas kaxat ugo la diga lox axatu lodoxoma at limixin. ¹⁴La soso mun luvuttadi nuunu diga sak tiki ne Pol uto loxon, kusu na mu lavattaaxup; ketla Sailas mi ne Timoti duga nemen go Beria. ¹⁵La nedi diga emu mi ne Pol, digat pas eburu min uto Atens. Melemu digamlong uto Beria mi levelinga loklox axasep boro at ne Pol do ne Sailas mi ne Timoti duba vosiga soso mene i.

Pol Ga Vavang Ti Limixin To Atens

¹⁶Pol ga nemen tangais ne Sailas mi ne Timoti ro Atens, ni ga bulu aleng mila ni ga ven i do mo lemenemen ga umsu mi laxampoovo moroa. ¹⁷Kuren la ni ga paase ro at loogu singising eburu mi leme Judaia la limixin kopmen di me Judaia bok no diga lotu saparap ne Moroa. La at levenaleng axap ni ga vavang bok ti limixin mo digat pot amisik to at loxot potpot buru. ¹⁸Lentaba luvuttadi loklox ase diga tong nedi do Epikurian^b la Stoik^c diga etep mi levelinga eburu mi ne Pol. Lentaba diga sue, “Lavanga salai na laradi baulang i lok do na tong asu i?” Lentaba vetpes diga lok, “Ni i paase mumu levenmoroa at lengkot petpes.” Diga tong i na mila Pol ga vavang mumu ne Iesu la laxakatu kaxat amlong teren. ¹⁹Kuren la diga lam ka ne Pol, la diga vaxaxis i ro melamgo at

^b 17:18 Lara libinam tadi diga nuunu do lampeneves at labantuxu neni i silok aleng ti levelinga raturun. ^c 17:18 Lara libinam tadi di goxo nuunu at ne Moroa, ketla diga nuunu axa at lololos atdi. Di goxok lox asuus bok lomomo kopla lainbulu keneng at lorooro atdi.

lixitkis buru at la Ariapagas^d la diga lok, “Nema ma vara i do mana ronga na loklox ase maxat, nenu u paase mumu i. ²⁰Lentaba levelinga ram i reng petpes at lodoxoma atnema, la ma vara i do manaklen i do ua lavasuun teren.” ²¹(Limixin me go Atens la limixin petpes bok mo diga nemen go, diga vavara amisix i do dina tere la dinang tonga tevelinga mumu lempanga maxat).

²²Pol ga xatu kaxat upana ro melamgo atdi ro at la Ariapagas la ga lok, “Limixin mede Atens! A ven i do at lorooro axap atnimi mi lotu saparap buaang levenmoroa, ²³mila nia at pas tangtagap at levengkot at lemenemen silok atnemi la a ven lengkot nemi mi lotu ren. A long lenger i do loxonin laplavang mo, miga malagan i do ‘Ti lomoroa kopmen dinakleken i.’ Nemi mi lotu saparav i, ketla nemi xopmen minakleken i la nenia na ana tong asu i rinimi.

²⁴Moroa ga rudum li lavatbung menemen axap la lempanga axap maxeneng teren; ni Lamgomgo at laxalibet la laxangka, la ni xopmen na nemen at laraugu lotu limixin di lox i. ²⁵La ni xopmen nak pakes ti tavanga do tara na raba i min, mila neni xa im taba lorooro la lamamas la lempanga axap ti limixin. ²⁶Moroa ga rudum li legesa radi la limixin axap ni livipisik li ren la ni ga lok li nedi xusu dina nemen at lengkot axap at na lavatbung menemen. La neni xa ga sok katling levenaleng ti limixin la levenmenemen atdi. ²⁷Moroa ga lox i na kusu diba ven tin, la dina vosiga i mo do di vara i. Neni xopmen na nemen paxalom basinge dik. ²⁸I lok ngan lentaba diga tong i xeretna;

‘Moroa im taba dik mi lorooro la lolos.’

I ngan bok lentaba luvuttadi vapaase atnimi diga tong i do;

‘Nedik laxamdak teren.’

²⁹Nedik laxamdak at ne Moroa, kuren la nemen dik ta doxoma i do lampoovo ren i lok ngan lampoovo at logol koplā li siliva xopla levenuto limixin di lox i mi lakleken la lololos atdi. ³⁰Gano ne Moroa goxo doma solo laxakapmek at limixin ap mo levenaleng limixin kopmen di goxokleken i; ketla lingina i tong lolos i ri limixin at lengkot axap do dina leeng basinge laxakapmek atdi. ³¹Mila neni ira lok katling pam lara laaleng neni naba lok li limixin axap at lavapaase, la lavapaase ren nabak mokso aleng; la ni ga soxolik ka vam lara laradi xusu na ronga linga at laaleng ete. Ni ga lox asuvos pam mo laradi ri limixin axap mi loklok katling keretna, ni ga lox aroo amlong i basinge lanmet.”

³²Diga ronga ne Pol ga vaase mumu laxakatu kaxat amlong at lanmet la lentaba atnedi diga lok kalise i; ketla lentaba diga lok, “Ma vara i do mana ronga box u, una vaase amu box i.” ³³Kuren la ne Pol ga on basinge

^d 17:19 Lara loxongkaana ro Atens la neni lenep digat pot buru e ri levengkitkis buru atnedi luvuttadi amgomgo mego.

loxot papaase. ³⁴La lentaba luvuttadi mene diga mumu i la diga nuunu; kantubu atnedi ne Dionisias lara atnedi boro at la Ariapagas, la lara latkin, laasen teren ne Damaris, la lentaba vetpes bok.

Pol Ga Tong Asu Lagale Lavavang To Korin

18 ¹Melemu at na, Pol ga on basinge lemenemen Atens la gat pas uto Korin. ²Mo go ni ga ekip tangarang mi laradi me Judaia laasen teren ne Akuila; lemenemen aulis teren Pontas. Ni ga nemen to Itali at lemenemen Rom eburu mi latkin teren ne Pirikila; ketla diga on basinge mo lemenemen, mila lakaisar ne Kolodias ga tong i ri limixin me Judaia xusu nedi axap dina vas kaxat basinge lemenemen Rom. Pol gat pas kusu na ven tidu, ³la ni ga nemen midu la ga gugu eburu midu, mila neni gakkelen lugugu gu mi levengkadis, kerekngan du. La kerepmo diga lok kaka lempilas tidi. ⁴Ni ga vavang amisik to at loogu singising at levenaleng kaala, gak lok tong pen i do na lok limixin me Judaia la me Grik dina nuunu.

⁵At lara laaleng ne Sailas mi ne Timoti duga rupot boro Masadonia, la melemu ne Pol ga raba levenaleng axap teren ti vavang mi Lagale Lavavang la ga tong i ri limixin me Judaia do ne Iesu, neni Lanarong. ⁶Ketla limixin me Judaia diga lox abulubun i la diga vaase levelinga xapmek mumu i, la ni ga vaase lolos tidi la ga semla xepe laxakup at lavanga singsiga ren; la ni ga lok tidi, “Do nemi mi xopara levelinga at ne Moroa, nemi xa minabap kip lumumuat teren. Kopmen bok ba toxot tarak ap mo i. Nia anat pas kusu ana vavang ti limixin kopmen di me Judaia.”

⁷La ni ga on basinge di la ni gat pas kusu na nemen to at loogu at laradi xopmen neni me Judaia, laasen teren ne Tisias Jastas, neni ga lotu saparap ne Moroa; la loogu ren ga nemen saparap loogu singising. ⁸Krispas, neni laradi gomgo ap mo loogu singising ga nuunu at Leeme Silok, neni la nedi axap diga nemen at loogu ren diga nuunu; la buaang bok atnedi go Korin diga rongga Lagale Lavavang, la diga nuunu la diga lok ka lesepe susu.

⁹At lara laxanimin Pol ga ven lisilimet, la Leeme Silok ga lok tin, “Nemen utak marat, ketla una vavang amisik la nemen uta doxoma abulubun la una ke xepe na lugugu rak, ¹⁰mila nenia ak lox eburu minu, kopmen tara noxo lok empana i do na sev u, mila buaang nedi at na lemenemen, nedi limixin tarak.” ¹¹Kuren la ne Pol ga nemen go at legesa maares mi lavanna gaaling, ga vanasa limixin mi levelinga at ne Moroa.

¹²At lara laaleng ne Galio ga nemen ngan lamgomgo at limixin to Grik, la limixin me Judaia, diga vot eburu la diga ranga alis ne Pol la diga lok ka i uto at lavapaase. ¹³Diga lok, “Na laradi i lok tong pen i do na lok pes lunuunu at limixin di lotu saparap ne Moroa la i anasa di mi lara langas petpes kopmen na sixit emu mi Lenavolo.”

¹⁴Pol ga lok do na vaase, la ne Galio ga lok ti limixin me Judaia, “Do ni ga lok laxakapmek, i epovo do nia ana ronga levelinga atnemi limixin me Judaia. ¹⁵Ketla nemi mi paase mumu mene levelinga la levenasen at Lenavolo atnemi. Nia xopmen laradi rongtonga ri lempanga xerepmo. Nemi xa mina epaase mumu i nom.” ¹⁶La ni ga lox asu di ukamang basinge lavapaase. ¹⁷Ketla diga ranga alis ne Sositenes, laradi gomgo at loogu singising, la digap sev i ro melamgo at loxot tongtonga linga. Galio ga ven i na, ketla ni ga ven kepe mun i.

Pol Gamlong Uto Antiok

¹⁸Pol ga nemen to Korin at levenaleng buaang; melemu ni ga on basinge luvuttadi nuunu la ni ga los kas at lavattaaxup la ni eburu mi ne Pirikila la ne Akuila diga sen uto Siria. Avot ti mo lavatpas, Pol ga lok laxakaape saparap ne Moroa to Senkiria, la ni ga gan pes levengkabinim at lavatlak teren. ¹⁹Diga rupot to Epesas, la ne Pol ga on basinge ne Pirikila mi ne Akuila. Ni gat pas uto at loogu singising la neni eburu mi limixin me Judaia diga etep mi levelinga. ²⁰Diga sing i xusu neni na nemen eburu minedi at tevenaleng, ketla ni goxo siam. ²¹La ni ga lok tidi, “Mo do lavavara at ne Moroa, abamlong bok ude rinimi.” La ni ga los kas at lavattaaxup la ga sen kaxat boro at lemenemen Epesas. ²²La ni ga rupot to Sisaria la gat pas uto Jerusalem la ga vot pasa mene limixin nuunu me go; melemu ni gat pas uto Antiok.

²³Melemu at leventaba levenaleng at loklok teren go, ni ga vas kaxat, la gat pas maxeneng at lengkot axap, Galesia, la Pirigia, neni gak lox alolos limixin nuunu.

Apolos Ga Vavang To Epesas

²⁴Lara laradi me Judaia laasen teren ne Apolos, neni boro Aleksandria, gat pas uto Epesas. Ni laradi levelinga ren ga lok nunuan amisik la ni galeklen avukat levelinga at Lovoang Kaala. ²⁵Ni ga lok ka levelinga mumu langas at Leeme Silok, la ni ga ruuna langangan lomomo xusu ni na anasa limixin mi levelinga mumu ne Iesu, la levelinga ren gak mokso. Ketla neni gaklen kusuk mun lesep susu at ne Jon. ²⁶Ni ga vaase lolos to xeneng at loogu singising. La ne Pirikila mi ne Akuila duga ronga i la duga lam ka i uto at loogu atdu. La duga soxomus avukat box i rin, mi langas nunuan at Leeme Silok.

²⁷Apolos ga doxoma i do ni nat pas uto at lenep silok Grik; kuren la luvuttadi nuunu ro Epesas diga paase aronga i la diga malagan lovoang ti luvuttadi nuunu ro Grik; diga tong i ridi do dina siam ka i ugo. Ni ga rupot, la ni ga lok tooro avukat nedi mo diga nuunu at ne Iesu mi loklok tooro at ne Moroa. ²⁸At lemeren limixin axap ni ga volo aleng limixin me Judaia mi leete silok. Ni ga lox asuusu i at Lovoang Kaala do ne Iesu, neni Lanarong.

Pol Ga Vavang Mi Laasen At Ne Iesu To Epesas

19 ¹Ap mo levenaleng ne Apolos ga nemen to Grik at lemenemen Korin, la ne Pol gat pas at langas babaalom maxeneng ap mo lunep silok Galesia la Pirigia la ni ga rupot to Epesas. Mo go ni ga vosiga lentaba luvuttadi nuunu. ²La ni ga sue di, “Kereva, miga lok kaka bok Loroonan Kaala at loxonaleng nemi miga nuunu?”

Diga vorang i xeretna, “Nema xovisi mana rongga i do Loroonan Kaala mo i nemen.” ³Pol ga sue di, “Lesepe susu salai nemi miga lok ka i?”

Diga vorang i xeretna, “Maga lok ka lesepe susu at ne Jon.”

⁴Pol ga lok, “Lesepe susu at ne Jon tinedi diga on basinge laxakapmek atdi; la ne Jon ga tong i ri limixin do dina nuunu at lara mo ga mumu asu i, neni ne Iesu.” ⁵Diga rongga i na la diga lok ka lesepe susu at laasen at Leeme Silok ne Iesu. ⁶Pol ga lok li lukngen to mavana atdi, la Loroonan Kaala ga vubeles atdi la diga paase mi lempapaase vetpes la diga tong asu levelinga at ne Moroa. ⁷Nedi axap diga epovo at lasangaun mi legepura.

⁸Maxeneng at lavantun gaaling Pol ga pubeles at loogu singising, la ni ga paase lolos ti limixin, ni ga vetep mi levelinga eburu minedi la ga lok tong pen i do na sat ka lunuunu atnedi ri Linintoo at ne Moroa. ⁹Ketla lentaba atdi di goxopara levelinga ren la di goxo nuunu, la diga vaase kapmek ti langas at Leeme Silok to melamgo at limixin axap. Kuren la ne Pol ga on basinge di la ga lam ka luvuttadi nuunu eburu min; la at levenaleng axap ni ga paase ro at loogu vapaase at ne Tirinas. ¹⁰Pol ga nemen go la ga anasa limixin at legepu maares; kuren la limixin no diga nemen taba ro at lengkot Asia, nedi leme Judaia la leme Grik bok diga rongga levelinga at ne Moroa.

Lubunggas Diga Sep Laxamdak At Ne Siva

¹¹Moroo ga lok buaang lempanga sangsangu silok at lekngen ne Pol. ¹²La limixin diga soe ka lengkontamon at labantuxu ren, la diga lok li at labantuxu at limixin mekmeres la levenanmeres atdi gara xap, la lubunggas diga ravasu basinge di.

¹³Lentaba at leme Judaia mo digat pas tangtagap la digak lok pes lubunggas basinge limixin; diga lok tong pen i do dina gugu mi laasen at Leeme Silok ne Iesu. Diga lok ti lubunggas keretna, “Nia a tong i rinimi do mina sixisu at laasen at ne Iesu, mo ne Pol i vavang min.”

¹⁴Nedi lavanuti laxamdak at laradi boro Judaia, ni laradi gomgo at lubungmaasa, laasen teren ne Siva, mo digak lox i na. ¹⁵Ketla lara lagas ga lok tidi, “Aklen ne Iesu la aklen bok ne Pol, ketla axoklen nemi.”

¹⁶Laradi mi nom lagas ga nemen teren ga xala di mi langsung lololos teren ga volo axap di, la gap sep kakapmek di. Diga sixiro basinge mo

loogu ren la lengkot atdi ga lok kakapmek tinotno, la diga sixiro beleben nga.

¹⁷La nedi axap limixin me Judaia la boro Grik bok, no diga nemen to Epesas diga ronga i na; la diga lingun, la limixin axap diga lok ngangao aleng at laasen at ne Iesu. ¹⁸Buaang atnedi luvuttadi nuunu mi lavakin nuunu diga vot eburu la diga tong asu lempanga xakapmek digak lox i gano. ¹⁹Buaang atnedi mo digakleklen lasak, diga lok buru levenbuk kakapmek atnedi la diga xotos i ro melamgo at limixin axap. Diga exes luunun ap mo levenbuk diga un i min, ga volo lavalimo sangaun larabin sangsangaun kobot (50,000) levempilas gamgames. ²⁰La kerepmo levelinga at Leeme Silok ga epeseves la ga lox alolos bok limixin nuunu.

Langsangan Lekarakat To Epesas

²¹Melemu at na lempanga ga ravasu, Pol ga doma li be i do ni nat pas uto Jerusalem la na mu langas kantubu at lenep Masadonia la at lenep Grik. Ni ga lok, “Melemu at lavatpas tarak uto Jerusalem, abat pas uto Rom.” ²²Kuren la ni ga riki ne Timoti mi ne Erastas, nedu luradi loklok tooro ren uto Masadonia, la ni ga nemen to Asia at lentaba levenaleng.

²³Ap mo levenaleng langsangan lekarakat ga nemen go Epesas mumu langas at Leeme Silok. ²⁴Lara laradi ga nemen go, laasen teren ne Demitrius; ni ga gugu lempoovo moroa mi lisiliva; la gak lok bok lempoovo vanga at loogu laplavang at lomoroa rixin ne Artemis; la nedi luvuttadi diga gugu lugugu xerepmo diga xip kaka langsangan luunun ap mo lugugu. ²⁵Kuren la ni ga xup bubua ka nedi digak lok mo lugugu la ga lok tidi, “Nemi limixin, miklen i do luunun atdik ip tavasu mun at na leven gugu. ²⁶Nemi xa mira ven pam i la mira ronga vam mo levelinga ne Pol i tong i. Ni lok do levenmoroa limixin di lox i mi levengikngen di, kopmen levenmoroa ruturen. La ni ira sat ka vam buaang nedi limixin mi levelinga ren, la ira lox asubu di basinge lomoroa rixin nade Epesas la at lengkot axap bok at na lenep Asia. ²⁷I lok kapmek do na ne Pol ira vot de la na lok limixin kusu dina lox abulubun kepe lempoovo vanga nedik tak lox i. I lok kapmek bok do limixin dina lox abulubun kepe loogu laplavang at lomoroa rixin ne Artemis la dina lok abulubun kepe bok ne Artemis; limixin axap nade Asia la at na lemenemen axap di lotu saparav i.”

²⁸Mo limixin diga ronga na levelinga la diga musak aleng la diga xup lolos kaxat, “Artemis me Epesas neni i silok aleng.” ²⁹Mo luxupkup ga epeseves ap mo lemenemen axap; mo limixin diga ranga alis ne Gaius mi ne Aristakas, nedu boro Masadonia dugat pas amisik eburu mi ne Pol, la diga sixit eburu minedu uto at loxot papaase buru. ³⁰Pol ga vara i do nat pas uto melamgo at limixin axap, ketla luvuttadi nuunu di goxo siam do ni nat pas. ³¹Lentaba luvuttadi amgomgo at lenep silok Asia, nedi larapen

tangas at ne Pol diga lox aonon bok lavapaase rin; diga sing tin do ni noxo vas uto at loxot papaase buru; kuren la ne Pol goxot pas tin.

³²La nedi limixin axap ap mo loxot papaase buru diga lok langsung an luyupkup; ketla buaang atdi digap kup gamasa mene mila di goxoklen lavasuun ap mo lovotpot buru. ³³Lentaba atdi diga lok do ne Aleksanda neni lavasuun at nai, mila leme Judaia diga lok li i do ni na ru ro melango at limixin. Kuren la ne Aleksanda ga sep makmak di mi lekngen kusu na lok lavapaase axasep tinedi limixin do neni eburu mi larapen tangas teren kopmen toxot atdi ap mo leedak. ³⁴Ketla diga ven kibis i do neni laradi me Judaia, la digap kup amisik aleng ngan legesa radi xeretna, "Atemis me Epesas neni i silok aleng!"

³⁵La melemu at nai leeme gomgo at limixin ga lox amila di. Ni ga lok, "Limixin me Epesas! Nemi axap miklen i do nedik mede Epesas tak lok tatao loogu laplavang at lomoroa silok ne Atemis la lovoovo ren, no ga subu boro vana at laxalibet. ³⁶Ixo epovo do tara na tong i do na levelinga kopmen na ruturun. Kuren la minak lox atnaasan la nemen mita lok tempanga xapmek. ³⁷Mi lam ka vam na luradi ude, ketla du xopmen du goxo xip pilo tavanga ro at laraugu laplavang la du goxo vaase xapmek ti lomoroa rixin atdik. ³⁸Dola ne Demitrius la nedi luvuttadi gugu box eburu min di ruuna tekarakat eburu mi tentaba, levengkonaleng move ri lavapaase la luvuttadi amgomgo mo di nemen; di epovo ri lok li tara at lavapaase ren. ³⁹Ket do tavanga gove nemi mi vara rin, minaba epaase mu ba i ro at lovotpot buru atnimi xa. ⁴⁰I epovo do dina lok li dik at lavapaase mumu na leedak i ngan mo lingina. Kopmen tavasuun at na leedak, la nedik ta noxo lox epovo i do ataba tong tavasuun nunuan ti nai." ⁴¹Melemu at lavapaase ren ni ga lox aepeseves nedi.

Pol Gat Pas Uto Masadonia La Grik

20 ¹Melemu at leedak gara xap pam, Pol ga xup bubua ka luvuttadi nuunu, la ni ga vaase loklok tooro rinedi la diga xaduk aonon i. La ni ga on basinge nedi la gat pas uto Masadonia. ²Ni gat pas to xeneng ap mo loxot la ni ga vaase loklok tooro ri limixin nuunu mi levelinga buaang. La melemu ni gat pas uto Grik. ³Ni ga nemen go ga at lavantun gaaling. Ga se ni ga gagas kusu ri mu lavattaaxup uto Siria, ni ga long lenger i do leme Judaia mo diga paase alii ri sev i; kuren la ni ga doma li i xusu namlong kantubu at lenep silok Masadonia. ⁴Sopata, nitna ne Pairas boro Beria, gat pas eburu min; la ne Aristakas la ne Sekandas boro Tesalonia; Gaius boro Debi; Timoti; la ne Tikikas la ne Tropimas boro at lenep silok Asia. ⁵Digamgo rinama la diga ngangais tinama ro Troas. ⁶Maga sen kaxat boro Pilipai melemu at lara leluxa laasen teren Lovovolo Pe; la melemu at lavalimo aleng maga vosiga di ro Troas, mo go maga nemen eburu midi at lavanuti aleng.

⁷At laaleng avot ap mo luik ga ukantinao maga vot buru ri lok katling laanan kaala at ne Iesu. Pol ga vaase ri limixin, la ni ga vavang babaalom se at laxanimin tubu mila ni ga lok do naba onon ap mo laaleng melemu. ⁸Buaang levenbabao ga nemen to vana ap mo loogu nema magak lok teren. ⁹Lara laau radi laasen teren ne Iutikas, gat kis to at loxon go lixilik; Pol ga vaase aleng la lemeren ne Iutikas ga unga aleng tinotno, se ni ga unga met, ni ga subu si boro vana xa ap mo loogu babaalom upana, la ukopok ti laxangka. Diga ranga axatu i, ga lavanga met ta. ¹⁰Ketla ne Pol ga vas si ukopok la ga subu pavaa i la ga ot kongkodan ka i la ni ga lok tidi, “Nemen mita bulu, neni mo i rooro mene la kopmen na met!” ¹¹Melemu digamlong upana ap mo loogu la diga lok laanan kaala. La ne Pol ga vaase babaalom tidi se at laxangking ga losu maxantamak suubu, la ni ga on basinge di. ¹²Diga lok ka mo laau radi uto xolonu, la lebelen di gak lox atnaasan aleng mila ni goxo met.

¹³La nema maga vas kaxat me go uto at lavattaaxup la maga sen kaxat uto Asos kusu manaba xas ka ne Pol upana ri lavattaaxup. Ni ga tong i rinama do manabak lok ngais i go, mila ni gat pas mene ugo. ¹⁴La ni ga ekip tangarang minama ro Asos, la maga xas ka i upana at lavattaaxup la maga sen kaxat uto Matilini. ¹⁵Maga sen kaxat me go la maga rupot to saparap losoxan Kios ap mo laaleng petpes. Melemu at lara laaleng bok nga, maga sesen uto saparap losoxan Samos, la ap mo manga lara laaleng petpes maga rupot to Mailitas. ¹⁶Pol ga doxoma i do ni naba sen polo go Epesas, kusu ni noxo nemen abao ro at loxot Asia. Ni gak lok soso xusu ni naba rupot to Jerusalem, edompo mi laaleng ti lok katling la Pentikos.

Pol Ga On Basinge Limixin Nuunu Boro Epesas

¹⁷Pol ga riki lara laradi mi levelinga boro Mailitas uto Epesas, ga sing loxongkulao silok at lotu xusu dina ekip tangarang min. ¹⁸Diga vot posiga i la ni ga lok tinedi, “Miklen i do luruptuvuk tarak ga lox avukat ap mo levenaleng nia aga nemen eburu minemi, ga vaxaru ka i at laaleng nia aga rupot de at lenep Asia. ¹⁹Mi langsung loklok ngangao la lanteng; aga lok leven gugu rak kerekngan lasaxaruki at ne Moroa, la aga ekip tangarang mi levenmumuat at leme Judaia diga lok li i rak. ²⁰Mikleklen i do nia a goxo lipe tekolinga ri lok tooro nemi limixin; ketla nia agak lox ase nimi ro at lengkot potpot buru la to at leventaugu atnimi. ²¹Ti leme Judaia la limixin kopmen di me Judaia bok aga vaase lolos tinedi do dina leeng basinge laxakapmek atnedi, la dina vot parap ne Moroa, la dina nuunu at Leeme Silok ne Iesu.

²²La ananga nia a ronga res at Loroonan Kaala, kusu anat pas uto Jerusalem; la nia axoklen i do lavanga salai naba rupot saparav ia go. ²³Nia akleklen i do at laramenemen axap Loroonan Kaala ik lok tia dola limixin diba lok li ia at loogu xokoxo la aba xip laxanmumuat aleng.

²⁴Ketla nia a lok do lorooro rak i lok ngan ta do lavanga gamasa mun tia; nia a vara mun i do ana lox axap lavatpas tarak la ana lox axap lugugu at Leeme Silok ne Iesu ga raba ia min; mo lugugu ri tong asu Lagale Lavavang mumu letaba nabalamu at ne Moroa.

²⁵Agarat pas tangtagap pam kantubu atnimi, aga tong asu langas ti Linintoo at ne Moroa. La na a tong tuturun i rinimi; aklen i do kopmen tara atnimi noxo ven bok ba ia. ²⁶Kuren la a tong tuturun i rinimi na lingina; mo do tara atnimi na ronga abulubun levelinga at ne Moroa, ni nabap kip lumumuat teren. Nia xopmen lavasuun teren, ²⁷mila nia a goxo lipe tempanga ketla aga tong asu lempanga axap ne Moroa ga lok do na lox i at lorooro atnimi. ²⁸Mina lok tatao avukat nemi la mina lok tatao nedi bok limixin, Loroonan Kaala gara lok li vam nedi maxopok at loklok tatao atnimi. Mina lok ngan luvuttadi loklok tatao sipsip kantubu at limixin at ne Moroa, no ni ga lok li di do ateren axa mumu lanmet at ne nitna. ²⁹Aklen i do melemu at loxonaleng nia ana onon, limixin kapmek diba rupot kantubu atnimi, diba lok ngan lubungman atat la diba lok kapmek lunuunu at lentaba atnimi. ³⁰Laaleng move naba rupot la lentaba atnimi diba ba gili levelinga ruturun kusu ri sat ka limixin nuunu basinge ne Moroa. ³¹Mina lok tatao avukat nemi. Mina doma bilong ti mo lavantun maares nenia aga paase lolos tinemi axap at levenaleng kangking la kanimin, la agang teng mu nimi.

³²La ana nia a lok li nimi maxopok at loklok tatao at ne Moroa la levelinga mumu letaba nabalamu ren ba lok tooro nimi. Neni xa i epovo ri lox alolos lunuunu atnimi la na raba nemi mi lapnovos no ni i gagas li i ri limixin teren. ³³Nia a goxom doma mu tempilas koplala tempanga singsiga atnimi. ³⁴Nemi xa miklen i do aga gugu mi na lukngak la aga lox epovo ka lempanga, nema mi larapen tangas tarak magak pakes tin. ³⁵At lempanga axap nia aga lox i, aga lox ase nimi do mina lolos kusu mina lok tooro mo limixin banbalo. Mina lox i xuren mila ne Iesu ga lok keretna, 'I lox avukat do tara i lok kaka levempanga, ketla i lox avukat aleng do tara na raba levempanga ri laradi vetpes.'

³⁶Pol ga vaase axap la ni ga xis tiktikbu mi luvatgulom teren eburu minedi axap limixin la ni ga sing. ³⁷Nedi axap digang teng aleng la diga votor i la digat nes i. ³⁸Diga lok bukbulu aleng at levelinga ni ga tong i do di noxo ven bok ba i. La diga emu min uto at lavattaaxup.

Pol Gat Pas Uto Jerusalem

21 ¹Maga lox abeese limixin me Epesas mi lainbulu silok la maga on basinge di. Maga sen kaxat la maga sen epopolo uto Kos. Ap mo laaleng melemu maga rupot to Rodes, la maga sen kaxat mego uto at lemenemen Patara. ²Mo go maga long lenget lara lavattaaxup, mo ga lok do na sen kaxat uto Pinisia; kuren la maga los kas ap mo lavattaaxup

la maga sen kaxat. ³Maga vot at lara loxot la maga ven losoxan Saipras, la maga sen polo i at lenep kia ap mo losoxan uto at lenep silok Siria. Maga oso ro Taia, mo go lavattaaxup ga oso xusu dina xip asu lentaba lempanga. ⁴Maga long lenger i do lentaba luvuttadi nuunu mo diga nemen go, la maga nemen eburu minedi at lavanuti aleng. Mi lololos at Loroonan Kaala diga tong i ri ne Pol do ni noxot pas uto Jerusalem. ⁵Ketla levenaleng atnama ri nemen go ga xap, la maga on basinge mo lemenemen silok. Nedi axap, eburu mi lavakin atnedi la laxaalik kakalik atdi, diga vas kaxat eburu minema uto loxon. Maga xis tiktikbu mi lempatgulom atnama ro loxon la maga lok lising. ⁶Melemu diga xaduk aonon nema, la maga los kas at lavattaaxup la nedi digamlong ukolonu.

⁷Maga sen kaxat boro Taia la uto Potolemas, mo go maga vot pasa luvuttadi nuunu la maga nemen eburu minedi at leges aleng. ⁸Ap mo lara laaleng melemu maga on basinge di la maga rupot to Sisaria. Mo go magat pas uto at loogu at laradi vapaase asu Lagale Lavavang, laasen teren ne Pilip, la maga nemen eburu min. Neni lara atnedi lavanuti luvuttadi no diga soxolik ka di ro Jerusalem. ⁹Neni ga ruuna lavanuet laxaalik kovisi di goxo epot, mo diga vavang mi levelinga at ne Moroa.

¹⁰Maga nemen go at lentaba levenaleng, la lara leeme vapaase alii, laasen teren ne Agabas ga rupot boro Judaia. ¹¹Ni ga vosiga nama, la ga lok ka labaane at ne Pol, la ni ga xoxo ka lukngen ne Pol mi luxangkedek teren la ga lok, “Loroonan Kaala i tong i do laradi at na labaane, limixin me Judaia diba xoxo i; diba lox i na ro Jerusalem, la diba song araba i ri limixin kopmen di me Judaia.

¹²Maga rongga i na la nema eburu mi lentaba me go maga ngising tinotno ne Pol do ni noxot pas uto Jerusalem. ¹³Ketla ni ga lok, “Lai nom nemi mik lox i, ming teng keretnom la mirak lox abulu lorooro rak? Nia a gagas pam kusu dinaba xoxo ia. La nia a gagas bok kusu ri met mo go Jerusalem kusu ri xip aurut laasen at Leeme Silok ne Iesu.” ¹⁴Ma goxo lox epovo i xusu ri ba gili lodoxoma ren, kuren la maga ke xepe i la maga lok, “Lavavara at ne Moroa do ni na lox i xuren.”

¹⁵Melemu at lentaba levenaleng maga nemen go, maga lok agagas li lempanga atnama la maga vas kaxat uto Jerusalem. ¹⁶Lentaba luvuttadi nuunu boro Sisaria bok mo digat pas eburu minema, la diga lok ka nama uto at loogu at lara laradi, laasen teren ne Nason boro Saipras, neni lara atnedi diga lok ka avot lunuunu saparap Leeme Silok.

Pol Ga Ven Ti Ne Jems

¹⁷At lovotpot atnama go Jerusalem luvuttadi nuunu diga lok momo aleng minama. ¹⁸Ap mo lara laaleng melemu nema mi ne Pol magat pas kusu mana ven ti ne Jems; la nedi axap luvuttadi amgomgo at lotu go Jerusalem diga rupot to ap mo lovotpot buru. ¹⁹Pol ga paase momo

rinedi la ga tong asu lempanga axap no ne Moroa ga lox i at lekngen kantubu at limixin kopmen di me Judaia.

²⁰Melemu at levelinga at ne Pol, limixin diga emi asu mi ne Moroa. La diga lok ti ne Pol, “Neton nama. U ven i do, buaang limixin me Judaia di nuunu, la nedi dim tebeng lolos Lenavolo. ²¹La lentaba vetpes di tong i do, nenu mo uk lox ase leme Judaia mo dik lok at laramenemen at limixin kopmen di me Judaia, la u tong i ridi do dina ke xepe Lenavolo at ne Moses, la nemen nedi guta vit kepe lengkontuxu at laxamdak atdi la nemen diguta mumu asu leveloklok atnedik leme Judaia. ²²Dibaklen i do nenu mo u rupot pam. Ataba lok lavanga salai? ²³Una lok lempanga keretna. Lavanuet luvuttadi na diga xaape saparap ne Moroa. ²⁴Una lam ka di la una mu asu mo loklox eburu minedi xusu una dadat at lemeren ne Moroa, la una lok bok luunun ap mo loklok tinedi; kuren la diba epovo do dina gan kepe lempat kabinim at lempatlak atdi xusu dina lox epovo mo laxakaape atdi saparap ne Moroa. Kerepmo la limixin axap dibaklen i do mo levelinga mumu u xopmen na ruturun; la diba xasep do nenu ung tonga res at Lenavolo at ne Moses. ²⁵Ketla mara lox aonon pam levelinga ri limixin kopmen di me Judaia no diga nuunu. Mo levelinga i tong i ridi do di noxo anan teveluxa no diplavang min ti lempatpoovo moroa, la di noxo anan tavanga mi lada ren, la di noxo anan lempanga mi lavanuet kangkedek no diga xut amer i, la dina ke loklok ting longka tixin.”

²⁶Kuren la ne Pol ga lam ka di mo lavanuet luvuttadi la ga emu minedi la ap mo lara laaleng melemu ni ga lox epovo luunun tidi la diga gan kepe levengkabinim at lempatlak atdi. La ni ga beles to xeneng at loogu laplavang la ga vaase axasep lavanisa levenaleng ti laxavaxap ap mo loklok la at ua laaleng diba raba laramtaba atdi.

Leme Judaia Diga Ranga Alis Ne Pol

²⁷Levenaleng ap mo loklok ga lok do na xap ta, lentaba leme Judaia boro at lenep Asia diga ven ne Pol to xeneng at loogu laplavang. Diga lox axatu kaxat levendoxoma at limixin axap me go, la diga ranga alis i. ²⁸Digap kup keretna, “Nemi limixin me Israel. Ude nimi la mina lok tooro nama. Anai laradi na it pas tangtagap at lengkot axap la ik lox ase limixin do dina lox abulubun kepe limixin me Judaia la dina ke xepe Lenavolo atdik la na loogu laplavang. La ana nga ira lok ka laradi xopmen me Judaia ukeneng at loogu laplavang la kerepmo i lok puvula na loogu xaala!” ²⁹Diga tong i na mila diga ven ne Tropimas boro Epesas eburu mi ne Pol to xeneng ap mo lemenemen silok, la diga nua i do ne Pol ga lam ka i uto xeneng ap mo loogu laplavang.

³⁰Mo lemenemen silok axap ga umsu mi langsung leedak, la limixin digak sixit eburu, la diga ranga alis ne Pol la diga sat ka i ukamang basinge loogu laplavang. La soso mun diga vipe lumusaragu ap mo loogu

laplavang. ³¹Mo limixin diga lok tong i do dina sep ne Pol la soso mun lara laradi ga lox aonon levelinga ri leeme gomgo at limixin esep boro Rom do limixin axap go Jerusalem mo diga lok lekarakat. ³²La soso mun mo leeme gomgo ga lok ka lentaba digak lok mu ren la lentaba limixin esep la diga sEXIT uto saparap mo limixin. Mo limixin diga ven mo leeme gomgo eburu mi limixin esep, la diga xap ta lesepep ne Pol.

³³Leeme gomgo ga vas saparap ne Pol, la ga ranga alis i, la ga tong i ri limixin esep do dina xoxo i mi luvaroos sen. La ni ga sue, “Nege i na laradi, la lavanga salai mo ni i lox i?”

³⁴Lentaba xeneng atdi mo limixin diga tong lara levelinga vetpes. La lentaba diga tong leta lepelinga vetpes bok, langsung lekarakat silok ga vot, la mo leeme gomgo goxo lox empana i do naklen ka lavasuun at na leedak; kuren la ni ga tong i ri limixin teren kusu dina lam ka ne Pol uto at loogu lolos atdi. ³⁵Diga emu min uto at laata at loogu, la limixin esep diga xip ka i mila limixin diga musak aleng. ³⁶Diga mumu asu i la digap kup keretna, “Sev amer i!”

Pol Ga Vaase

³⁷Mo limixin esep diga lok do na lok ka ne Pol uto at loogu lolos la ni ga lok ti leeme gomgo mi lavapaase Grik, “I epovo bok do ana tong tevelinga ru?”

Mo leeme gomgo ga rakdu la ga sue i, ³⁸“Kereva. Nenu xopmen mo laradi boro Isip? At lentaba levenaleng ga xap pam, neni ga lok kaxat leesepe eburu mi lagavaman la gam gomgo rinedi lavanuet larabin sangsangaun kobot (4000) limixin esep uto at lamatbin.”

³⁹Pol ga lok keretna, “Nenia lara at limixin me Judaia, boro at lemenemen Tasas at lenep Silisia; nenia me go ap mo lemenemen silok doxodok. A sing u do i epovo ana vaase ri limixin.”

⁴⁰Leeme gomgo ga siam do ni na vaase; kuren la ne Pol ga xatu kaxat to at laata ap mo loogu la ga sep makmak di. Diga lok pilo, la ne Pol ga vaase ridi mi lavapaase Ibru.

22 ¹“Luvutnetak mi luvuttamak, mina rongga ia; ana paase de melamgo atnimi!”

²Diga rongga ne Pol ga vaase ridi mi lavapaase Ibru, la diga ru atnaasan, la ne Pol ga paase ridi. ³“Nenia lara at limixin me Judaia, boro at lemenemen Tasas at lenep Silisia, ketla diga lok ka ia ude Jerusalem i ngan laradi loklok ka anasa at ne Gamaliel. Aga lox ase avukat keneng at Lenavolo at lavalabat atdik, la aga lolos tinotno ri mumu asu ne Moroa kerekngan nemi axap na lingina. ⁴Aga ranga alis buaang nedi limixin diga mumu asu ne Iesu la agap sev amet di. Agang tanga alis lavatlok mi lavakin la agak lok li di at loogu xokoxo. ⁵Lamaasa gomgo at luvuttadi laplavang la nedi bok luvuttadi amgomgo dikleklen i do nia a paase

ruturun. Aga lok ka levelinga loklox axasep boro atdi luvuttadi amgomgo rinedi leme Judaia ro Damasko. Kuren la nia agat pas ugo xusu ana xoxo ka mo limixin la ana lok ka amlong di uto Jerusalem kusu dina xip lumumuat.

Pol Ga Tong Asu Lorooro Ren

(Gu 9:1-19; 26:12-18)

⁶Agat pas mu langa la aga vas saparap lemenemen Damasko; ap mo loxonaleng laxangking ga xis tubu la aga ven langsung laxasep boro vana at laxalibet ga ngao pavaa ia. ⁷Aga subu ukopok ti laxangka la aga ronga laxaka at lara ga sue ia, ‘Sol, Sol. Tila uk lox asongor ia?’

⁸Aga sue i, ‘Leeme Silok, nenu nege?’

Ni ga lok tia, ‘Nenia ne Iesu boro Nasaret mo nu uk lox asongor ia.’

⁹Nedi luvuttadi diga emu minia diga ven mo laxasep, ketla di goxo ronga laxaka ap mo laradi ga paase ria.

¹⁰Aga sue i, ‘Leeme Silok, aba lok lavanga salai?’

La Leeme Silok ga lok tia, ‘Una xatu kaxat la unat pas uto Damasko, la mo go tara ba tong lugugu no ne Moroa ira lok katling pam i ru.’

¹¹Luxatli rak ga main mila mo laxasep ga lolos aleng. Kuren la nedi diga emu minia diga ranga ru at lakngak la diga lam ka ia uto Damasko.

¹²Lara laradi, laasen teren ne Ananias, laradi lotu la gang tonga res at Lenavolo atdik la limixin me Judaia go Damasko diga lok ngangao aleng teren. ¹³Ni ga vosiga ia la ga ru saparav ia la ga lok, ‘Netak ne Sol, una ven mi luxatli ram.’ Ap mo mene loxonaleng nia ga valas luxatli rak la aga reven bok ba min, la aga ven mo laradi.

¹⁴Ni ga lok, ‘Moroa at lavalabat atdik ga soxolik ka vam u do unaklen lodoxoma ren, la uba ven kibis Lanarong teren, luruptuvuk teren ik mokso; la unang tonga levelinga ren. ¹⁵La nenu uba tong asu levelinga ri limixin axap mumu mo lempanga nenu uga ven i la ugang tonga i. ¹⁶La nemen utat kis gamasa. Katu kaxat la una lok ka lesepe susu la ne Moroa naba doxoma xepe leveloklok kakapmek taram, mo do una sing ti loklok tooro at Leeme Silok.’

Pol Laradi Vavang Ti Limixin Kopmen Di Me Judaia

¹⁷La ne Pol ga lok bok keretna, “Agamlong uto Jerusalem, la aga ngising to xeneng at loogu laplavang la aga ven lara lisilimet. ¹⁸Keneng at na lisilimet nia aga ven Leeme Silok ga lok tia, ‘Soso u la una vas kaxat basinge lemenemen Jerusalem, mila limixin me de di noxo siam ka levelinga ram mumu ia.’

¹⁹Aga lok, ‘Leeme Silok, diklen avukat tinotno i do nia agat pas uto at laraugu singising la agap sep mo limixin diga nuunu ram. ²⁰La at laaleng diga sev amet laradi vapaase ram ne Stiven, nenia mo aga tu saparap di,

la nia aga siam ti mo laniu ren la agak lok tatao levempanga singsiga ap mo limixin diga sev i.'

²¹Moroa ga lok tia, 'Una vas kaxat basinge na lemenemen; nia aba riki u uto vaxalom tinedi limixin kopmen di me Judaia.'

²²Leme Judaia diga rongga levelinga at ne Pol at loxonaleng ni ga tong i na levelinga. Diga xup kaxat lolos keretna, "Tiki pes i! Sev amer i! Neni xopmen na epovo ri rooro at na lavatkangka!"

²³Digap kup lolos la diga ba koxorop levempanga singsiga atdi la diga lulu mi laxakup upana. ²⁴Ketla leeme gomgo at limixin esep ga sak tiki limixin teren do dina lok ka ne Pol uto at loogu lolos, la ga tong i ridi do dinak pixis i xusu ri vuse ka ua lavasuun teren la leme Judaia diga vaase lolos tangarang i. ²⁵Se diga xoxo ka i do dinak pixis i, Pol ga lok ti laasesep mo ga tu go, "Kereva, ik mokso at leventaangas atnimi do minap sep lanat boro Rom, no xopmen di goxo rongga levelinga ren at lavapaase?"

²⁶Mo laasesep ga rongga i na la ni gat pas uto at leeme gomgo la ga sue i xeretna, "U lok do una lok lavanga salai? Ana laradi neni lanat boro Rom!"

²⁷Kuren la leeme gomgo ga vosiga ne Pol la ga sue i, "Una tong i ria; kereva, nenu lanat boro Rom?"

Pol ga vorang i xeretna, "I ruturun."

²⁸Leeme gomgo ga lok, "Nia bok lara xuren, mila nia aga xepe buang laxampilas."

Pol ga lok, "Ketla nenia lanat boro Rom mila ne tamak gak lok bok kuren."

²⁹La soso mun mo limixin esep diga lok do dina sue i mi levesusue, digasko bilong basinge i; la mo leeme gomgo ga marat mila ni gaklen ba i do ne Pol neni lanat boro Rom, la ni ga lok li gar i at loxokoxo.

Pol Ga Ru Ro Melango At Luvuttadi Amgomgo La Ga Paase

³⁰Leeme gomgo ga vara i do naklen ua lavasuun teren la leme Judaia diga lok li ne Pol at lavapaase; kuren la ap mo lara laaleng melemu, ni ga soxomus asu ne Pol; la ga tong i ri lavamaasa silok la nedi luvuttadi amgomgo at leme Israel kusu dina rupot buru min. La ni ga lam ka ne Pol, la ga vaxaru i ro melango atdi.

23 ¹Pol ga sok katli ka luvuttadi silok la ga lok tidi, "Luvutnetak. Luruptuvuk tarak i lox avukat axap at lemeren ne Moroa, ise at na laaleng lingina." ²Ketla lamaasa gomgo ne Ananias ga tong i ridi luvuttadi diga tu auret ne Pol do dina vasa lungusno ren. ³Pol ga lok tin, "Moroa naba vasa u, nenu u ngan ta laxapla ro maxamang inbun la to xeneng i lok kapmek! Ut kis de xusu una mumu asu Lenavolo at ne Moroa la una rongga linga rak; ketla nenu xa u los polo Lenavolo at ne Moroa la ura tong i ridi do dina vasa ia!"

⁴Mo luvuttadi diga tu saparap ne Pol diga lok tin, “Nenu u paase kapmek ti lamaasa gomgo at ne Moroa!”

⁵Pol ga vorang i ridi, “Luvutnetak, nia axoklen i do neni lamaasa gomgo. Levelinga ik lok to xeneng at Lovoang Kaala i lok keretna, ‘U noxo vaase kapmek ti laradi gomgo at limixin.’”

⁶La ne Pol ga ven i do lentaba atdi na limixin nedi lubung Sadiusi la lentaba bok atdi nedi lubung Parisi, la ni ga vaase silok tinedi luvuttadi, “Luvutnetak, nenia la Parisi, la ne tamak bok, neni la Parisi. A tu at lavapaase mila nia aklen i do ne Moroa naba lox arooro amlong nedi diga met pam diba roo xat amlong.” ⁷Diga ronga i na, la lubung Parisi mi lubung Sadiusi diga edak kaxat, la diga epeseves ti legepu binam tadi. ⁸Mila lubung Sadiusi dik lok do limixin di noxo roo xat amlong basinge lanmet, la do kopmen tubung angelo mi labaroonan; ketla lubung Parisi di nuunu at na lavantun lempanga.

⁹Luxupkup go ga silok la lentaba luvuttadi loklox ase at Lenavolo, nedi at lenep at lubung Parisi diga xatu kaxat la diga vaase lolos, “Maxo vuse ka tavanga i lok kapmek at na laradi. Agut lороonan at na lorooro xopla laangelo mo ga paase rin!” ¹⁰Mo leedak ga lolos tinotno la leeme gomgo at limixin esep ga marat do limixin dina etep mi ne Pol la dina sev amer i. Kuren la ni ga tong i ri luvuttadi esep do dinat pas uto saparap mo limixin la dina lam ka ne Pol basinge di, la dina lok li i ro at loogu lolos.

¹¹Ap mo laxanimin Leeme Silok ga ru saparap ne Pol la ga lok, “Una lolos! Ura tong asu vam levelinga rak na de Jerusalem, la unaba tong asu box i to Rom.”

Leme Judaia Diga Tong Li Langas Ti Sev Amet Ne Pol

¹²Ga maxantamak suubu ap mo lara laaleng melemu, lentaba at leme Judaia diga rupot buru la diga tong li levempapaase. Diga xaape ri ne Moroa do di noxo an tempanga anan la di noxo in taxadan se dina sev amet ne Pol. ¹³Nedi axap diga epovo at lavanuet sangaun mo diga lok na lavapaase ri sev amet ne Pol. ¹⁴Kuren la diga vot pasa lavamaasa silok at luvuttadi laplavang la loxongkulao silok la diga lok, “Mara lok pam laxakaape saparap ne Moroa do nema axap ma noxo anan tempanga anan la ma noxo in taxadan se manaba sev amet ne Pol. ¹⁵Monga nemi eburu mi luvuttadi amgomgo mina lox aonon tevelinga ri leeme gomgo at limixin esep boro Rom kusu na lok taba nimi mi ne Pol; mina xarang i dola mi vara i xusu mina ronga levelinga ruturun mumu i. Ketla nema maba nemen gagas go mun auret ti sev amer i, mo neni xovisi noxo rupot nade.”

¹⁶Ketla lisixilik at ne Pol ga ronga mo lavapaase alii atdi; kuren la ni gat pas la ga beles to xeneng ap mo loogu lolos la ga tong na levelinga ri ne Pol.

¹⁷Kuren la ne Pol ga ro xaka lara laasesep la ga lok tin, “Una lok ka na laau radi uto at leeme gomgo at limixin esep; neni i ruuna levelinga xusu na tong i rin.” ¹⁸Mo laasesep ga lam ka i uto at leeme gomgo at limixin esep la ga lok, “Laradi xokoxo ne Pol i xup kaka ia la i sing ia xusu ana lam ka na laau radi ude saparav u, mila neni i ruuna levelinga xusu na tong i ru.”

¹⁹Leeme gomgo ga ranga tu at lekngen la ga lam ka i uto at loxot mimila la ga sue i, “Lai mo nu u lok do una tong i ria?”

²⁰La ni ga lok, “Leme Judaia di siam do diba sue u kantamak kusu una lok ka ne Pol uto saparap nedi axap luvuttadi amgomgo, diba xarang i dola luvuttadi amgomgo di vara i do dina ronga levelinga ruturun mumu i. ²¹Ketla nemen uta ronga res atdi, mila i vanuet sangaun la i soxope asu lenep bok mo diba lipe tangais i. Dira lok pam laxakaape saparap ne Moroa do di noxo anan tempanga anan la di noxo in taxadan, se dinaba sev amet ne Pol. Mo nga di gagas ti lox i, la di ngangais linga mun taram.”

²²Leeme gomgo ga lok, “Nemen uta tong i na ri tara do nenu ura tong pam i ria.” La ni ga sak tiki aonon i uto.

Leeme Gomgo Ga Lox Aonon Ne Pol Uto Saparap Ne Pelik

²³Leeme gomgo at luvuttadi esep ga ro xaka luasesep teren la ga lok tidu, “Muna lox agagas li tegepu sangaun kobot (200) luvuttadi esep la minat pas uto Sisaria, eburu mi lavanuti sangaun luvuttadi esep no dit kis at lemparos, la legepu sangaun kobot (200) luvuttadi esep mi levesoso, la mina gagas ti vas kaxat at lavasik konaleng at laxanimin. ²⁴Mina lox agagas li bok temparos tip kip ne Pol la lempanga ren, la mina lok ka atnaasan i uto saparap laradi gomgo ne Pelik.”

²⁵Kuren la leeme gomgo at luvuttadi esep ga malagan levelinga la ga lok keretna:

²⁶“Nenia ne Kolodias Lisias; a malagan na levelinga ru laradi gomgo ne Pelik ma lok ngangao rino ram. Nia a lox aonon lavapaase momo ru.

²⁷Leme Judaia diga ranga alis na laradi la diga lok do dina sev amer i. Agaklen ka ba i do na laradi neni lanat boro Rom. Kuren la nenia atat pas itinongo eburu mi luvuttadi esep tarak la mata lok ka i basinge di. ²⁸Ata vara i do anaklen tinotno ua lavasuun at lumukmusak atdi rin, kuren la nia ata lam ka i uto saparap luvuttadi amgomgo axap atdi. ²⁹Nia ata long lenger i do ni xopmen toxo lok tepanga xapmek kusu ni naba met nov i xopla ana lok li i at loogu xokoxo; lelinga dita lok li rin mumu mene Lenavolo atdi. ³⁰La lelinga i rupot tia do lentaba me Judaia mo di tong li leventaangas do ri sev amer i; kuren la mo a lox aonon soso i udom saparav u. Aba tong i ridi do dina lok li i at lavapaase ro melamgo ram.”

³¹Luvuttadi esep diga lox epovo levelinga at leeme gomgo. Diga lam ka ne Pol la diga emu eburu min ap mo laxanimin uto vaxalom at

lemenemen Antipatris. ³²Ap mo lara laaleng melemu, nedi luvuttadi esep mo digat pas at laxangka, digamlong uto at loogu lolos; diga on basinge no limixin mi lemparos kusu dina emu mi ne Pol. ³³Diga lam ka i uto Sisaria la diga raba lovoang mi levelinga loklox axasep ti laradi gomgo ne Pelik, la diga lok li ne Pol saparav i. ³⁴Laradi gomgo ga exes mo levelinga la ga sue ne Pol do ni meva. La ni ga ronga i do neni boro Silisia. ³⁵La ni ga lok, “Aba ronga linga ram do mo luvuttadi di lok li u at lavapaase dina rupot.” Kuren la ni ga tong i ri limixin loklok tatao do dina lok tatao ne Pol to at loogu silok at ne Erodes.

Leme Judaia Diga Lok Li Ne Pol At Lavapaase

24 ¹Melemu at lavalimo aleng lamaasa gomgo, ne Ananias gat pas uto Sisaria eburu mi lentaba at loxongkulao silok at limixin me Judaia, la lara leeme vapaase bok, laasen teren ne Tetalas. Diga ru ro melamgo at laradi gomgo ne Pelik la diga lok li lavapaase atdi ri ne Pol. ²Diga xup kaka ne Pol ukeneng ap mo loogu la ne Tetalas ga lok keretna, “Laradi silok ne Pelik! Loklok tatao ram tinama i lok li nama at langsung lumulum, la buaang lempanga loklok tooro mo nenu uga lox i ri limixin at lenep silok atnama. ³Ma lok momo aleng at na ro at lengkot axap at levenaleng getgesara, la ma tong avukat tinotno ru. ⁴Axo vara i do ana lox amolo u mi lempapaase rak, ketla a vara i do una ronga avukat na levelinga lixilik atnama.

⁵Maga ronga i do na laradi i lox araut lekarakat; ni ik paxaru kaxat levenesep to xantubu at leme Judaia no di nemen at lengkot axap at na lavatbung menemen; la neni lamgomgo at loxonbinam tadi laasen teren Nasarin. ⁶Neni ga lok bok pam do na lok puvula loogu laplavang, la maga xoxo xaka i. [Maga lok do mana lok li i at lavapaase kerekngan Lenavolo atnama i tong i. ⁷Ketla leeme gomgo ne Lisias ga rupot posiga nama la ga lam ka i basinge nama, eburu mi buaang limixin esep teren. ⁸Kuren la ne Lisias ga lok tinama do maba vaase mumu ne Pol to melamgo ram. Mo do una susue na laradi, nenu uba ronga i do levelinga rak i ruturun.”]

⁹La nedi axap leme Judaia diga lok tooro ne Tetalas at mo lavapaase la diga lok do mo levelinga ga ruturun.

Pol Ga Vorang Levelinga Atdi Ro Melamgo At Ne Pelik

¹⁰La ne Pelik ga lok loklok katling ti ne Pol kusu na vaase, la ne Pol ga lok, “Aklen i do nenu ugang tonga linga at na lenep silok at levenmaares buaang; kuren la nia a momo ri vorang levelinga atdi de melamgo ram. ¹¹Nenu xa uba long lenget ka i atdi do una sue di, do gat lasangaun mi legepura levenaleng ga xap pam, nia agat pas uto Jerusalem ti lotu saparap ne Moroa. ¹²Leme Judaia di goxo ven ia mi tara, do ma gita

epaase musak to xeneng at loogu laplavang, kopla a gita lox axatu lodoxoma at limixin to xeneng at laraugu singising kopla to ap mo lemenemen silok. ¹³Ketla dixo epovo do dina lox asuusu i do na levelinga atdi i ruturun. ¹⁴Ana tong i na ru. Nia a lotu saparap ne Moroa at lavalabat atnama keretna; a mumu asu mo langas di tong i do i xaxarang. Ketla a nuunu at levelinga diga malagan i at Lenavolo at ne Moses, la levenmamalagan at lavaeme vapaase alii. ¹⁵Nia a doxoma voovo ri ne Moroa xerekngan bok di, di nuunu do limixin axap, limixin avukat la limixin kapmek, diba roo xat amlong basinge lanmet. ¹⁶Kuren la a lolos amisik ti ke laxakapmek la ana nemen mokmokso at lemeren ne Moroa la limixin.

¹⁷Melemu at lentaba levenmaares aga nemen petpes basinge lemenemen Jerusalem, agat pas ugo ri xip ka lempilas tinedi limixin tarak mo dik pakes; la aga vara i do anaplavang saparap ne Moroa. ¹⁸Aga lox i na la aga lox epovo loklok tik lox adadat; la nedu na diga vosiga ia ro at loogu laplavang. Goxopmen bok timixin solo diga nemen eburu minia la goxopmen bok tekarakat ap mo loxot. ¹⁹Ketla leme Judaia boro at lenep Asia mo diga nemen go; ba lox avukat do nedu axa dina ru de melamgo ram la dina lok lavapaase, mo do di ruuna tevelinga xusu dina lok li i mavana rak. ²⁰Kopla i epovo do na limixin na di tu de, dina tong lavanga salai diga ven i rak, aga bilinga ren ap mo laaleng nia aga tu ro melamgo at luvuttadi amgomgo. ²¹Nia aga tu mun at legesa vanga. Nia aga xup lolos ap mo laaleng nia aga tu ro melamgo atdi xeretna, ‘Mi vaxaru ia at lavapaase mo lingina mila a nuunu do limixin no diga met pam diba roo xat amlong ti lorooro.’

²²Kuren la ne Pelik, gakleklen tinotno mo langas at Leeme Silok ga lox axap mo lavapaase. Ni ga lok tidi, “Aba rongga bok ba na levelinga melemu, la aba lok axav i, mo do leeme gomgo at limixin esep ne Lisias na rupot.” ²³Ni ga tong i ri laradi loklok tatao at ne Pol do ni nak lok maxopok at loklok tatao at luvuttadi rutu mu, ketla dina raba i mi tevengkonalleng tin kusu na vas tangtagap la dina siam abeles larapen tangas teren kusu dina raba i mi tempanga i epovo at lavakpakes teren.

Pol Ga Ru To Melamgo At Ne Pelik Mi Ne Darusila

²⁴Melemu at lentaba levenaleng Pelik ga rupot mi latkin teren ne Darusila, neni boro Judaia. Pelik ga tong mu ri ne Pol do neni na vubeles la ni ga rongga ne Pol ga paase mumu lunuunu at ne Iesu Karisito. ²⁵Ketla ne Pol ga paase mumu luruvtuvuk avukat, la loklok ti lok tatao avukat lodoxoma, la laaleng at ne Moroa naba lok li limixin at lavapaase, la ne Pelik ga marat aleng tinotno la ga lok, “I epovo nga. Aba ro xaka bok ba u do nia ana ruuna bok ba taaleng.” ²⁶Pelik ga vara ri tempilas boro at ne Pol la ni ga tong i rin do ni naba soxomus asu ne Pol mo do neni na raba i

mi tuunun; kuren la ni gap kup kaka amisik ne Pol la ga paase mumu mo luunun ti un asu i.

²⁷Melemu at legepu maares gara volo, Pokias Pestas ga lok ka loxot at ne Pelik ngan laradi gomgo ap mo lenep silok. Pelik ga vara i do na lox atdan lodoxoma at leme Judaia, kuren la ni ga ke xepe ne Pol to at loogu xokoxo.

Pol Ga Sing Do Dina Lox Aonon I Uto Saparap Ne Kaisar

25 ¹Pestas ga rupot go Sisaria, la melemu at lavantun aleng ga volo i, neni ga vas kaxat me go Sisaria la ga rupot to Jerusalem. ²Mo go lavaeme silok la luvuttadi amgomgo at leme Judaia diga lok li levelinga atdi mumu ne Pol. ³Diga sing lolos ne Pestas kusu na lok tavanga avukat tidi la na lox aonon ne Pol uto Jerusalem, mila diga lok li vam levelinga do diba sev amer i do neni na vas polo go at langa. ⁴Pestas ga vorang i xeretna, “Pol mo i nemen at loxokoxo to Sisaria, la nenia axa abamlong soso bok ugo. ⁵Mina riki tentaba at luvuttadi amgomgo atnimi xusu dinat pas uto Sisaria eburu minia la dina lok li lavapaase mumu mo laradi go, mo do neni gara lok pam tavanga xapmek.”

⁶Pestas ga nemen eburu minedi at lavanuan aleng koplā i sangaun aleng, la neni gamlong uto Sisaria. Ap mo lara laaleng melemu ni gat kis to at loxot tongtonga linga; la ga tong mu ri ne Pol kusu na beles uto xeneng saparav i. ⁷Pol ga rupot, la leme Judaia no diga vas kaxat boro Jerusalem diga ru xangkan i la diga lok li laxampapaase lolos mumu i; ketla kopmen di goxo lox asuusu i do levelinga atdi ga ruturun.

⁸La ne Pol ga lok keretna, “Axo lok kapmek tempanga mumu Lenavolo at leme Judaia, koplā loogu laplavang koplā at ne Kaisar.”

⁹Pestas ga vara i do na lox amomo leme Judaia, kuren la ni ga sue ne Pol, “U vara box i do unat pas uto Jerusalem la una ru ro melambo rax e la nia ana ronga na levelinga di lok li i ram?”

¹⁰Pol ga lok, “A tu na de melambo at loxot tongtonga linga at ne Kaisar; at na loxot mun miba ronga linga rak. A goxo lok kapmek tempanga at leme Judaia; kerekngan nenu ukleklen avukat tinotno i. ¹¹Dola nia agara los polo vam Lenavolo la agara lok pam tavanga xusu nia anaba met nov i, i lox avukat mene; a noxo sing do aba sixiro basinge i. Ket do na levelinga di lok li i rak kopmen na ruturun, ixo epovo do tara na song araba ia uto atdi; a vara i do una lox aonon ia uto at ne Kaisar.”

¹²Pestas ga epaase eburu mi limixin papaase ren la ni ga lok, “Ura sing pam do ubat pas uto at ne Kaisar, kuren la nenu uba vot posiga i.”

Pestas Ga Soxomus Lavapaase Mumu Ne Pol

¹³Melemu at lentaba levenaleng gara volo la loorong silok, ne Agripa eburu mi neinen, laasen teren ne Benis duga rupot to Sisaria xusu duna ven ti ne

Pestas la kusu duna vaase momo rin. ¹⁴Duga nemen go Sisaria at levenaleng buaang, la ne Pestas ga paase mumu ne Pol ti mo loorong silok keretna, “Lara laradi i nemen at loxokoxo, no ne Pelik ga on basinge i. ¹⁵Nia agat pas uto Jerusalem, la lavamaasa silok la loxongkulao silok at leme Judaia diga lok li levempapaase rin la diga sing ia xusu ana lok li lumumuat teren.

¹⁶Ketla nia aga tong i ridi do nedik limixin boro Rom kopmen dik tana song araba gamasa taradi uto ri lanmet. Neni naba epen etang mi mo laradi nedu gi edak, kusu neni bok naba ronga levelinga ren la na vorang i. ¹⁷Mo luvuttadi silok diga rupot de, la nia xopmen a goxok lok sila; ap mo mun lara laaleng melemu aga xis to at loxot tongtonga linga la aga tong i ri laradi esep kusu na lox abeles ne Pol ukeneng. ¹⁸La nedi mo limixin diga lok li i at lavapaase; diga xatu upana, kusu dina vaase; la nia aga nua i do diba vaase mu i mi taxapmek. Ketla di goxo lox i. ¹⁹Diga ruuna mun levesusue eburu min mumu leventaangas at lotu atnedi la mumu bok lara laradi laasen teren ne Iesu, no gara met pam; ne Pol ga lok do neni mo i rooro. ²⁰A goxo epovo do anaba lok ka tevelinga mumu na lavanga; kuren la aga sing ne Pol kusu ni nat pas uto Jerusalem, la ana ronga mo lavapaase ren go. ²¹Ketla ne Pol ga sing do ni na nemen maxopok at loklok tatao rak na de Sisaria, la ne Kaisar axa naba ronga linga ren. Kuren la aga tong i ri luvuttadi esep kusu dina lok tatao avukar i se nia aba lox aonon i uto at ne Kaisar.”

²²Agripa ga lok ti ne Pestas, “A vara i do nenia xa aba ronga linga bok ap mo laradi.”

Pestas ga vorang i xeretna, “Uba ronga linga ren kantamak.”

²³Kuren la ap mo laaleng melemu Agripa la ne Benis duga rupot mi lisanang avukat atdu, la limixin diga lok ngangao aleng atdu. La duga beles to xeneng at loxot tongtonga linga ua luvuttadi amgomgo at limixin esep la limixin silok ap mo lemenemen digat kis tangais i ve. La ne Pestas ga tong mu ri ne Pol la limixin esep diga lox abeles i ukeneng.

²⁴Pestas ga lok, “Loorong silok ne Agripa, la nemi axap mik lox eburu minama; mina ven na laradi ne Pol! Limixin me Judaia nade la boro bok Jerusalem diga raba linga ia mumu i. Diga paase lolos do ni naba met. ²⁵Ketla a goxo vuse ka tempanga do ni ga lok kapmex i xusu ni ba met nov i. Ketla neni xa ga sing ti ne Kaisar; kuren la nia a doma li vam i xusu ana sak tiki ne Pol uto saparav i. ²⁶Ketla axo vuse ka tevelinga loklox axasep teren kusu ana malagan i uto ri leeme gomgo atdik ne Kaisar. Kuren la ana lok li i uto melamgo atnimi la to melamgo ram, ne Agripa! Kuren la, melemu at na lavapaase, aba malagan tevelinga. ²⁷Mila ixok mokso do ana riki gamasa taradi xokoxo la xopmen tavapaase axasep ti levelinga diga lok li i ren.”

Pol Ga Vorang Lavapaase Ro Melamgo At Ne Agripa

26 ¹La ne Agripa ga lok ti ne Pol, “I lox avukat do una lok lavapaase ram.”

Pol ga sep makmak di, la ga lok keretna, ²“Laradi silok ne Agripa, a vara na tong i do a lok momo mila ana lok bok lavapaase rak de melamgo ram na lingina, la ana vorang levelinga at leme Judaia diga lok li i rak. ³Ana i ruturun mila nenu ukleklek tinotno leretere la levenekarakat ik lok kantubu atnedi leme Judaia. A sing nimi na, do mina xis atnaasan la mina rongia ia.

⁴Buaang atnedi leme Judaia diklen avukat lorooro rak ga vaxaru xaka i at laau rak. Diklen avukat luruptuvuk tarak ga lok kereva to at lemenemen tarak la to bok Jerusalem. ⁵Buaang levenmaares digakleklek ia. La nanga dikleklek i do aga nemen keneng at lara libinam tadi at lotu atnama mo di mumu asu aleng Lenavolo. Di tong nedid do lubang Parisi. Di epovo do dina tong i do na levelinga rak i ruturun, mo do di vara i. ⁶La na a tu nade at lavapaase atla a ngangais ne Moroa do ni ba lox empana laxakaape ren ga lox i ri lavalabat atdik. Na laxakaape ri lox axatu limixin basinge lanmet la diba vubeles at Linintoo at ne Moroa. ⁷La lasangaun mi legepura levenabung mixin atnama di ngangais ne Moroa xusu naba lox epovo na laxakaape ren tidi la dina lotu saparap amisix i at levenaleng axap. La mumu vam i na laxakaape, la leme Judaia, limixin tino rak, dia lok li ia at lavapaase! ⁸Tila ba, i lolos aleng tinimi xusu nemi mina nuunu do ne Moroa i epovo naba lox arooro amlong limixin diga met pam?

⁹Ganoxa nenia bok aga doxoma i do ana lok lempanga axap kusu ri ru pe lugugu at ne Iesu boro Nasaret. ¹⁰Aga lok na lempanga ro Jerusalem la aga lok ka levelinga lolos boro at lavamaasa silok kusu ana lok li limixin buaang at ne Moroa ro at loogu xokoxo; se diga lok do dina sev amet di, la nenia bok aga sisiam do dinap sev amet di. ¹¹Buaang laxanaleng agak lox asongot di ro xeneng at laraugu singising, la agak lok di xusu dina tong i do di xopara ri ne Iesu. Agak musak aleng tinotno di, kuren la agat pas bok uto vaxalom at lara menemen petpes kusu anak lox asongot nedid.

Pol Ga Ven Kibis Ne Iesu Ro At Langas

(Gu 9:1-19; 22:6-16)

¹²La kerepmo agat pas uto Damasko mi lavapaase axasep boro at lavamaasa silok, diga raba ia mi lisisiam. ¹³Mo go mun ap mo langas ga xanangking tubu, aga ven lababao gamgames aleng, ga soso boro vana at laxalibet; laxasep teren ga volo laxasep at laxangking la ga ngao pavaa ia eburu minedi luvuttadi diga emu minia. ¹⁴Nema axap maga subu ukopok at laxangka, la aga rongia laxaka at lara ga vaase Ibru ria, ga lok keretna, “Sol, Sol! Tila uk lox asongor ia? Uk lox asongor axa u xerekngan lodongki i rubut alu mi laxangkedek teren la kerepmo i lok asongor i at loxonuna at laradi loklok tatao ren!’

¹⁵Aga sue, ‘Leeme Silok, nenu nege?’

La Leeme Silok ga lok, ‘Nia ne Iesu, mo nenu uk lox asongor ia. ¹⁶Ketla una xatu kaxat la una ru mi luxangkedek taram. Ana ara vot asaxaven pam tu xusu ri soxolik ka u, i ngan lasaxaruki rak; nenu uba tong asu na lavanga nenu u ven i rak lingina ri lentaba vetpes la lempanga bok aba lox ase u min melemu. ¹⁷Aba lox arooro u basinge limixin me Judaia la basinge bok limixin kopmen di me Judaia, nia aba riki u saparap di. ¹⁸Nenu uba suang lodoxoma atnedi la uba sat kaka nedi basinge lamain at ne Satan uto at laxasep at ne Moroa, la basinge lolos at ne Satan uto saparap ne Moroa, kusu dina nuunu rak. La kerepmo ne Moroa naba doxoma xepe leveloklok kakapmek atnedi la dinaba ruuna ka loxot tidi xantubu ap mo limixin ne Moroa ga soxolik ka vam di.’

Pol Ga Vaase Asu Lugugu Ren Ngan Laradi Vavang

¹⁹Kuren la laradi silok ne Agripa, a goxo ronga xepe mo lisilimet aga ven i boro vana at laxalibet. ²⁰Aga vavang avot to Damasko la to bok Jerusalem, la melemu bok to at lengkot axap Judaia, la kantubu bok at limixin kopmen di me Judaia; aga vavang do dina leeng basinge laxakapmek atnedi la dina mumu asu ne Moroa la dina lok lempanga ri lox asuusu i do dira leeng pam. ²¹Lavasuun mun at nai la leme Judaia diga ranga alis ia ro at loogu laplavang, la diga lok do dina sev amer ia. ²²Moroo ga lok tooro aleng ia ise at na laaleng lingina; kuren la nia a ru na de, a tong asu levelinga ruturun tinemi axap, limixin gamasa la limixin silok. La na levelinga rak nia a tong asu i, i epovo mi levelinga at lavaeme vapaase alii la ne Moses, nedi diga tong i do na lempanga naba vot. ²³Diga tong i do Lanarong naba xip losongsongot la neni lara avot naba roo xat amlong basinge lanmet, kusu ri vaase asu langas ti lok ka lorooro ri leme Judaia la ti limixin kopmen di me Judaia.”

²⁴Pol move ga paase la ne Pestas ga xup tin keretna, “U baulang nom, ne Pol! Langsangan lakleklen taram i lox u la ura baulang!”

²⁵Pol ga vorang i rin keretna, “Leeme silok! Nia xopmen ana baulang. Na levelinga rak i ruturun la ik mokso. ²⁶Loorong silok ne Agripa! Ana vaase ru mi lolos la kopmen a noxo marat, mila nenu u xasep at na lempanga mumu ne Iesu. Nia a lok do nenu u xasep at na lempanga axap, mila na lempanga xopmen goxo ravasu ro at toxot lipe. ²⁷Kereva, u nuunu at levelinga at lavaeme vapaase alii? Aklen i do nenu u nuunu xuren!”

²⁸Agripa ga lok ti ne Pol, “Kereva, at na mun loxonaleng la u lok do una lox ia ngan laradi nuunu?”

²⁹Pol ga lok, “At na loxonaleng koplaxonaleng melemu, lisingising tarak ti ne Moroa do nenu la nedi axap nom ding tonga ia mo lingina, diba nuunu at ne Iesu xerekngan ia, ketla di noxo nemen at loxokoxo ngan ia.”

³⁰La ne Agripa, la laradi gomgo ne Pestas, la ne Benis, la nedi bok lentaba vetpes diga xatu kaxat. ³¹La diga vas su la diga lok tinedi getgesara xeretna, “Na laradi ixo lok kapmek tepanga xusu ni naba met nov i xopla na nemen at loxokoxo.”

³²La ne Agripa ga lok ti ne Pestas, “I epovo xusu ata lox asu na laradi mo do ni xopmen goxo sing ti ne Kaisar kusu na ronga linga ren.”

Limixin Esep Diga Lok Ka Ne Pol Uto Rom

27 ¹Lavaeme silok diga tong li levelinga rinama xusu maba sen kaxat mi lavattaaxup uto Itali at lemenemen silok Rom, la diga lok ka ne Pol la lentaba limixin kokoxo bok uto saparap ne Julias, neni laasesep at limixin esep boro Rom diga tong nedi do, “Limixin esep at ne Kaisar.” ²Nema mi ne Pol maga los kas at lavattaaxup boro Adramatiam, mo ga gagas kusu na sen kaxat uto at levesoolom at lenep silok Asia, la maga sixit kaxat. Aristakas, neni boro Masadonia at lemenemen Tesalonia, neni ga emu eburu minema.

³Ap mo lara laaleng melemu maga rupot to Sidon; Julias gak lok loklox avukat aleng ti ne Pol la ni ga siam ti ne Pol kusu ni nat pas la na ven larapen tangas teren, kusu diba raba i mi levempanga salai neni gak pakes tin. ⁴Maga sen kaxat basinge mo lenep, la maga sesen uto melemu ap mo losoxan Saipras kusu lamanman noxo mas tangarang lavattaaxup. ⁵Maga volo laras saparap lenep Silisia la Pampilia, la maga vot to Mira at lenep Lisia. ⁶Mo go laasesep ga ronga i do lara lavattaaxup boro Aleksandria mo ga lok do na sen kaxat uto Itali; kuren la ni ga lox aurut nema uto vana ren. ⁷Maga sesen sila at laxanaleng buang, ga lolos aleng tinama xusu mana sesen saparap lemenemen Kinidas; la ma goxo lox epovo i xusu mana mu mo lenep tas mumu langsung lamanman. Kuren la maga sesen epopolo uto melemu at losoxan Krit, maga volo lungusungus laasen teren Salmoni. ⁸Maga sesen auret tinotno ro loxon, la lavatpas ga lolos aleng ketla maga vot to at lara loxot diga tong i do Losoolom Avukat; goxo vaxalom bok boro at lemenemen silok Lasia.

⁹Maga nemen at lentaba levenaleng mo go, ga lolos tinotno rinama ri sen mi lavattaaxup, mila leven gaaling at lamanman ga rupot pam la laras ga repit aleng. Laaleng at ne Moroa ti mun anan no gara volo vam, neni laaleng ga lok katling laxakatu kaxat at leven gaaling at lamanman. Kuren la ne Pol ga vaase aronga di. Ni ga lok keretna, ¹⁰“Nemi limixin, a ven i do lavatpas atdik mede la uto, naba lok kapmek tinotno; langsung lumumuat naba vot saparap lempanga atdik la ti lavattaaxup bok, la ti lороoro bok atdik.” ¹¹Ketla laasesep ga mumu asu levelinga at laradi gang tanga lisitia ap mo lavattaaxup la at laradi gam gomgo ap mo lavattaaxup, la kopmen ni goxo nuunu at levelinga at ne Pol. ¹²Mo losoolom kopmen goxo lox avukat tinama xusu mana nemen teren ap mo

leven gaaling at lamanman; kuren la buaang atnedi diga lok do dina sen kaxat mi lavattaaxup la dina sen epopolo uto Pinisia mo do dina epovo. Ni lara losoolom to Krit ga nemen alipe at lamanman la diba nemen go at leven gaaling at lamanman.

Langsangan Lamanman Ga Rupot To At Laras

¹³Lamanman kakalik borou ga mas kaxat, la limixin diga lok do naba lox avukat mun mo lavatpas atnedi; kuren la diga rep aurut laaga la diga sen auret tinotno ro loxon at losoxan Krit. ¹⁴Ketla soso mun mo lamanman lolos ga mas kaxat boro at losoxan. Limixin diga so asen mo lamanman mi lamanman silok borois mero xopok. ¹⁵Ga mas lolos mo lavattaaxup la lavattaaxup goxo epovo xusu na sixit tangarang mo lamanman. Maga molo ri lok tong pen i la maga ke xepe i la lamanman gat mas aonon lavattaaxup atnama. ¹⁶Maga sesen alipe ro melemu ap mo losoxan kakalik, laasen teren Koda; ga lolos aleng kusu mana lok li avukat lese pang kakalik mo maga sasar i go melemu at lavattaaxup. ¹⁷Maga xip aurur i la maga dos alis lavattaaxup mi lempatkua. Diga marat aleng mila lavanga dina sixit mavana at laxangkaneng at lenep Libia la lavattaaxup na reporok; kuren la diga lox asi laaga ap mo lavattaaxup la maga ke lavattaaxup, lamanman gat mas aonon gamasa i. ¹⁸Mo langsangan lamanman ga lolos aleng tinotno; kuren la ap mo lara laaleng melemu diga lok kaxar i xusu dina lu asi mi lempanga go vana ap mo lavattaaxup ukopok ti laras. ¹⁹La ap mo manga lara laaleng melemu diga lu asi mi lempanga gugu ap mo lavattaaxup. ²⁰Buaang laxanaleng ma goxo ven laxangking mi laxampenti, la lamanman mo gat mas lolos aleng, maga nua i do nema axap ma noxo roo suu.

²¹La buaang laxanaleng mo limixin di goxo anan la ne Pol ga ru ro melamgo atdi la ga lok, “Nemi loxongkulao, nemi mi goxo mumu asu levelinga rak la taga sen kaxat boro Krit; do mi gita ronga res tarak, dik gixo ekip tangarang mi na lumumuat. ²²Ketla na a sing nimi do mina lolos! Kopmen teta atnimi naba met. Ketla lavattaaxup kujuk mun naba lok kapmek. ²³Nia aklen i na mila at laxanimin laangelo boro at ne Moroa no nenia ateran la a lotu saparav i, i vot pasa ia. ²⁴La i lok tia xeretna, ‘Pol! Nemen uta marat gat. Uba tu ro melamgo at ne Kaisar; la ne Moroa i balamu nimi la i siam pam do nedi axap at lavattaaxup dinaba roo suu.’ ²⁵Kuren la nemi limixin mina lolos mila nia a nuunu at ne Moroa do ni naba lox epovo lempanga xerekngan ni i tong pam i ria. ²⁶Ketla lamanman ba rev aoso lavattaaxup uto loxon at lara losoxan.”

²⁷At laxanimin at laaleng sev asangaun mi lavanuet at lamanman gap kiv aonon nema ro at laras Adaria. At laxanimin tubu luvuttadi loklok tatao ap mo lavattaaxup diga nua i do nema mo maga sesen auret ta uto loxon. ²⁸Kuren la diga lu asi mi luxua, losoxovo ga nemen teren la maga

long lenger i do mo laras ga epovo at legesa sangaun kobot mi legepu sangaun (120) lababaalom teren ukopok; melemu xakalik diga soxovo manga i la diga long lenger i do ga vasik sangaun lababaalom teren ukopok. ²⁹Diga marat aleng mila lavattaaxup naba ebaa ro at laxanuut; kuren la diga lox asu lavanuet lemparaga ro melemu at lavattaaxup la maga sing kusu laxangking na losu.

³⁰Luvuttadi loklok tatao ap mo lavattaaxup diga lok do dina sixiro basinge lavattaaxup; diga lox asi lesebang kakalik uto xopok at laras la diga lok poovo i do dina lok li laxanaga ro melamgo ap mo lavattaaxup. ³¹Ketla ne Pol ga lok ti laasesep eburu mi limixin esep keretna, “Mo do na luvuttadi loklok tatao di noxo nemen de vana at lavattaaxup, nemi xopmen mi noxo roo suu.” ³²Kuren la limixin esep diga ra korop luxua no gang tanga mo lesebang lixilik la ni ga sen su basinge di la uto nga.

³³Laxangking mo ga lok do na losu nga, la ne Pol ga sing ned i axap kusu dina an tempanga anan. “Migak lok bukbulu la miga nemen gamasa at lasangaun mi lavanuet aleng ta, la at na axap levenaleng mi goxo anan tempanga anan. ³⁴A sing nimi, do monga mina an tempanga anan; mik pakes tin kusu kopmen tara atnimi noxo met la kopmen tara atnimi noxo seeve.” ³⁵Melemu at na lavapaase ren, Pol ga lok ka lengkongkide, la ga tong avukat ti ne Moroa ro melamgo atnedi axap, la ga sebex i la ni ga an kaxat. ³⁶Diga lok ka lolos at levelinga at ne Pol, la ned i getgesara bok diga an bok lempanga anan. ³⁷Leexes atnama ga epovo at legepu sangaun kobot mi lavanuti sangaun mi lavanna (276) mo maga nemen go vana at lavattaaxup. ³⁸Melemu atnedi diga an mais, diga lu asu mi laxampiao uto xopok ti laras kusu lavattaaxup naba balalak.

³⁹Laxangking ga losu la luvuttadi loklok tatao ap mo lavattaaxup di goxo ven kibis mo losoxan. Ketla diga ven lara losoolom mi laxangkaneng teren la diga doxoma i do, mo i epovo, diba sen oso mi lavattaaxup atdi uto at laxangkaneng.

⁴⁰Kuren la diga ra korop asu lemparaga la diga ke ned i diga dong si ukopok at laras; la ap mo mene loxonaleng diga soxomus lara kua no diga xoxo alis mo lisitia min. Diga lox aurut labantamon to melamgo at lavattaaxup kusu lamanman naba mas aonon lavattaaxup, la na sen epopolo uto loxon. ⁴¹Ketla lavattaaxup ga so ru ro mavana at laxangkaneng, la ga xis tino nga, no melamgo at lavattaaxup ga ebaa la goxo epovo ri sen bilong uto melemu la lara paxanao ga saava vovorok axakalik mo lavattaaxup.

⁴²Limixin esep diga lok lodoxoma xusu ri sev amet luvuttadi xoxoxo, kusu di noxo box oso uto loxon la dina sixiro. ⁴³Ketla laasesep ga vara i xusu na lox arooro ne Pol, kuren la ni ga vaase vepe di do nemen di guta lox i mo. Ni ga tong i rinedi digakleklen ti xobok kusu dina los su boro at lavattaaxup la ukopok la dina bok oso uto loxon. ⁴⁴La ned i di goxo epovo

ri xobok, diba mumu mi lengkonuna ga tepovorok ap mo lavattaaxup. La kerepmo nema axap maga rupot avukat to loxon.

Pol Ga Nemen To Malta

28 ¹Maga rupot avukat go loxon, la maga long lenger i do mo losoxan laasen teren Malta. ²Limixin mego diga lok tooro avukat nama. Larakabu mo ga vot kaxat la maga mudut aleng tinotno; la diga xip kaka lengkumut la diga mas antos laxao la diga lox avukat tinotno nama. ³Pol ga lok ka lengkonuna la ga lok li i ro at laxao la lara lisii ga sixisu ukamang, basinge lengkonuna mumu liplivi ap mo laxao la ga at avarang at lekngen ne Pol. ⁴Limixin ap mo losoxan diga ven mo lisii ga merem to at lekngen ne Pol la diga lok tinedi getgesara xeretna, “Na laradi neni laradi sepsev amet tadi, kuren la ne Moroa noxo lok arooro i, keke i do ni goxo seeve ro at laras.” ⁵Ketla ne Pol ga semla xepe mo lisii uto at laxao la tavanga xapmek goxo rupot saparav i. ⁶Diga ngangais mo lekngen ne Pol do naba dang kaxat koplā neni na subu la na met. Ketla melemu diga ngais babaalom aleng la kopmen di goxo ven tepanga xakapmek ga vot saparav i, kuren la diga ba gili lodoxoma atdi la diga lok, “Neni lomoroa.”

⁷Goxo vaxalom at loxongkangka at laradi silok ne Pabilias, neni laradi gomgo ap mo losoxan. Ni ga lok tooro aleng nama, la at lavantun aleng maga nemen ngan lavaose ro at loogu ren. ⁸Temen ne Pabilias mo gak midi at loora, ni gak meres aleng mi liplivi la lebelen dedele. Pol ga beles uto xeneng at loogu ren, ga sing, la ga lok li lukngen to mavana ren, la ni ga lox avukat ta. ⁹Mo limixin diga ven i na la diga lok ka bok nedi limixin mekmeres me go ap mo losoxan uto saparap ne Pol la ni ga lox aroo nedi. ¹⁰Diga lok ngangao aleng atnema la diga raba nema mi buaang leventamtaba. Melemu at lavantun gaaling ga auret do mana sixit kaxat mi lavattaaxup la diga lok li lempanga rinama ro vana at lavattaaxup, diga raba nama mi lempanga ri mo lavatpas atnema.

Pol Ga Vas Kaxat Boro Malta Uto Rom

¹¹Maga nemen go at lavantun gaaling la maga sen kaxat mi lavattaaxup boro Aleksandria, laasen teren, “Luxalaisang Moroa.” Mo lavattaaxup ga nemen go ap mo losoxan at leven gaaling at lamanman. ¹²Maga rupot to at lemenemen silok Sirakus la maga nemen go at lavantun aleng. ¹³Maga sen kaxat manga mego la maga rupot to at lemenemen Regiam. Ap mo laaleng melemu lamanman avukat ga vot, la at mo manga lara laaleng melemu maga rupot to at lemenemen Putioli. ¹⁴Maga long lenget lentaba luvuttadi nuunu mo go la diga sue nama xusu mana nemen eburu minedi at lavanuti aleng. La magak lox amisix i xuren at lavatpas atnama uto Rom. ¹⁵Luvuttadi nuunu ro Rom diga ronga i do nema maga vot la digat

pas epolo uto at lenep etang at ne Apias la uto at lemenemen laasen teren Lavantun Laraugu kusu ri ekip tangarang minama. Pol ga ven di la ga tong avukat ti ne Moroa la lodoxoma ren ga lolos ba.

Pol Ga Ekip Tangarang Mi Leme Judaia Ro Rom

¹⁶Maga rupot to Rom, la diga siam do ne Pol na nemen kujuk la lara laradi esep na lok tatao i.

¹⁷Melemu at lavantun aleng Pol ga xup bubua ka luvuttadi amgomgo at leme Judaia. Diga rupot buru, la ne Pol ga lok tinedi, “Luvutnetak! A goxo lok tepanga xapmek mumu limixin atdik kopla leretere at lavalabat atdik. Ketla diga lok li ia at loxokoxo ro Jerusalem la diga song araba ia uto at limixin me Rom. ¹⁸Diga susue ia la diga lok do na soxomus asu ia, mila diga long lenger i do nia xopmen a goxo lok kapmek tepanga xusu nia aba met nov i. ¹⁹Ketla leme Judaia di goxopara i do dina soxomus asu ia la nia aga sing kusu uto ia at ne Kaisar kusu na ronga linga rak. Nia aga lox i nom ketla nia a goxo lok li tevempapaase mumu rinedi mo limixin me Judaia. ²⁰Kuren la aga sing kusu ana ven nimi la ana epaase eburu minimi; nia a nemen at loxokoxo mila a nuunu at Lanarong, mo nedik limixin me Judaia ta nemen tangais i.”

²¹Diga lok tin, “Maxo ruuna tevelinga loklox axasep boro Judaia mumu u, kopla tara atnema me Judaia ga laa me go mi tevelinga, kopla gita tong tevelinga xapmek mumu u. ²²Ketla ma vara i do mana ronga levelinga ram, mila ma ronga i do at lengkot axap limixin di paase mumu nom libinam tadi nenu uk lok teren.”

²³Kuren la diga lok katling lara laaleng eburu mi ne Pol, la buaang limixin diga vot ap mo laaleng to ap mo loogu ne Pol ga nemen teren. Ga maxantamak suubu se at laxanimin neni ga soxomus lavasuun at levelinga at Linintoo at ne Moroa rinedi. Ni ga lok tong pen i do na sat ka lodoxoma atdi mi levelinga ma xeneng at Lenavolo at ne Moses la levenmamalagan at lavaeme vapaase alii xusu diba nuunu at ne Iesu. ²⁴Lentaba atnedi diga nuunu at levelinga ren, ketla lentaba xopmen di goxo nuunu. ²⁵Kuren la diga vas kaxat basinge i mila levendoxoma atnedi ga ekarakat melemu at levelinga at ne Pol. Ni ga tong i ridi xeretna, “Loroonan Kaala ga vaase ruturun at lungusno at leeme vapaase alii ne Aisaia tinedi lavalabat atnemi. ²⁶Ni ga lok,

‘Uto u la una lok tinedi nom limixin keretna, mibang tonga, ketla mi noxo xasep teren; miba reven, ketla mi noxo ven kisiv i. ²⁷Mila levendoxoma atnedi na limixin ira rebonot pam, dira lok pe vam levenbaalung atnedi. La dira vampe vam levengkatli atdi. Naba lok kapmek do dina ven mi levengkatli atdi; la dina ronga mi levenbaalung atdi, la levendoxoma atdi nakleklen, la dina rem gili saparav ia, la nia ana lox avukat nedi.”

²⁸La ne Pol ga lok bok, “Minaklen avukar i do, levelinga loklox arooro at ne Moroa diga lox aonon pam i uto at limixin kopmen di me Judaia. Dibang tonga i.” ²⁹[Melemu at ne Pol ga tong i na, leme Judaia diga on basinge i, la diga epaase mukmusak aleng kantubu atdi.]

³⁰Ga legepu maares Pol ga nemen mo go ap mo loogu neni ga unun amisix i, la gak lok momo aleng tinedi digat posiga i. ³¹Ni ga vavang mi Linintoo at ne Moroa la ga vanasa bok mi laasen at Leeme Silok, ne Iesu Karisito la kopmen tara goxo ru pe lugugu ren; ni ga paase mi lolos la kopmen gita marat.